



Broj: 02-04-20555-4/26
Sarajevo, 23.04.2026. godine

Na osnovu člana 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na **125.** sjednici održanoj **23.04.2026.** godine, donijela je

ZAKLJUČAK

1. Utvrđuje se prijedlog Zakona o nabavljanju, držanju i nošenju oružja i municije.
2. Prijedlog Zakona iz tačke 1. ovog zaključka dostavlja se Skupštini Kantona Sarajevo na nadležno odlučivanje.
3. Ovaj zaključak stupa na snagu danom donošenja.

PREMIJER

Nihad Uk

Dostaviti:

1. Predsjedavajući Skupštine Kantona Sarajevo,
2. Skupština Kantona Sarajevo,
3. Zamjenici predsjedavajućeg Skupštine Kantona Sarajevo (3x),
4. Premijer Kantona Sarajevo,
5. Ministarstvo unutrašnjih poslova Kantona Sarajevo,
6. Evidencija,
7. A r h i v a.

Na osnovu člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici _____ održanoj dana _____ godine, donijela je

PRIJEDLOG

ZAKON
O NABAVLJANJU, DRŽANJU I NOŠENJU ORUŽJA I MUNICIJE

DIO PRVI - OPĆE ODREDBE

Član 1.
(Predmet)

Ovim zakonom propisuju se pojmovi i kategorije oružja, postupak nabavljanja oružja i municije, registracija oružja, postupanje sa oružjem i municijom, oduzimanje oružja, municije i isprava o oružju, popravlanje, modifikacija, prepravlanje i onesposobljavanje oružja, promet oružja, bitnih dijelova oružja, municije i bitnih dijelova municije, civilno strelište, evidencije i nadzor nad provođenjem zakona, odredbe o sankcijama, amnestija i legalizacija oružja, kao i druga pitanja od značaja za primjenu ovog zakona na području Kantona Sarajevo.

Član 2.
(Primjena)

- (1) Oružje, bitni dijelovi oružja, municija i dijelovi municije mogu se nabavljati, držati i nositi samo u skladu sa odredbama ovog zakona.
- (2) Odredbe ovog zakona u pogledu nabavljanja, držanja i nošenja oružja i municije odnose se i na strane državljane sa stalnim boravkom ili privremenim boravkom dužim od jedne godine na teritoriji Bosne i Hercegovine.
- (3) Fizičko lice koje nema prebivalište ili boravište na području Kantona Sarajevo ima pravo nošenja oružja i municije na području Kantona Sarajevo uz odgovarajuću važeću ispravu za nošenje izdatu od nadležnog organa.

Član 3.
(Izuzeci od primjene)

Odredbe ovog zakona ne odnose se na pripadnike Oružanih snaga Bosne i Hercegovine, policijske službenike, službenike sudske policije, pripadnike straže kazneno-popravnih ustanova, zaposlenike Obavještajno-sigurnosne agencije Bosne i Hercegovine koji su od iste ovlašteni za nošenje oružja i na druge državne organe i njihove zaposlenike kada nabavljaju, drže i nose oružje i municiju po posebnim propisima.

Član 4.
(Gramatička terminologija)

Gramatička terminologija korištenja muškog i ženskog roda za pojmove u ovom zakonu uključuje oba roda.

Član 5.
(Pojmovi)

(1) Pojmovi korišteni u ovom zakonu imaju sljedeće značenje:

a) oružje:

- 1) „oružje” je svako vatreno oružje iz alineje 2) ovog člana, kao i oružje koje nije vatreno oružje u skladu sa ovim zakonom i drugim posebnim zakonima u Bosni i Hercegovini;
- 2) „vatreno oružje“ je svako prijenosno cijevno oružje koje ispaljuje, služi za ispaljivanje ili se može prepraviti za ispaljivanje sačme, zrna ili projektila djelovanjem zapaljivog potisnog sredstva, osim izuzetaka u stavu (2) ovog člana. Predmet je podoban za prepravljavanje kako bi ispaljivao sačmu, zrno ili projektil djelovanjem zapaljivog potisnog sredstva ako ima izgled vatrenog oružja i ako ga je moguće prepraviti zbog njegove konstrukcije ili materijala od kojeg je izrađen;
- 3) „bitan dio vatrenog oružja“ je cijev, kućište, uvodnik metaka, uključujući i gornji i donji uvodnik, vodilica, cilindar, zatvarač ili nosač zatvarača koji su, s obzirom na to da su odvojeni predmeti, uključeni u kategoriju vatrenog oružja na koje su postavljeni ili na koje se namjeravaju postaviti;
- 4) „vatreno oružje za ličnu zaštitu i zaštitu imovine” je kratko i dugo vatreno oružje različitih kalibara;
- 5) „kratko vatreno oružje” je vatreno oružje čija cijev nije duža od 30 cm ili čija ukupna dužina oružja ne prelazi 60 cm;
- 6) „dugo vatreno oružje” je svako vatreno oružje osim kratkog vatrenog oružja;
- 7) „lovačko oružje” je vatreno oružje kategorije B sa kojim se smije loviti divljač u skladu sa propisima o lovstvu;
- 8) „sportsko oružje” je vatreno, vazdušno, hladno i oružje sa tetivom ili oprugom koje se koristi u streljaštvu ili drugim sportovima, u skladu sa propisima o sportu;
- 9) „vatreno oružje s jednostrukim okidanjem” je vatreno oružje koje nema spremnik i koje se prije svakog ispaljenja puni ručnim ubacivanjem metka ili komponenti metka u komoru ili u ležište metka za punjenje na poklopcu cijevi;
- 10) „automatsko vatreno oružje” je svako vatreno oružje koje se nakon ispaljenja automatski napuni i koje može ispaliti više od jednog metka jednokratnim pritiskanjem obarača;
- 11) „poluautomatsko vatreno oružje” je vatreno oružje koje je nakon ispaljivanja svakog projektila ponovo spremno za ispaljivanje i kod kojeg je iz cijevi jednokratnim pritiskanjem obarača moguće ispaljivati samo po jedan projektil;
- 12) „vatreno oružje sa repetirajućim mehanizmom” je vatreno oružje kod kojeg je nakon svakog ispaljivanja potrebno ručno preko mehanizma iz spremnika ili cilindra ubaciti metak u cijev;
- 13) „kombinovano oružje“ je vatreno oružje sa dvije ili više olučenih odnosno užljebljenih i neolučenih odnosno glatkih cijevi različitog kalibra;
- 14) „trofejno oružje“ je vatreno i vazdušno oružje koje je od strane ovlaštene organizacije ili ovlaštenog pojedinca trajno onesposobljeno za upotrebu i hladno oružje koje se čuva kao uspomena iz ranijeg perioda historije ili za njegovog vlasnika predstavlja ličnu ili porodičnu uspomenu, odnosno trofej;
- 15) „staro oružje“ je duga i kratka puška, kubura i druga vrsta oružja za koje se više ne proizvodi municija, koji imaju historijsku ili umjetničku vrijednost ili služi za umjetničke, kulturne i druge slične priredbe ili čini sastavni dio narodne nošnje i koje je od strane ovlaštene organizacije ili ovlaštenog pojedinca trajno onesposobljeno za upotrebu;
- 16) „onesposobljeno vatreno oružje“ je vatreno oružje koje je trajno onesposobljeno za upotrebu, osiguravajući da su svi bitni dijelovi tog vatrenog oružja postali trajno neupotrebljivi i da ih nije moguće ukloniti, zamijeniti ili modificirati kako bi se vatreno oružje na bilo koji način ponovo osposobilo;

- 17) „vazdušno oružje“ je svaka vrsta puške, pištolja, revolvera i drugih naprava koje snagom sabijenog vazduha ili drugog gasa izbacuju kroz cijev zrno, kuglicu, sačmu ili drugi projektil;
 - 18) „airsoft i paintball naprava“ je puška i pištolj, odnosno sportski rekvizit namijenjen izbacivanju plastičnih, gumenih ili želatinoznih projektila na isti način kao i vazdušno oružje, s tim da može imati veći kalibar od vazdušnog oružja i može raditi u automatskom režimu pri čemu je energija projektila manja od energije vazdušnog oružja;
 - 19) „gasno odnosno plinsko oružje“ je puška, pištolj, revolver i druga naprava koja pod pritiskom baruta ili sabijenog gasa odnosno plina raspršuje nadražljive tvari za onesposobljavanje pojedinca koje na ljudsko zdravlje imaju kratkotrajan učinak;
 - 20) „startni pištolj i revolver odnosno oružje za uzbunjivanje i signalizaciju“ su naprave sa ležištem municije namijenjene samo za ispaljivanje municije bez projektila, neškodljivih nadražujućih tvari, drugih aktivnih tvari ili pirotehničke municije za signalizaciju, te koje se ne mogu prepraviti za ispaljivanje sačme, zrna ili projektila djelovanjem zapaljivog potisnog sredstva;
 - 21) „konvertibilno oružje“ je gasno odnosno plinsko, startno i signalno oružje, kao i svako drugo oružje koje ima cijev i izgledom podsjeća na vatreno oružje i koje se, sa obzirom na konstrukciju i materijal od koga je napravljeno, može prepraviti tako da ispaljuje bojevu municiju;
 - 22) „hladno oružje“ je bodež, kama, mač, sablja, bajoneta i skakavac čije se sječivo nalazi pod pritiskom sabijene opruge i iz drške iskače pritiskom na dugme ili polugu ili metalne zvjezdice za bacanje, bez obzira na dužinu oštrice, bokser, buzdovan, te drugo oružje sa skrivenom oštricom, kao i drugi predmeti pogodni za nanošenje povreda kada se nose na javnim mjestima;
 - 23) „oružje sa tetivom“ je samostrel, luk, praćka i druga naprava koja snagom napete tetive ili druge elastične materije izbacuje strijele ili drugi projektil;
 - 24) „paradno i akustično oružje“ je vatreno oružje koje je posebno prepravljeno za isključivu upotrebu ispaljivanja municije bez projektila, za upotrebu u pozorišnim predstavama, fotografiranju, filmskom i televizijskom snimanju, rekonstrukciji historijskih događaja, povorkama, sportskim događajima i obuci;
 - 25) „reprodukcije oružja“ je kopija dugog i kratkog vatrene oružja, koja se puni sa usta cijevi crnim barutom i pali fitiljem, kremenom ili kapislom;
 - 26) „imitacija oružja“ je predmet koji je vanjskim izgledom sličan ili jednak oružju, ali ga nije moguće upotrijebiti ili prepraviti u vatreno oružje;
 - 27) „dekorativno oružje“ je oružje koje je izrađeno u dekorativne svrhe i nije ga moguće upotrijebiti ili prepraviti u vatreno oružje;
 - 28) „registrovano oružje“ je oružje za koje je izdata odgovarajuća isprava o oružju i koje je evidentirano u registar nadležnog organa;
- b) municija:
- 1) „municija“ su meci kao cjelina ili njegovi sastavni dijelovi, uključujući čahure, inicijalne kapisle, potisno punjenje, zrna ili projektili koji se koriste u vatom oružju;
 - 2) „lažna municija“ je municija koja ne sadrži inicijalnu kapislu, barutno ili eksplozivno punjenje;
 - 3) „municija sa probojnim dejstvom“ je municija za vojnu upotrebu pri čemu je projektil presvučen košuljicom i ima čeličnu probojnu jezgru;
 - 4) „municija sa eksplozivnim projektilima“ je vojna municija koja sadrži punjenje koje eksplodira;
 - 5) „municija sa zapaljivim projektilima“ je vojna municija kod kojeg projektil sadrži hemijsku smjesu koja se zapali prilikom dodira sa zrakom ili prilikom udara;

- 6) „projektil” je fizičko tijelo izbačeno početnom brzinom prema nekom cilju koje dalje inercijom leti balističkom putanjom;
 - 7) „municija za vatreno oružje“ je cjelovit metak koji sjedinjuje čahuru, kapislu, barutno punjenje i projektil ili sačmu;
 - 8) „municija za muškete“ je barutno punjenje i projektil sjedinjeni u papirnom pakovanju;
 - 9) „barut“ je pirotehnička smjesa koja sagorijevanjem vrlo brzo prelazi iz čvrstog u gasovito stanje, a u zatvorenom prostoru ostvaruje visok pritisak;
 - 10) „inicijalna kapisla“ je dio metka ispunjen inicijalnom smjesom, aktivira se udarom udarne igle i prouzrokuje paljenje barutnog punjenja u metku;
 - 11) „čahura“ je dio metka koji služi za smještaj barutnog punjenja i povezivanja ostalih dijelova metka (projektil i inicijalna kapisla) u jednu cjelinu;
- c) isprave o oružju:
- 1) „odobrenje za nabavljanje oružja” je isprava o oružju na osnovu koje fizička i pravna lica mogu nabaviti oružje;
 - 2) „odobrenje za držanje oružja” je isprava o oružju koja se izdaje pravnom licu za držanje oružja;
 - 3) „oružni list” je javna isprava o oružju na osnovu koje fizičko lice drži i nosi vatreno oružje u skladu sa ovim zakonom i sadrži podatke o vatrenom oružju i podatke o vlasniku vatrenog oružja;
 - 4) „odobrenje za sakupljanje starog oružja” je isprava o oružju koja omogućava fizičkom i pravnom licu sakupljanje i držanje starog oružja bez prava nošenja;
 - 5) „kolekcionarska dozvola” je isprava za sakupljanje i držanje starog oružja koja se izdaje fizičkom, pravnom licu i obrtniku odnosno kolekcionaru koje posjeduje više od deset komada različitog registrovanog oružja, bez prava nošenja;
 - 6) „potvrda o prijavi oružja” je isprava koju izdaje nadležna policijska uprava za oružje kategorije C;
 - 7) „potvrda za nošenje oružja i municije” je isprava koja se izdaje članu sportske streljačke ili lovačke organizacije ili fizičkom licu koje obavlja poslove zaštite ili čuvaru šuma, lovišta i ribolovišta;
 - 8) „potvrda za prenošenje oružja i municije” je isprava koja se izdaje članu sportske streljačke ili lovačke organizacije ili fizičkom licu koje obavlja poslove zaštite ili čuvaru šuma, lovišta i ribolovišta, u svrhu prenošenja oružja i municije;
- d) subjekti:
- 1) „vlasnik oružja” je fizičko lice, pravno lice ili obrtnik kome je izdata odgovarajuća isprava o oružju ili drugi dokaz o vlasništvu;
 - 2) „zajednički korisnici oružja“ su lica koja koriste isto lovačko ili sportsko oružje;
 - 3) „trgovac oružjem” je pravno lice ili obrtnik koje se bavi trgovinom oružjem, bitnim dijelovima oružja, municijom i bitnim dijelovima municije, a koje je, prije upisa u sudski registar, odnosno u registar obrtnika, dobilo odobrenje nadležne policijske uprave;
 - 4) „posrednik“ je pravno lice ili obrtnik, koji se za razliku od trgovca oružjem, bavi pregovaranjem ili ugovaranjem transakcija za kupovinu ili prodaju oružja, bitnih dijelova oružja, municije i bitnih dijelova municije;
 - 5) „obrtnik“ je fizičko lice koje obavlja djelatnost u svoje ime i za svoj račun a pritom se može koristiti i radom drugih lica kojima je u obavezi zaključiti ugovor o radu, u skladu sa propisima iz oblasti radno-pravnih odnosa;
 - 6) „ovlašteni serviser oružja“ je pravno lice ili obrtnik koji je registrovan za obavljanje djelatnosti i kojima je od nadležne policijske uprave odobreno bavljenje popravljanjem, modifikacijom, prepravljanjem i onesposobljavanjem oružja;

- 7) „kolekcionar” je svako fizičko lice, pravno lice ili obrtnik posvećeno prikupljanju i očuvanju oružja, bitnih dijelova oružja ili municije u historijske, kulturne, naučne, tehničke i obrazovne svrhe ili svrhe očuvanja nasljeđa;
 - 8) „sportska streljačka organizacija“ je osnovni oblik organiziranja u streljačkom sportu, za obavljanje streljačkih sportskih aktivnosti i ciljeva;
 - 9) „sportski streljački savez“ je udruženje sportskih klubova na nivou kantona, entiteta ili države koji se udružuju kako bi ostvarili zajedničke interese i ciljeve;
 - 10) „čuvari“ su fizička lica koja obavljaju poslove fizičke zaštite tako što neposredno preduzimaju dopuštene mjere i radnje radi sprečavanja i otkrivanja štetnih pojava i protupravnih radnji koje mogu nanijeti štete imovini predviđene u odredbama propisa koje uređuju oblast agencija i unutrašnjih službi za zaštitu ljudi i imovine, odnosno koje mogu ugroziti život ili tijelo lica koje štiti ili kada je došlo do većeg narušavanja javnoga reda i mira;
 - 11) „lovočuvari” su fizička lica koja u lovočuvarskoj službi, u skladu sa zakonom koji uređuje oblast lovstva, obavljaju poslove zaštite i čuvanja lovišta;
 - 12) „čuvari šuma” su fizička lica koja u čuvarskoj službi, u skladu sa zakonom koji uređuje oblast zaštite šuma, obavljaju poslove zaštite i čuvanja šuma i šumskih zemljišta;
 - 13) „ribočuvari“ su fizička lica koja u ribočuvarskoj službi, u skladu sa zakonom koji uređuje oblast ribolova, obavljaju poslove zaštite i čuvanja ribolovnog područja;
- e) radnje:
- 1) „registracija oružja” je postupak unosa podataka o oružju, podataka o bitnim dijelovima oružja i podataka o vlasniku oružja u službene evidencije propisane ovim zakonom, kao i propisima donijetim na osnovu ovog zakona, uz izdavanje odgovarajuće isprave o oružju;
 - 2) „držanje i nošenje oružja za fizička lica“ je radnja koja podrazumijeva držanje i nošenje oružja na osnovu važeće isprave o oružju izdate od strane nadležnog organa;
 - 3) „držanje oružja za pravna lica“ je radnja koja podrazumijeva držanje oružja na osnovu važeće isprave o oružju izdate od strane nadležnog organa;
 - 4) „nošenje vatrenog oružja“ je radnja koja podrazumijeva nošenje vatrenog oružja spremnog za upotrebu sa magazinom u oružju bez metka u cijevi za vatreno oružje sa magazinom, a za vatreno oružje sa bubnjem sa praznim prvim dolazećim spremištem za metak;
 - 5) „prenošenje vatrenog oružja” je radnja kojom se vatreno oružje koje se drži na osnovu važeće isprave o oružju prenosi radi odlaska u lov, na sportsko takmičenje ili na strelšte, kao i radnja kada se vatreno oružje bez važeće isprave prenosi u slučaju promjene vlasništva nad oružjem ili u drugim opravdanim slučajevima uz prethodnu prijavu nadležnoj policijskoj upravi;
 - 6) „prenošenje oružja kategorije C i hladnog oružja“ je radnja kojom se oružje kategorije C i hladno oružje prenosi sa jedne lokacije na drugu na način da nije vidljivo drugima i da onemogućava trenutnu upotrebu;
 - 7) „povjeravanje oružja“ je radnja kojom se oružje drži i koristi samo za vrijeme obavljanja poslova osiguranja u objektu, odnosno osiguranja na prostoru na kojem se obavlja djelatnost i u pravcu kretanja transporta koji obezbjeđuje;
 - 8) „davanje na poslugu“ je radnja kojom se oružje drži na osnovu važećeg oružnog lista za tu vrstu i kategoriju oružja i potvrde lovačke ili streljačke organizacije;
 - 9) „promet oružja i municije“ je nabavljanje oružja i bitnih dijelova oružja, municije ili dijelova municije radi prodaje, smještaja, čuvanja i prodaje na veliko i malo na području Kantona Sarajevo;
 - 10) „popravljanje oružja“ je otklanjanje kvarova na oružju, zamjena ili ugradnja originalnih dijelova;

- 11) „modifikacija ili prepravljanje oružja” je prilagođavanje oružja drugoj municiji ili svojoj prvobitnoj svrsi, zamjena ili ugradnja bitnih dijelova i drugi zahvati na oružju kojima se utiče na njegovo funkcionisanje ili na tehnička svojstva;
 - 12) „onesposobljavanje oružja“ je radnja kojom se oružje i bitni dijelovi oružja trajno oneposobljavaju za upotrebu;
 - 13) „nezakonita proizvodnja oružja i municije“ je proizvodnja ili sastavljanje vatrenog oružja, njegovih bitnih dijelova, municije i bitnih dijelova municije, od bilo kojih bitnih dijelova takvog vatrenog oružja, bez odobrenja izdatog od strane nadležnog organa ili bez označavanja vatrenog oružja u trenutku njegove proizvodnje;
 - 14) „nezakonit promet i posredovanje“ je nabavljanje, prodaja, isporuka, prijevoz ili transfer vatrenog oružja, bitnih dijelova oružja, municije ili dijelova municije ili posredovanje sa istim, bez odobrenja izdatog od strane nadležnog organa ili ako vatreno oružje, bitni dijelovi oružja ili municija nisu označeni;
 - 15) „praćenje oružja“ je sistemsko praćenje kretanja oružja i njegovih bitnih dijelova i municije, od proizvođača do kupca, u svrhu pružanja pomoći nadležnim državnim, entitetskim i kantonalnim organima, istrazi i analiziranju nezakonite proizvodnje i nezakonite trgovine i posredovanja;
 - 16) „dobrovoljna predaja registrovanog oružja, bitnih dijelova oružja, municije i dijelova municije za oružje kategorije A, A1, B i C” je predaja registrovanog oružja, bitnih dijelova oružja, municije i dijelova municije uz jasnu i nedvojbenu pismenu izjavu vlasnika, da isto dobrovoljno predaje nadležnoj policijskoj upravi;
- f) ostalo:
- 1) „civilno streljište“ je otvoreni ili zatvoreni objekat, namijenjen sportsko-rekreativnom gađanju i edukaciji, koji ispunjava tehničke i sigurnosne uslove za upotrebu registrovanog ili prijavljenog oružja;
 - 2) „vježbalište“ je dio lovišta određen za ispitivanje preciznosti lovačkog oružja koje se formira u skladu sa propisima o lovstvu i koji ispunjava sigurnosne uslove za upotrebu registrovanog ili prijavljenog oružja;
 - 3) „muzej” je stalna institucija u službi društva i njegovog razvoja, otvorena javnosti, u kojoj se nabavlja, čuva, istražuje i izlaže oružje, bitni dijelovi oružja ili municija u historijske, kulturne, naučne, tehničke i obrazovne svrhe, te svrhe očuvanja historijskog nasljeđa ili rekreativne svrhe;
 - 4) „električni paralizator odnosno elektrošoker” je ručna naprava koja pomoću visokog električnog napona privremeno onesposobljava lice;
 - 5) „sprej za omamljivanje” je naprava koja sadrži i prilikom upotrebe raspršuje nadražujuća hemijska jedinjenja u koncentracijama dozvoljenim po prihvaćenim međunarodnim standardima;
 - 6) „nišan” je naprava kojom se oružju povećava preciznost;
 - 7) „prigušivač zvuka“ je mehanički uređaj montiran na vatreno oružje koji smanjuje zvuk i bljesak na ustima cijevi;
 - 8) „minsko-eksplozivno sredstvo” je svaka vrsta bombe, mine, granate i druge naprave opremljene sa eksplozivnom materijom ili adekvatnom neeksplozivnom materijom ili detonatorom, kod koje pod spoljnim ili unutrašnjim djelovanjem (težina, udar, potez, trenje, hemijska reakcija, nuklearna reakcija, električna energija i sl.) dolazi do oslobađanja energije i njenog aktiviranja;
 - 9) „mužar i prangija” je ručna ili samostojeća naprava namijenjena za izazivanje glasnog pucnja, koja je konstruisana tako da ne može primiti cjeloviti naboj, puni se sa usta cijevi određenom količinom crnog baruta i pali štapinom, kremenom i kapislom, a zatvara se sredstvom male specifične težine;

- 10) „posebna oprema za vatreno oružje” je svaki mehanizam namijenjen kao dodatak za osnovni model vatrenog oružja čijom primjenom se mijenjaju mogućnosti prilikom upotrebe oružja, osim optičkog nišana;
 - 11) „ispitivanje vatrenog oružja” je provjeravanje ispravnosti funkcionisanja vatrenog oružja i ispravnosti pojedinih dijelova vatrenog oružja, te kontrola izdržljivosti cijevi i drugih odgovarajućih dijelova pod određenim pritiskom;
 - 12) „obilježavanje žigom vatrenog oružja” je utiskivanje propisanih žigova na određene dijelove vatrenog oružja za koje je ispitivanjem utvrđena ispravnost;
 - 13) „tehnički pregled vatrenog oružja” je pregled koji se obavlja radi provjere tehničke ispravnosti vatrenog oružja;
 - 14) „amnestija lica” je oslobođanje od odgovornosti za nelegalno posjedovanje oružja, bitnih dijelova oružja, municije i dijelova municije kategorije A, A1 i B, prilikom dobrovoljne predaje istih;
 - 15) „legalizacija oružja” je postupak registracije neregistrovanog oružja kategorije A1 i B koje je lice posjedovalo bez odobrenja za koje nije potrebno dokazivati porijeklo oružja, uz ispunjenost uslova propisanih ovim zakonom.
- (2) U smislu ovog zakona ne smatra se oružjem i municijom:
- a) oružje koje je učinjeno trajno neprikladnim za upotrebu onesposobljavanjem, koje osigurava da su svi bitni dijelovi vatrenog oružja trajno neupotrebljivi i da ih nije moguće odstraniti, zamijeniti ili prepraviti kako bi oružje na bilo koji način bilo ponovno osposobljeno;
 - b) predmeti koji su izrađeni za uzbuđivanje, signaliziranje, spašavanje života, omamljivanje, uspavljivanje ili usmrćivanje životinja ili namijenjeni za podvodni ribolov;
 - c) predmeti koji su namijenjeni za industrijske ili tehničke svrhe, pod uslovom da se mogu koristiti samo u navedene svrhe;
 - d) dekorativno oružje;
 - e) imitacije oružja;
 - f) sve vrste nišana;
 - g) municija za vazdušno oružje;
 - h) municija za oružje sa tetivom;
 - i) neeksplozivne komponente municije;
 - j) lažna municija.

Član 6. **(Kategorije oružja)**

- (1) Oružje se razvrstava u pet kategorija:
- a) kategorija A - zabranjeno oružje:
 - 1) eksplozivni bojni projektili i bacači;
 - 2) minsko-eksplozivna sredstva i dijelovi;
 - 3) automatsko vatreno oružje;
 - 4) vatreno oružje koje je skriveno u drugim predmetima na način da izgleda kao neki drugi predmet;
 - 5) municija sa probojnim, eksplozivnim, obilježavajućim ili zapaljivim projektilima, te projektili za takvu municiju;
 - 6) municija za kratkocijevno i dugocijevno oružje sa projektilom koji ima ekspanzijski učinak i zrna za takvu municiju, osim municije za lov ili sportsko streljaštvo za lica kojima je dozvoljeno da koriste to oružje;
 - 7) automatsko vatreno oružje koje je prepravljeno u poluautomatsko vatreno oružje;

- 8) poluautomatsko dugo vatreno oružje, odnosno vatreno oružje izvorno namijenjeno ispaljivanju sa ramena koje se može smanjiti na dužinu manju od 60 cm, a da ne izgubi svoju funkciju, i to sklopivim ili teleskopskim nastavkom ili nastavkom koji se može ukloniti bez upotrebe alata;
 - 9) svako vatreno oružje u ovoj kategoriji koje je proizvedeno ili prepravljeno da ispaljuje municiju bez projektila i raspršuje nadražljive tvari za onesposobljavanje pojedinaca koje na ljudsko zdravlje imaju kratkotrajan učinak i druge aktivne tvari ili pirotehnička municija ili paradno ili akustično oružje;
 - 10) oružje ove kategorije koje je izrađeno ili prerađeno bez odobrenja;
 - 11) ostalo vatreno oružje koje nije obuhvaćeno kategorijama A1, B, C ili D;
 - 12) posebna oprema za vatreno oružje koja nije namijenjena za civilnu upotrebu, kao što su podcjevni bacači granata i druga vojna oprema;
 - 13) prigušivači zvuka za oružje za ličnu sigurnost;
- b) kategorija A1–dozvoljeno vatreno oružje za fizička lica, pravna lica i obrtnike za koje je potrebno prethodno odobrenje za bilo koje od sljedećeg poluautomatskog vatrenog oružja sa centralnom udarnom iglom:
- 1) kratko vatreno oružje koje omogućuje ispaljivanje više od 21 metka bez ponovnog punjenja, ako je spremnik kapaciteta većeg od 20 metaka dio tog vatrenog oružja ili se u njega umeće odvojivi spremnik kapaciteta većeg od 20 metaka;
 - 2) dugo vatreno oružje koje omogućuje ispaljivanje više od 11 metaka bez ponovnog punjenja, ako je spremnik kapaciteta većeg od 10 metaka dio tog vatrenog oružja ili se u njega umeće odvojivi spremnik kapaciteta većeg od 10 metaka;
- c) kategorija B - dozvoljeno vatreno oružje za koje je potrebno prethodno odobrenje nadležne policijske uprave:
- 1) repetirajuće kratko vatreno oružje;
 - 2) kratkocijevno vatreno oružje za jedinačnu paljbu sa središnjim paljenjem;
 - 3) kratkocijevno vatreno oružje za jedinačnu paljbu za municiju sa rubnim paljenjem;
 - 4) poluautomatsko dugocijevno vatreno oružje kod kojeg spremnik i ležište metka zajedno primaju više od tri metka u slučaju vatrenog oružja sa rubnim paljenjem, odnosno više od tri ali manje od 12 metaka u slučaju vatrenog oružja sa centralnom udarnom iglom;
 - 5) poluautomatsko kratkocijevno vatreno oružje, osim oružja navedenog u stavu (1) tačka b) alineja 1) ovog člana;
 - 6) poluautomatsko dugocijevno vatreno oružje navedeno u stavu (1) tačka b) alineja 2) ovog člana, kod kojeg spremnik i ležište metka ne mogu zajedno primiti više od tri metka, pri čemu se spremnik može odvojiti odnosno nije sigurno da se uobičajenim alatom ne može prepraviti u oružje kod kojeg spremnik i ležište metka zajedno primaju više od tri metka;
 - 7) kombinovano lovačko oružje;
 - 8) repetirajuće i poluautomatsko dugocijevno vatreno oružje sa glatkom ili užljebljenom cijevi ukupne dužine do 60 cm;
 - 9) svako vatreno oružje u ovoj kategoriji koje je prepravljeno da ispaljuje bilo koju drugu municiju osim one za koju je proizvedeno;
 - 10) poluautomatsko vatreno oružje za civilnu upotrebu koje je slično automatskom vatrenom oružju, osim onog navedenog u stavu (1) tačka a) al. 7) i 8) i tačka b) al. 1) i 2) ovog člana;
 - 11) dugo vatreno oružje sa jednostrukim okidanjem i glatkim cijevima stavljeno na tržište 14. septembra 2018. godine ili nakon tog datuma;
- d) kategorija C - dozvoljeno oružje za koje je potrebna prijava nadležnom organu:

- 1) reprodukcija vatrenog oružja kod kojeg se ne upotrebljava metak sa centralnim ili rubnim paljenjem i druge reprodukcije oružja;
 - 2) mužar i prangija;
 - 3) staro oružje;
 - 4) trofejno oružje;
 - 5) svako oružje u ovoj kategoriji koje je prepravljeno i čije prepravke ne utiču na promjenu kategorije oružja;
 - 6) vazdušno oružje;
 - 7) oružje sa tetivom čija je sila zatezanja tetive 450 njutna ili veća, odnosno čija je natezna težina 101 libre / 45 kilograma ili veća;
 - 8) električni paralizatori snage 10.000 volti ili više;
 - 9) prigušivači zvuka za lovačko i sportsko oružje;
 - 10) paradno i akustično oružje;
- e) kategorija D - dozvoljeno oružje za koje nije potrebno odobrenje niti prijava nadležnom organu:
- 1) električni paralizatori snage ispod 10.000 volti;
 - 2) sprejevi za omamljivanje;
 - 3) hladno oružje;
 - 4) oružje sa tetivom čija je sila zatezanja tetive manja od 450 njutna, odnosno čija je natezna težina manja od 101 libre / 45 kilograma;
 - 5) airsoft i paintball naprave;
 - 6) startni pištolj i revolver odnosno oružje za uzbuđivanje i signalizaciju.
- (2) Izuzetno od odredbe stava (1) tačka a) ovog člana, može se odobriti nabavljanje oružja kategorije A pravnom licu i obrtniku koji ispunjavaju uslove za izdavanje odobrenja i kada je to potrebno za obrazovne, istraživačke, historijske ili kulturne svrhe, uključujući film i pozorište, kao i poslove osposobljavanja lica za poznavanje propisa koji se odnose na držanje, čuvanje i nošenje oružja i tehnička znanja za rukovanje oružjem, prevoz, čuvanje izuzetno opasnih ili visokovrijednih transporta ili čuvanje infrastrukture od vitalnog značaja i osjetljivih prostora.

Član 7.

(Zabrana i ograničenja)

- (1) Zabranjeno je nabavljanje, posjedovanje, držanje ili nošenje, kao i promet i posredovanje vatrenim oružjem, bitnim dijelovima oružja, municije i bitnim dijelovima municije ili snabdjevanje istim ili dogovaranje transfera vatrenog oružja, bitnih dijelova oružja, municije i bitnih dijelova municije kategorije A, osim ako ovim zakonom nije drugačije propisano.
- (2) Zabranjeno je nabavljanje, posjedovanje, držanje ili nošenje oružja i bitnih dijelova oružja kategorije A, A1 i B bez odgovarajuće isprave o oružju.
- (3) Oružje kategorije C nabavlja se u slobodnoj prodaji, a drži se ili nosi na osnovu izdate potvrde o prijavi oružja.
- (4) Oružje kategorije D mogu nabavljati, držati i nositi samo lica starija od 18 godina, osim članova sportskih streljačkih organizacija za oružje iz člana 6. stav (1) tačka e) al. 4) i 5) ovog zakona, a izuzetno sprejeve za omamljivanje mogu nabavljati, držati i nositi lica starija od 16 godina, kao i pravna lica i obrtnici.
- (5) Naprave sa ležištem municije oblikovane tako da mogu ispaljivati samo municiju bez projektila, neškodljive nadražujuće tvari, druge aktivne tvari ili pirotehničko signalnu municiju ne smiju se prepraviti za ispaljivanje sačme, zrna ili projektila djelovanjem zapaljivog potisnog sredstva.
- (6) Izuzetno, u opravdanim slučajevima dozvoljeno je prenošenje hladnog oružja.

Član 8.
(Vrste oružja kategorije B)

Oružje kategorije B iz člana 6. stav (1) tačka c) razvrstava se na sljedeće vrste oružja:

- a) oružje za ličnu sigurnost, odnosno kratko vatreno oružje;
- b) sportsko oružje;
- c) lovačko oružje.

DIO DRUGI - POSTUPAK NABAVLJANJA ORUŽJA I MUNICIJE

Član 9.
(Isprave o oružju)

- (1) Isprave o oružju su:
 - a) odobrenje za nabavljanje oružja;
 - b) odobrenje za nabavljanje bitnih dijelova oružja;
 - c) oružni list za držanje i nošenje oružja (u daljnjem tekstu: oružni list);
 - d) odobrenje za držanje oružja za fizička lica koja su naslijedila oružje;
 - e) odobrenje za držanje oružja za pravna lica;
 - f) odobrenje za sakupljanje starog oružja;
 - g) odobrenje za spravljanje municije;
 - h) kolekcionarska dozvola;
 - i) potvrda o prijavi oružja kategorije C;
 - j) isprave o oružju izdate na osnovu međunarodnih ugovora;
 - k) druga odobrenja, isprave i potvrde o oružju izdate na osnovu ovog zakona.
- (2) Bliže odredbe o izgledu i sadržaju obrazaca isprava o oružju iz stava (1) ovog člana, kao i obrasce zahtjeva za izdavanje isprava o oružju i drugih dokumenata, se uređuju podzakonskim propisom koji na prijedlog policijskog komesara donosi ministar unutrašnjih poslova Kantona Sarajevo (u daljnjem tekstu: ministar).

Član 10.
(Nadležna policijska uprava)

Nadležna policijska uprava je organizaciona jedinica Uprave policije Ministarstva unutrašnjih poslova Kantona Sarajevo na čijem području fizičko lice koje je državljanin Bosne i Hercegovine kao podnosilac zahtjeva ima prebivalište ili strani državljanin sa odobrenim stalnim ili privremenim boravkom kao podnosilac zahtjeva ima boravište, odnosno na čijem području pravno lice ili obrtnik kao podnosilac zahtjeva ima sjedište.

Član 11.
(Opći i posebni uslovi za izdavanje odobrenja za nabavljanje oružja za fizička lica)

- (1) Oružje iz kategorije A1 i B može se nabavljati samo na osnovu odobrenja nadležne policijske uprave.
- (2) Zahtjev za izdavanje odobrenja za nabavljanje oružja kategorije A1 i/ili B za fizička lica podnosi se na propisanom obrascu nadležnoj policijskoj upravi. Jedan zahtjev se može podnijeti za izdavanje odobrenja za nabavljanje više komada oružja iste kategorije odnosno vrste.
- (3) Nadležna policijska uprava izdaje fizičkom licu odobrenje za nabavljanje oružja kategorije A1 i B ukoliko ispunjava opće i posebne uslove.
- (4) Opći uslovi za izdavanje odobrenja za nabavljanje oružja fizičkom licu su:
 - a) da ima opravdani razlog za nabavljanje oružja;
 - b) da je lice navršilo 21 godinu života;

- c) da nije pravosnažno osuđeno za krivično djelo, osim za krivično djelo protiv bezbjednosti javnog saobraćaja iz nehata koje za posledicu ima tjelesnu povredu ili materijalnu štetu, kao i za ista krivična djela u državi čiji je državljanin i u kojoj ima prebivalište ili boravište;
 - d) da protiv lica nije u Bosni i Hercegovini potvrđena optužnica, niti da se vodi krivična istraga za krivična djela propisana krivičnim zakonodavstvom u Bosni i Hercegovini za koja je propisana kazna zatvora od pet godina ili više, za druga djela kod kojih je radnja izvršenja nasilje, kao i za ista krivična djela počinjena u državi čiji je državljanin i u kojoj ima prebivalište ili boravište;
 - e) da lice u posljednje dvije godine do dana podnošenja zahtjeva za izdavanje odobrenja za nabavljanje oružja ili od momenta vršenja provjera na osnovu stava (9) ovog člana nije kažnjavano za prekršaj protiv javnog reda i mira s obilježjem nasilja, prekršaj propisan ovim ili drugim zakonom za koji mu je izrečena zaštitna mjera oduzimanja oružja, bitnih dijelova oružja i municije ili prekršaj sa obilježjem nasilja propisan drugim zakonom ili ako mu je u skladu sa zakonom o zaštiti od nasilja u porodici izrečena zaštitna mjera, te da nema dug u Registru novčanih kazni;
 - f) da ne postoje druge okolnosti koje ukazuju da bi oružje moglo biti zloupotrijebljeno, a naročito: češće i prekomjerno konzumiranje alkohola, konzumacija narkotičkih sredstava ili drugih omamljujućih sredstava, izraženo poremećeni porodični odnosi, kriminalističko-obavještajni razlozi i razlozi koji ukazuju na povezanost sa licima iz kriminalističko-obavještajne evidencije, disciplinske povrede propisa o lovstvu i sportskom streljaštvu, kao i druge okolnosti koje lice čine nepodobnim za nabavljanje oružja.
- (5) Posebni uslovi za izdavanje odobrenja za nabavljanje oružja fizičkom licu su:
- a) da je na zdravstvenom pregledu utvrđeno da je lice zdravstveno sposobno za držanje i nošenje oružja;
 - b) da poznaje propise koji se odnose na držanje, čuvanje i nošenje oružja i da raspolaže tehničkim znanjem za pravilno rukovanje oružjem;
 - c) da ispunjava uslove za siguran smještaj i čuvanje oružja o čemu daje pismenu izjavu na obrascu propisanom podzakonskim propisom koji, na prijedlog policijskog komesara, donosi ministar.
- (6) Nadležna policijska uprava izdaje fizičkom licu odobrenje za nabavljanje oružja kategorije A1 koji:
- a) ispunjava uslove iz st. (4) i (5) ovog člana;
 - b) aktivno vježba za sudjelovanje u streljačkim takmičenjima koje organizuje i provodi registrovana sportska streljačka organizacija ili sportski streljački savez;
 - c) posjeduje potvrdu registrovane sportske streljačke organizacije u kojoj je navedeno da je sportski strijelac član streljačkog kluba i da se redovno, najmanje 12 mjeseci, bavi streljaštvom u tom klubu i da vatreno oružje ispunjava propisane specifikacije za streljačku disciplinu utvrđenu od strane domaćeg ili međunarodnog sportskog streljačkog saveza.
- (7) Ukoliko lice koje posjeduje važeći oružni list za oružje koje je ranije nabavilo na osnovu izdatog odobrenja za nabavljanje oružja, podnese zahtjev za izdavanje odobrenja za nabavljanje oružja iste vrste ili bitnih dijelova oružja, neće se provoditi postupak za utvrđivanje općih i posebnih uslova iz st. (4), (5) i (6) ovog člana.
- (8) Ukoliko lice koje posjeduje oružni list za oružje koje je ranije nabavilo na osnovu izdatog odobrenja za nabavljanje oružja, podnese zahtjev za izdavanje odobrenja za nabavljanje oružja druge vrste ili kategorije, utvrđivat će se samo posebni uslovi iz st. (5) tač. b) i c) i (6) tač. b) i c) ovog člana.

- (9) Nadležna policijska uprava ovlaštena je provjeriti daljnje ispunjavanje uslova iz st. (4) tač. a), c), d), e) i f), (5) tačka a) i (6) ovog člana kod lica kojem je izdat oružni list za nabavljanje, držanje i nošenje oružja.
- (10) Načelnik nadležne policijske uprave formira komisiju koju čine tri člana i njihovi zamjenici, od kojih su dva člana i zamjenici policijski službenici iz policijske uprave, a jedan član je državni službenik ili namještenik Uprave policije koji rade na poslovima za sprovođenje propisa o oružju, od kojih je jedan član, a drugi zamjenik.
- (11) Nadležnosti, način rada i pravo na naknadu komisije iz stava (10) ovog člana, utvrđuju se podzakonskim propisom koji, na prijedlog policijskog komesara, donosi ministar.
- (12) Izuzetno od stava (4) tačka b) ovog člana, fizičkom licu se može dati odobrenje za nabavljanje oružja sa navršениh 18 godina ako je drugim zakonom ili aktom ovlašteno za nabavljanje i držanje oružja, ako je član sportske streljačke organizacije koji se aktivno takmiči u streljaštvu ili ako ima položen lovački ispit i član je lovačkog društva.
- (13) Za lica iz člana 3. ovog zakona, kada podnose zahtjev za nabavljanje, držanje i nošenje vatrenog oružja kategorije A1 ili B, neće se provoditi postupak utvrđivanja uslova iz st. (4), (5) i (6) tačka a) ovog člana, osim utvrđivanja uslova položenog lovačkog ispita i članstva u lovačkoj organizaciji, odnosno članstva u sportskoj streljačkoj organizaciji i aktivnog takmičenja u streljaštvu.

Član 12.

(Utvrđivanje općih uslova za izdavanje odobrenja za nabavljanje oružja fizičkom licu)

- (1) Fizičko lice ima opravdani razlog za nabavljanje oružja iz člana 11. stav (4) tačka a) ovog zakona ukoliko želi oružje nabaviti u svrhu lične sigurnosti, lova, sporta ili kolekcionarstva.
- (2) Fizičko lice ima opravdani razlog za nabavljanje oružja u svrhu iskazane potrebe za ličnom sigurnošću.
- (3) Fizičko lice ima opravdan razlog za nabavljanje lovačkog oružja ukoliko je član lovačke organizacije i ukoliko ima položen lovački ispit, što dokazuje uvjerenjem o članstvu u lovačkom društvu i uvjerenjem o položenom lovačkom ispitu. Odobrenje za nabavljanje lovačkog oružja može se izdati i sportskim streljačkim organizacijama i njenim članovima radi bavljenja streljačkim sportom.
- (4) U slučaju prestanka članstva u lovačkoj organizaciji, ista je dužna u roku od 60 dana od dana prestanka članstva dostaviti nadležnoj policijskoj upravi obavijest o prestanku članstva.
- (5) Izuzetno od st. (2) i (3) ovog člana fizičko lice ima opravdani razlog za nabavljanje oružja ukoliko je:
 - a) neophodno radi zaštite imovine (stada, usjeva i sl.);
 - b) oružje stečeno na osnovu naslijeđa.
- (6) Fizičko lice ima opravdan razlog za nabavljanje sportskog oružja ukoliko je član sportske streljačke organizacije i aktivno se bavi sportskim streljaštvom, što dokazuje uvjerenjem sportske streljačke organizacije.
- (7) U slučaju prestanka članstva u sportskoj streljačkoj organizaciji, ista je dužna u roku od 60 dana od dana prestanka članstva dostaviti nadležnoj policijskoj upravi obavijest o prestanku članstva za sportsko oružje.
- (8) Fizičko lice ima opravdani razlog za nabavljanje oružja u svrhu kolekcionarstva ukoliko posjeduje kolekcionarsku dozvolu iz člana 33. ovog zakona.
- (9) Ispunjavanje uslova iz člana 11. stav (4) tačka b) ovog zakona utvrđuje se na osnovu uvida u ličnu kartu ili putnu ispravu podnosioca zahtjeva. Nadležni organ ovlašten je provjeravati navedene podatke u elektronskoj evidenciji civilnog registra.
- (10) Ispunjavanje uslova iz člana 11. stav (4) tač. c), d) i e) ovog zakona, po službenoj dužnosti, utvrđuje nadležna policijska uprava na osnovu izvršenih provjera kod nadležnih sudova u

- mjestu prebivališta i organa nadležnog za vođenje kaznenih i prekršajnih evidencija, a nakon toga, ukoliko iz objektivnih i opravdanih razloga to nije u mogućnosti izvršiti, nadležna policijska uprava podnosioca zahtjeva upućuje da tražene podatke dostavi lično.
- (11) Ispunjavanje uslova iz člana 11. stav (4) tač. a) i f) ovog zakona utvrđuje nadležna policijska uprava.

Član 13.

(Postupak utvrđivanja opravdanog razloga za nabavljanje oružja i drugih okolnosti)

- (1) Prilikom provjere ispunjavanja uslova iz člana 11. stav (4) tač. a) i f) ovog zakona, policijski službenik je ovlašten tražiti i prikupljati podatke i informacije o podnosiocu zahtjeva za nabavljanje oružja od građana, nadležnih organa, ustanova i institucija, o čemu sačinjava službenu zabilješku.
- (2) Pored podataka iz stava (1) ovog člana, koje je ovlašten tražiti i prikupljati policijski službenik i nadležna policijska uprava je ovlaštena tražiti i prikupljati podatke i informacije od nadležnih organa, ustanova i institucija koji raspolažu traženim podacima.

Član 14.

(Utvrdivanje zdravstvene sposobnosti)

- (1) Ispunjavanje uslova iz člana 11. stav (5) tačka a) ovog zakona dokazuje se uvjerenjem o zdravstvenoj sposobnosti za držanje i nošenje oružja izdatog od strane ovlaštene zdravstvene ustanove, koje ne može biti starije od tri mjeseca od dana izdavanja.
- (2) Lice kojem je izdata isprava o oružju, obavezno je svakih pet godina pristupiti zdravstvenom pregledu radi utvrđivanja zdravstvene sposobnosti za držanje i nošenje oružja.
- (3) Lica iz člana 21. stav (1) tačka b) ovog zakona obavezna su svakih pet godina pristupiti zdravstvenom pregledu radi utvrđivanja zdravstvene sposobnosti za držanje i nošenje oružja.
- (4) Lica iz st. (2) i (3) ovog člana obavezna su u roku od 60 dana od dana isteka roka iz stava (2) ovog člana dostaviti nadležnoj policijskoj upravi uvjerenje iz stava (1) ovog člana.
- (5) Nadležna policijska uprava 30 dana prije isteka roka iz stava (2) ovog člana, a nakon uspostavljanja elektronske evidencije propisane podzakonskim propisom, pismeno obavještava lice kojem je izdata isprava o oružju o obavezi dostavljanja ljekarskog uvjerenja.

Član 15.

(Promjena zdravstvene sposobnosti)

- (1) Zdravstvena ustanova, kao i svako lice koje ima saznanja o promjeni zdravstvenog stanja imaoca oružja, a koje može uticati na sposobnost za držanje i nošenje oružja, dužni su odmah po saznanju za takvu promjenu obavijestiti policijsku upravu ili najbližu policijsku stanicu.
- (2) Nadležna policijska uprava rješenjem upućuje imaoca oružja, za kojeg se opravdano sumnja da nije zdravstveno sposoban za držanje i nošenje oružja, na vanredni zdravstveni pregled kod ovlaštene zdravstvene ustanove.
- (3) Imalac oružja iz stava (2) ovog člana obavezan je da u roku od 15 dana od dana prijema rješenja o upućivanju na vanredni zdravstveni pregled, dostavi nadležnoj policijskoj upravi uvjerenje o zdravstvenoj sposobnosti.
- (4) Troškove zdravstvenog pregleda imaoca oružja iz stava (2) ovog člana koji je proglašen zdravstveno sposobnim za držanje i nošenje oružja snosi Uprava policije.
- (5) Troškove zdravstvenog pregleda imaoca oružja iz stava (2) ovog člana koji je proglašen zdravstveno nesposobnim za držanje i nošenje oružja snosi imalac oružja.

Član 16.

(Donošenje propisa o utvrđivanju zdravstvene sposobnosti za držanje i nošenje oružja)

Bliže uslove koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost za držanje i nošenje oružja, način i postupak obavljanja redovnih i vanrednih zdravstvenih pregleda, popis bolesti i zdravstvenih stanja koja lice čine nepodobnim za držanje i nošenje oružja, način vođenja evidencije i medicinske dokumentacije, razmjena podataka o izdatim ljekarskim uvjerenjima i promjenama u pogledu zdravstvene sposobnosti imaoća oružja, sadržaj uvjerenja o izvršenom zdravstvenom pregledu, naknade u vezi s utvrđivanjem zdravstvene sposobnosti, te druga pitanja od značaja za utvrđivanje zdravstvene sposobnosti, se uređuju podzakonskim propisom koji donosi ministar zdravstva Kantona Sarajevo u saradnji sa Ministarstvom unutrašnjih poslova Kantona Sarajevo (u daljnjem tekstu: Ministarstvo).

Član 17.

(Poznavanje propisa koji se odnose na držanje, čuvanje i nošenje oružja i tehničkih znanja)

- (1) Obuku o poznavanju propisa i tehničkih znanja koja se odnose na držanje, čuvanje i nošenje oružja iz člana 11. stav (5) tačka b) ovog zakona vrši stručna ovlaštena organizacija koja ima registrovano sjedište na području Kantona Sarajevo i ispunjava propisane uslove za provođenje obuke i posjeduje odobrenje nadležnog ministarstva.
- (2) Nakon provedene obuke iz stava (1) ovog člana, ispit o poznavanju propisa i usvojenim tehničkim znanjima koji se odnose na držanje, čuvanje i nošenje oružja, provodi komisija Uprave policije u sastavu od dva policijska službenika, jednog državnog službenika, sekretara komisije i njihovih zamjenika, koju na prijedlog policijskog komesara formira ministar.
- (3) Izuzetno od odredbe stava (1) ovog člana, lica koja obavljaju ili su obavljali poslove policijskog službenika, službenika sudske policije, službenika straže kazneno-popravnih ustanova, zaposlenika Obavještajno-sigurnosne agencije Bosne i Hercegovine koji je od iste ovlašten za nošenje oružja, lica koja su certificirana za obavljanje poslova fizičke zaštite ili odgovorno lice, profesionalna vojna lica, rezervne vojne starješine, lica koja imaju ili su imala registrovano vatreno oružje iste kategorije ili vrste, oslobođena su obuke o poznavanju propisa i tehničkih znanja, koja se odnose na držanje, čuvanje i nošenje oružja, a lica koja su bila pripadnici oružanih snaga u periodu 1992-1995 godina, kao i lica koja su kroz školovanje i druge vidove obuke osposobljena za poznavanje tehničkih znanja, oslobođena su obuke o tehničkim znanjima, koja se odnose na držanje, čuvanje i nošenje oružja, što dokazuju odgovarajućom ispravom nadležnog organa.
- (4) Način i program osposobljavanja i druga pitanja koja se odnose na obuku o poznavanju propisa i tehničkih znanja koji se odnose na držanje, čuvanje i nošenje oružja, način rada stručne ovlaštene organizacije iz stava (1) ovog člana, kao i način rada i naknada za rad komisije iz stava (2) ovog člana utvrđuje se podzakonskim propisom, koji na prijedlog policijskog komesara donosi ministar.

Član 18.

(Rok za dostavljanje dokaza o ispunjavanju posebnih uslova koji se odnose na nabavljanje oružja)

- (1) Od podnosioca zahtjeva koji ispunjava opće uslove iz člana 11. stav (4) ovog zakona, nadležna policijska uprava će zatražiti da u roku od 60 dana dostavi dokaze o ispunjavanju posebnih uslova iz člana 11. stav (5) tač. a) i b) ovog zakona, dok za tačku c) podnosilac

- zahtjev uz zahtjev dostavlja ovjerenu izjavu o ispunjavanju uslova za smještaj i čuvanje oružja.
- (2) Izuzetno od odredbe stava (1) ovog člana, ukoliko podnosilac zahtjeva za izdavanje odobrenja za nabavljanje oružja iz opravdanih razloga (bolest, duže odsustvo iz zemlje i sl.) nije bio u mogućnosti u roku dostaviti dokaze o ispunjavanju posebnih uslova, nadležna policijska uprava cijeni razloge nedostavljanja i u skladu sa tim donosi odgovarajuću odluku.
 - (3) Način smještaja i čuvanja oružja i municije utvrđuje se podzakonskim propisom iz člana 21. stav (7) ovog zakona.

Član 19.

(Odobrenje za nabavljanje oružja fizičkom licu)

- (1) Nadležna policijska uprava donosi rješenje kojim se odobrava nabavljanje oružja kategorije A1 i/ili B fizičkom licu koje ispunjava uslove iz člana 11. ovog zakona.
- (2) Rješenje kojim je odobreno nabavljanje oružja iz stava (1) ovog člana važi šest mjeseci od dana prijema rješenja.
- (3) Fizičko lice kojem je izdato rješenje iz stava (1) ovog člana, a oružje nije nabavilo u roku iz stava (2) ovog člana, dužno je vratiti rješenje u roku od osam dana od dana isteka roka važenja nadležnoj policijskoj upravi koja je donijela rješenje.

Član 20.

(Odbijanje zahtjeva fizičkog lica za izdavanje odobrenja za nabavljanje oružja)

- (1) Rješenje kojim se odbija zahtjev za izdavanje odobrenja za nabavljanje oružja kategorije A1 i/ili B sadrži razloge odbijanja, osim ukoliko bi to bilo u suprotnosti sa odredbama zakona kojima je regulisan krivični postupak.
- (2) U obrazloženju rješenja kojim se odbija zahtjev za izdavanje odobrenja za nabavljanje oružja kategorije A1 i/ili B fizičkom licu, zbog okolnosti iz člana 11. stav (4) tačka f) ovog zakona, nadležna policijska uprava nije obavezna navoditi načine utvrđivanja i pribavljanja podataka kojima se rukovodila kod donošenja rješenja, a ukoliko se zahtjev odbija zbog kriminalističko-obavještajnih razloga ili zbog razloga koji ukazuju na povezanost sa licima iz kriminalističko-obavještajne evidencije, neće posebno obrazlagati utvrđeno činjenično stanje.
- (3) Protiv rješenja iz stava (1) ovog člana može se izjaviti žalba policijskom komesaru u roku od 15 dana od dana prijema rješenja.
- (4) Protiv rješenja donesenog po žalbi ne može se voditi upravni spor.
- (5) Nadležna policijska uprava postupa na način propisan u st. (1) i (2) ovog člana i u postupku oduzimanja oružja iz člana 51. ovog zakona.

Član 21.

(Uslovi za izdavanje odobrenja za nabavljanje oružja za pravna lica i obrtnike)

- (1) Nadležna policijska uprava izdat će pravnom licu i obrtniku odobrenje za nabavljanje oružja kategorije A, A1 i/ili B, ukoliko ispunjava sljedeće uslove:
 - a) da ima opravdan razlog za nabavljanje oružja;
 - b) da odgovorno lice i lice zaduženo za sigurnost u pravnom licu, odnosno obrtnik ispunjava opće i posebne uslove iz člana 11. ovog zakona izuzev uslova iz stava (4) tačka a) koji se odnosi na opravdani razlog za nabavljanje oružja;
 - c) da pravno lice, odnosno obrtnik ispunjava uslove za siguran smještaj i čuvanje oružja;
 - d) da pravno lice odnosno obrtnik nije pravosnažno kažnjeno po odredbama zakona kojim se uređuje oblast oružja.

- (2) Opravdan razlog za nabavljanje oružja kategorije A ima pravno lice i obrtnik kada je to potrebno za obrazovne, istraživačke, historijske ili kulturne svrhe, uključujući film i pozorište, poslove osposobljavanja lica za poznavanje propisa koji se odnose na držanje, čuvanje i nošenje oružja i tehnička znanja za rukovanje oružjem, kao i za prevoz, čuvanje izuzetno opasnih ili visokovrijednih transporta ili čuvanje infrastrukture od vitalnog značaja i osjetljivih prostora.
- (3) Opravdan razlog za nabavljanje oružja kategorije A1 ima pravno lice i obrtnik koji je registrovan kod nadležnog organa za obavljanje djelatnosti: sportskog streljaštva, civilnih strelišta, osposobljavanja lica za poznavanje propisa koji se odnose na držanje, čuvanje i nošenje oružja i tehnička znanja za pravilno rukovanje oružjem, naučno-tehničkog istraživanja za koje je potrebno oružje, muzejskih eksponata, popravljanja, modifikacije ili prepravljanja oružja, onesposobljavanja oružja, ispitivanja oružja, proizvodnje oružja i vještačenja.
- (4) Opravdani razlog za nabavljanje oružja kategorije B ima pravno lice i obrtnik koji ima organizovanu unutrašnju službu zaštite u skladu sa važećim propisima ili koje je registrovano kod nadležnog organa za obavljanje djelatnosti: lova, uzgoja divljači, sportskog ili rekreativnog streljaštva, civilnih strelišta, poslova obezbjeđenja lica i imovine, osposobljavanja lica za poznavanje propisa koji se odnose na držanje, čuvanje i nošenje oružja i tehnička znanja za rukovanje oružjem, naučno-tehničkog istraživanja za koje je potrebno oružje, snimanja filmskih i prikazivanja pozorišnih predstava, muzejskih eksponata, popravljanja, modifikacije ili prepravljanja oružja, onesposobljavanja oružja, ispitivanja oružja, proizvodnje, vještačenja, rastjerivanja ptica i divljači radi sigurnosti aerodroma i sl.
- (5) Pravnim licima koja postupaju u skladu sa odredbama propisa koji uređuju oblast agencija i unutrašnjih službi za zaštitu ljudi i imovine, nadležna policijska uprava može izdati odobrenje za nabavljanje i držanje oružja uz prethodnu saglasnost Federalnog ministarstva unutrašnjih poslova.
- (6) Komisija iz člana 11. stav (10) ovog zakona cijeni ispunjavanje i opravdanost zahtjeva za dobijanje odobrenja za nabavljanje oružja za pravna lica i obrtnike, a u skladu sa odredbama propisa iz člana 11. stav (11) ovog zakona.
- (7) Način smještaja i čuvanja oružja i municije, utvrđuje se podzakonskim propisom koji na prijedlog policijskog komesara donosi ministar.

Član 22.

(Povjeravanje oružja u pravnom licu i kod obrtnika)

- (1) Pravna lica i obrtnici, koji drže oružje na osnovu člana 31. ovog zakona, mogu povjeriti oružje samo licima koja ispunjavaju uslove iz člana 11. ovog zakona.
- (2) Lice iz stava (1) ovog člana kojem je oružje povjereno može ga koristiti samo za vrijeme obavljanja poslova osiguranja objekta i prostora koji se štiti, transporta koji se obezbjeđuje, te za vrijeme vršenja fizičke zaštite lica, a u vremenskom periodu dok se oružje ne koristi čuva se na bezbjednom mjestu tako da pristup tom oružju ne mogu imati neovlaštena lica.
- (3) Pravna lica i obrtnici iz stava (1) ovog člana izdaju posebnu potvrdu licu kome povjeravaju oružje i o tome su dužni obavijestiti nadležnu policijsku upravu.

Član 23.

(Odobrenje za nabavljanje oružja pravnom licu i obrtniku)

- (1) Nadležna policijska uprava rješenjem odobrava nabavljanje oružja kategorije A, A1 i/ili B pravnom licu i obrtniku ukoliko ispunjava uslove iz člana 21. stav (1) ovog zakona.
- (2) Rješenje kojim je odobreno nabavljanje oružja iz stava (1) ovog člana važi šest mjeseci od dana prijema rješenja.

- (3) Pravno lice i obrtnik iz stava (1) ovog člana kojem je rješenjem odobreno nabavljanje, a oružje nije nabavio u roku iz stava (2) ovog člana, dužno je nadležnoj policijskoj upravi isto vratiti u roku od osam dana od dana isteka roka važenja.
- (4) Nadležna policijska uprava, ukoliko pravno lice i obrtnik ne ispunjavaju uslove iz člana 21. stav (1) ovog zakona, donosi rješenje kojim se odbija zahtjev za izdavanje odobrenja za nabavljanje oružja kategorije A, A1 i/ili B.
- (5) Protiv rješenja iz st. (1) i (4) ovog člana može se izjaviti žalba policijskom komesaru u roku od 15 dana od dana prijema rješenja.
- (6) Protiv rješenja donesenog po žalbi ne može se voditi upravni spor.

Član 24.

(Nabavljanje bitnih dijelova oružja)

- (1) Vlasnik oružja može nabavljati bitne dijelove oružja na osnovu rješenja kojim se odobrava nabavljanje bitnih dijelova oružja, uz obavezu prijave nadležnoj policijskoj upravi u roku od osam dana od dana nabavljanja.
- (2) Podaci o nabavljenim dijelovima unose se u propisane isprave o oružju i evidenciju.
- (3) Rješenje kojim je odobreno nabavljanje bitnih dijelova oružja iz stava (1) ovog člana važi šest mjeseci od dana prijema rješenja.
- (4) Vlasnik oružja kojem je izdato rješenje iz stava (1) ovog člana, a bitne dijelove oružja nije nabavio u roku iz stava (3) ovog člana, dužan je vratiti rješenje u roku od osam dana od dana isteka roka važenja nadležnoj policijskoj upravi koja je izdala rješenje.

Član 25.

(Nabavljanje municije)

- (1) Fizička lica, pravna lica i obrtnici mogu nabaviti municiju samo za ono oružje za koje imaju izdat oružni list, odnosno odobrenje za držanje oružja, izuzev civilnih strelišta i sportskih streljačkih organizacija koji mogu nabavljati različitu municiju za svoje potrebe i potrebe obuke.
- (2) Fizička lica, pravna lica i obrtnici dužni su da, u roku od osam dana od dana nabavljanja municije, obavijeste nadležnu policijsku upravu, izuzev ukoliko su municiju nabavili na području Kantona Sarajevo.

Član 26.

(Spravljanje municije)

- (1) Članovi sportske streljačke organizacije, članovi lovačke organizacije, sportske streljačke i lovačke organizacije mogu spravljati municiju za svoje registrovano oružje na osnovu odobrenja za spravljanje municije koje izdaje nadležna policijska uprava.
- (2) Spravljanje municije za registrovano oružje ne smatra se proizvodnjom municije.
- (3) Odobrenje iz stava (1) ovog člana izdaje se fizičkom licu koje ispuni sljedeće uslove:
 - a) da je član sportske streljačke organizacije ili član lovačke organizacije;
 - b) da je osposobljeno za rukovanje municijom ili eksplozivnim materijama, o čemu je dokaz izdat od ovlaštenog pravnog lica;
 - c) da obezbjedi sigurno čuvanje baruta i inicijalnih kapisli na način da nisu dostupni fizičkom licu koje nije ovlašteno posjedovati ih a naročito djeci, koji su zaključani i odvojeni u metalnom ormaru, sefu ili sličnom spremištu koje se ne može otvoriti sredstvom uobičajene upotrebe, što utvrđuje komisija iz člana 11. stav (10) ovog zakona.
- (4) Odobrenje iz stava (1) ovog člana izdaje se sportskim streljačkim i lovačkim organizacijama koje ispune sljedeće uslove:
 - a) da su registrovani kao sportske streljačke ili lovačke organizacije;

- b) da imaju registrovane članove, odnosno lovce;
 - c) da je lice koje je angažovano od strane sportske streljačke ili lovačke organizacije osposobljeno za rukovanje municijom ili eksplozivnim materijama o čemu je dokaz izdat od ovlaštenog pravnog lica;
 - d) da obezbjede sigurno čuvanje baruta i inicijalnih kapisli na način da nisu dostupni fizičkom licu koje nije ovlašteno posjedovati ih a naročito djeci, koji su zaključani i odvojeni u metalnom ormaru, sefu ili sličnom spremištu koje se ne može otvoriti sredstvom uobičajene upotrebe, što utvrđuje komisija iz člana 11. stav (10) ovog zakona.
- (5) Prilikom spravljanja municije za vlastite potrebe lica iz stava (1) ovoga člana dužna su voditi brigu o sigurnosti drugih lica i imovine kako ih ne bi ugrozili.
 - (6) Lica iz stava (1) ovog člana ne smiju posjedovati više od 2.000 grama baruta i 5.000 komada inicijalnih kapisli.
 - (7) Komisija iz člana 11. stav (10) ovog zakona cijeni ispunjavanje uslova i opravdanost zahtjeva iz st. (3) i (4) ovog člana za dobijanje odobrenja za spravljanje municije, a u skladu sa odredbama propisa iz člana 11. stav (11) ovog zakona.
 - (8) Municiju iz stava (1) ovog člana zabranjeno je stavljati u promet.
 - (9) Za nabavljanje opreme za spravljanje municije nije potrebno odobrenje nadležne policijske uprave.
 - (10) Odobrenje za spravljanje municije se ukida i zabranjuje se daljnje spravljanje municije licima iz stava (1) ovog člana ukoliko prestanu ispunjavati uslove iz st. (3) i (4) ovog člana.

Član 27.

(Nabavljanje baruta i inicijalnih kapisli u svrhu spravljanja municije)

- (1) Pravna i fizička lica iz člana 26. stav (1) ovog zakona mogu nabavljati barut i inicijalne kapisle u svrhu spravljanja municije samo na osnovu rješenja nadležne policijske uprave o spravljanju municije.
- (2) Fizička i pravna lica dužna su da u roku od osam dana od dana nabavljanja baruta i inicijalnih kapisli obavijeste nadležnu policijsku upravu, osim ukoliko su barut i inicijalne kapisle nabavili na području Kantona Sarajevo.

Član 28.

(Oduzimanje odobrenja za nabavljanje oružja)

- (1) Odobrenje za nabavljanje oružja kategorije A1 i/ili B oduzima se fizičkom licu ako nakon izdavanja odobrenja nastupi neki od slučajeva koji bi bio u suprotnosti sa uslovima propisanim u članu 11. st. (4) tač. a), c), d), e) i f), (5) tačka a) i (6) tač. b) i c) ovog zakona.
- (2) Odobrenje za nabavljanje oružja kategorije A, A1 i/ili B oduzima se pravnom licu i obrtniku ako nakon izdavanja odobrenja nastupi neki od slučajeva koji bi bio u suprotnosti sa uslovima propisanim u članu 21. stav (1) ovog zakona.
- (3) O oduzimanju odobrenja iz st. (1) i (2) ovog člana nadležna policijska uprava donosi rješenje protiv kojeg se može izjaviti žalba policijskom komesaru u roku od 15 dana od dana prijema rješenja.
- (4) Protiv rješenja donesenog po žalbi ne može se voditi upravni spor.

Član 29.

(Registracija oružja)

- (1) Fizičko lice kome je izdato odobrenje za nabavljanje oružja iz člana 19. stav (1) ovog zakona, nadležnoj policijskoj upravi podnosi pismeni zahtjev za registraciju oružja i izdavanje oružnog lista u roku od osam dana od dana nabavljanja oružja.
- (2) Pravno lice i obrtnik kome je izdato odobrenje za nabavljanje oružja iz člana 23. stav (1) ovog zakona, nadležnoj policijskoj upravi podnosi pismeni zahtjev za registraciju oružja i

- izdavanje odobrenja za držanje oružja, u roku od osam dana od dana nabavljanja oružja i dužno je voditi evidenciju o nabavljenom oružju.
- (3) Za oružje nabavljeno na osnovu odobrenja, nadležna policijska uprava fizičkom licu izdaje oružni list za držanje i nošenje oružja, a pravnom licu i obrtniku izdaje odobrenje za držanje oružja.
 - (4) Fizičkom licu, koje je naslijedilo oružje na osnovu pravosnažnog rješenja o nasljeđivanju i kome je izdato odobrenje za nabavljanje oružja, a koje ne ispunjava uslove iz člana 11. stav (4) tačka a) i člana 12. st. (3) i (6) ovog zakona, prilikom registracije izdaje se odobrenje za držanje oružja.
 - (5) Nadležna policijska uprava neće izdati oružni list i odobrenje za držanje oružja:
 - a) za oružje za koje se ne može dokazati porijeklo;
 - b) za oružje koje prije stavljanja u promet nije označeno žigom ili ako je oštećen ili uništen fabrički broj ili koje nije tehnički ispravno ili koje nije obilježeno u skladu sa posebnim propisom;
 - c) ako nakon izvršene nabavke oružja nastupi neki od slučajeva koji bi bio u suprotnosti sa uslovima propisanim u članu 11. st. (4) tač. a), c), d), e) i f), (5) tačka a), (6) tač. b) i c) i (12), odnosno u članu 21. stav (1) ovog zakona.
 - (6) U slučaju iz stava (5) tač. a) i b) ovog člana nadležna policijska uprava donosi rješenje kojim odbija zahtjev iz st. (1) i (2) ovog člana i oduzima oružje i odobrenje za nabavljanje oružja bez prava na naknadu.
 - (7) U slučaju iz stava (5) tačka c) ovog člana nadležna policijska uprava donosi rješenje kojim odbija zahtjev iz st. (1) i (2) ovog člana i po pravosnažnosti rješenja o odbijanju zahtjeva postupa u skladu sa članom 56. stav (1) ovog zakona.
 - (8) Protiv rješenja o odbijanju zahtjeva za izdavanje oružnog lista, odnosno odobrenja za držanje oružja može se podnijeti žalba policijskom komesaru u roku od 15 dana od dana prijema rješenja.
 - (9) Protiv rješenja donesenog po žalbi ne može se voditi upravni spor.
 - (10) Kada se u postupku registracije utvrdi da je oružje tehnički neispravno i da ga nije moguće osposobiti za sigurnu upotrebu, a vlasnik ga odbija onesposobiti, isto se oduzima rješenjem bez prava na naknadu i dostavlja komisiji iz člana 57. ovog zakona radi uništenja.

Član 30.

(Zamjena oružja i prenos prava vlasništva)

- (1) Fizička lica međusobno mogu zamijeniti registrovano oružje iste vrste.
- (2) Zamjenu oružja fizičko lice, pravno lice i obrtnik može izvršiti kod trgovca oružjem za registrovano oružje iste vrste.
- (3) Fizičko lice, pravno lice i obrtnik iz st. (1) i (2) ovog člana dužni su da u roku od osam dana od dana zamjene oružja o tome obavijeste nadležnu policijsku upravu, predaju oružni list, odnosno odobrenje za držanje oružja i podnesu zahtjev za izdavanje oružnog lista, odnosno odobrenja za držanje oružja.
- (4) Fizička lica, pravna lica i obrtnici kojima je izdat oružni list, odnosno odobrenje za držanje oružja, ne mogu prenijeti pravo vlasništva na vatreno oružje drugim fizičkim licima, pravnim licima i obrtnicima koja nemaju odobrenje za nabavku te vrste oružja, izuzev pravnih lica iz člana 62. ovog zakona.
- (5) Vlasnik vatrenog oružja koji je prenio svoje pravo vlasništva nad vatrenim oružjem dužan je odmah, a najkasnije u roku od osam dana, predati nadležnoj policijskoj upravi oružni list, odnosno odobrenje za držanje oružja i priložiti primjerak ugovora i odobrenja za nabavku oružja izdatog fizičkom licu, odnosno pravnom licu i obrtniku na koje se prenosi pravo vlasništva, odnosno rješenje o obavljanju djelatnosti pravnog lica iz člana 62. ovog zakona.

- (6) Fizička lica, pravna lica i obrtnici kojima je izdat oružni list, odnosno odobrenje za držanje oružja mogu, uz ispunjavanje obaveza iz stava (5) ovog člana, prenijeti pravo vlasništva nad vatrenim oružjem pravnim licima i obrtnicima iz člana 62. ovog zakona, nakon čega su obje strane u postupku dužne u roku od osam dana obavijestiti nadležnu policijsku upravu o izvršenom prenosu prava vlasništva.

Član 31.

(Izdavanje odobrenja za držanje oružja)

- (1) Odobrenje za držanje oružja izdaje se pravnom licu i obrtniku na neodređeno vrijeme.
- (2) Pravno lice i obrtnik kod kojeg je iz bilo kojih razloga prestala potreba za daljnjim držanjem oružja i municije u roku od 15 dana o tome obavještava nadležnu policijsku upravu.
- (3) Nadležna policijska uprava preuzima oružje i preostalu municiju i postupa u skladu sa članom 56. ovog zakona.
- (4) Nadležni streljački savez Kantona Sarajevo preuzima oružje od sportske streljačke organizacije koja je prestala sa radom, te ga distribuira drugim sportskim streljačkim organizacijama koje su registrovane na području Kantona Sarajevo.
- (5) Nadležni lovački savez Kantona Sarajevo preuzima oružje od lovačke organizacije koja je prestala sa radom, te ga distribuira drugim lovačkim organizacijama koje su registrovane na području Kantona Sarajevo.

Član 32.

(Nabavka i držanje starog oružja)

- (1) Fizičko lice, pravno lice i obrtnik mogu, bez prethodnog odobrenja nadležne policijske uprave, nabaviti i držati najviše četiri komada starog oružja.
- (2) Lica iz stava (1) ovog člana obavezna su da u roku od osam dana od dana nabavljanja starog oružja nadležnoj policijskoj upravi prijave staro oružje.
- (3) Lice koje prijavljuje staro oružje, donosi oružje na uvid u nadležnu policijsku upravu i pored dokaza o porijeklu, prilaže i potvrdu o onesposobljenosti, izdatu od strane ovlaštene organizacije ili obrtnika.
- (4) Nadležna policijska uprava izdaje potvrdu o prijavi oružja.

Član 33.

(Odobrenje za sakupljanje starog oružja i kolekcionarstvo)

- (1) Nadležna policijska uprava izdaje odobrenje za sakupljanje starog oružja fizičkom licu, pravnom licu i obrtniku koji se bavi sakupljanjem starog oružja ili kolekcionarstvom, koji posjeduje najmanje četiri, odnosno devet komada za kolekcionare, registrovanog starog oružja i raspolaže prostornim i tehničkim uslovima za smještaj i čuvanje, kojima se obezbjeđuje da staro oružje ne dođe u posjed neovlaštenih lica i ne ugrozi bezbjednost ljudi i objekata.
- (2) Nadležna policijska uprava izdaje odobrenje za sakupljanje starog oružja ili kolekcionarstvo fizičkom licu koje ispunjava opće i posebne uslove iz člana 11. ovog zakona i stava (1) ovog člana.
- (3) Nadležna policijska uprava izdaje odobrenje za sakupljanje starog oružja ili kolekcionarstvo pravnom licu ili obrtniku koji ispunjava uslove iz člana 21. ovog zakona i stava (1) ovog člana.
- (4) Ispunjavanje uslova iz st. (2) i (3) ovog člana utvrđuje komisija nadležne policijske uprave iz člana 11. stav (10) ovog zakona.
- (5) Protiv rješenja kojim se odbija zahtjev za izdavanje odobrenja za sakupljanje starog oružja ili za kolekcionarstvo može se izjaviti žalba policijskom komesaru u roku od 15 dana od

dana uručenja rješenja.

- (6) Protiv rješenja donesenog po žalbi ne može se voditi upravni spor.
- (7) Staro oružje smije se prodati ili predati samo fizičkom licu, pravnom licu i obrtniku kojem je izdato odobrenje iz stava (1) ovog člana, osim kada su u pitanju slučajevi iz člana 32. ovog zakona.
- (8) Fizička lica, pravna lica i obrtnici dužni su o izvršenoj prodaji ili predaji starog oružja obavijestiti nadležnu policijsku upravu u roku od osam dana od dana nabavke, odnosno prodaje ili predaje.
- (9) Nadležna policijska uprava ukida odobrenje za sakupljanje starog oružja fizičkom licu, pravnom licu i obrtniku koji prestane ispunjavati neki od uslova potrebnih za izdavanje odobrenja.

Član 34.

(Oružje kategorije C sa obavezom prijavljivanja)

- (1) Fizičko lice starije od 18 godina, pravno lice i obrtnik mogu bez prethodnog odobrenja nadležne policijske uprave nabavljati i držati oružje kategorije C.
- (2) Lica iz stava (1) ovog člana obavezna su da u roku od osam dana od dana nabavljanja oružja nadležnoj policijskoj upravi prijave oružje.
- (3) Lice koje prijavljuje trofejno oružje, donosi oružje na uvid u nadležnu policijsku upravu i pored dokaza o porijeklu, prilaže i potvrdu o onesposobljenosti, izdatu od strane ovlaštene organizacije ili obrtnika.
- (4) Nadležna policijska uprava izdaje potvrdu o prijavi oružja.

Član 35.

(Oružje kategorije D bez obaveze prijavljivanja)

Fizička lica, pravna lica i obrtnici iz člana 7. stav (4) ovog zakona, mogu bez odobrenja i prijave nadležnoj policijskoj upravi nabavljati, držati i nositi oružje kategorije D.

DIO TREĆI - POSTUPANJE SA ORUŽJEM I MUNICIJOM

Član 36.

(Naročita pažnja u postupanju sa oružjem i municijom)

- (1) S oružjem i municijom mora se postupati sa naročitom pažnjom.
- (2) Naročita pažnja u postupanju sa oružjem i municijom ogleda se u njegovom pravilnom čuvanju, održavanju u ispravnom stanju, pravilnom, stručnom i pažljivom korištenju, nošenju, prenošenju i držanju u ispravnom stanju.

Član 37.

(Nošenje i prenošenje oružja i municije)

- (1) Oružje kategorije A, A1 i B se ne smije nositi bez oružnog lista, niti prenositi bez odobrenja za držanje oružja, izuzev u periodu od momenta nabavke do momenta registracije uz predodčen dokaz o odobrenju za nabavku i dokaza o vlasništvu oružja.
- (2) Fizičko lice koje nema prebivalište ili boravište na području Kantona Sarajevo, registrovano oružje smije nositi i prenositi u skladu sa članom 2. stav (4) ovog zakona.
- (3) Imalac oružja kategorije A, A1 i B dužan je na zahtjev policijskih službenika i drugih ovlaštenih službenih lica Uprave policije omogućiti uvid u to oružje i oružni list, odnosno drugu odgovarajuću ispravu nadležnog organa.
- (4) Fizičko lice ne smije nositi i prenositi oružje kada je pod uticajem alkohola, opojnih droga

- ili drugih omamljujućih sredstava, odnosno u takvom stanju da nije u mogućnosti shvatiti značenje svog postupanja, odnosno vladati svojom voljom.
- (5) Oružje na javnom mjestu se ne smije učiniti vidljivim drugim građanima, odnosno nositi na način kojim se može izazvati osjećanje ugroženosti, uznemirenosti ili negodovanje građana.
 - (6) Izvan lovišta ili strelišta, lovačko i sportsko oružje mora se držati, odnosno nositi u futroli ili namjenskom koferu odnosno torbi za oružje i ne smije biti napunjeno, čime se onemogućava njegova trenutna upotreba.
 - (7) Prilikom prenošenja, oružje ne smije biti napunjeno, municija je odvojena od oružja, bubanj ili ležište metka moraju biti prazni, prazan spremnik, a u slučaju punog spremnika isti mora biti izvan oružja, a municija ili spremnik sa municijom fizički ne smije dodirivati oružje i mora se nalaziti u odgovarajućim futrolama, kutijama ili koferima za prijenos oružja.
 - (8) Pripadnici agencija i unutrašnjih službi za zaštitu imovine i lica pri obavljanju poslova zaštite, oružje i municiju smiju nositi u skladu sa odredbama posebnih propisa.

Član 38.

(Zabrana nošenja oružja)

- (1) Zabranjeno je nošenje vatrenog i vazdušnog oružja na vjerskim, sportskim i drugim javnim okupljanjima, u obrazovnim, zdravstvenim i drugim javnim ustanovama, u prostorijama državnih organa i institucija, ugostiteljskim objektima i prostorima koji se koriste za pružanje ugostiteljskih usluga, u objektima gdje se priređuju igre na sreću kao i svim drugim objektima na kojima je istaknuta zabrana unošenja vatrenog i vazdušnog oružja.
- (2) Zabranjeno je nositi hladno oružje na mjestima iz stava (1) ovog člana, kao i na drugim javnim mjestima.
- (3) Građani su dužni pridržavati se pravila javno istaknutih zabrana o unošenju oružja i municije u određene prostore ili prostorije.
- (4) Zabranjena je upotreba oružja na javnim i drugim mjestima na kojima se može ugroziti sigurnost ljudi i imovine, narušiti javni red i mir ili izazvati osjećaj ugroženosti ili uznemirenosti građana.
- (5) Lovačko oružje se ne smije upotrebljavati suprotno odredbama propisa o lovstvu i izvan lovišta, vježbališta ili civilnih strelišta.
- (6) Sportsko oružje se ne smije upotrebljavati izvan civilnih strelišta.
- (7) Izuzetno od odredbe stava (6) ovog člana, vazdušno oružje i oružje sa tetivom se smiju upotrebljavati i na mjestima koja su po svom položaju ili po preduzetim mjerama osiguranja takva da se ne može ugroziti sigurnost građana.
- (8) Sportsko oružje mogu koristiti i djeca starija od 11 godina koji su članovi sportskih streljačkih organizacija na civilnim strelištima, pod nadzorom trenera koji ispunjava opće i posebne uslove iz člana 11. ovog zakona i uslove propisane posebnim propisom o sportu uz pismenu saglasnost i prisustvo roditelja, usvojitelja ili staratelja.
- (9) Oružje je zabranjeno davati bilo kome, osim u skladu sa odredbama ovog zakona.
- (10) Zabranjena je upotreba i nošenje starog oružja, izuzev kada se isto koristi za umjetničke, kulturne i druge slične priredbe ili čini sastavni dio narodne nošnje, kao i nabavljanje, držanje i pravljenje municije za to oružje.
- (11) Zabranjeno je nošenje startnog pištolja i revolvera odnosno oružja za uzbunjivanje i signalizaciju, osim na sportskim i lovačkim manifestacijama.
- (12) Zabranjeno je nošenje trofejnog oružja, kao i nabavljanje, držanje i pravljenje municije za to oružje.
- (13) Zabranjeno je popravljavanje, modifikacija ili prepravljavanje starog, trofejnog, vazdušnog, gasnog odnosno plinskog oružja, oružja za uzbunjivanje i signalizaciju, airsoft i paintball

naprava i reprodukcija oružja, za ispaljivanje bojeve municije, kao i svakog drugog oružja, osim oružja za koje je izdata važeća isprava o oružju.

- (14) Zabranjeno je držanje i nošenje popravljenog, modifikovanog ili prepravljenog oružja iz stava (12) ovog člana.

Član 39.

(Upotreba električnih paralizatora i sprejeva za omamljivanje)

Električni paralizatori kategorije C i D i sprejevi za omamljivanje mogu se upotrebljavati samo za samoodbranu prema napadaču i na način da se time ne ugrožava bezbjednost drugih lica.

Član 40.

(Davanje vatrenog oružja na posluhu)

- (1) Zabranjeno je davanje vatrenog oružja na posluhu drugom fizičkom licu, pravnom licu i obrtniku.
- (2) Izuzetno od odredbe stava (1) ovog člana, lovačko i sportsko vatreno oružje, može se davati na posluhu fizičkom licu koje ima oružni list za tu vrstu oružja.

Član 41.

(Davanje na posluhu lovačkog oružja)

- (1) Pravna lica koja upravljaju lovištem mogu, uz potvrdu, davati lovačko oružje i municiju na posluhu članovima domaćih i inostranih lovačkih organizacija koji, po propisima o lovstvu, imaju pravo na lov.
- (2) Potvrda kojom se dozvoljava posluga lovačkog oružja i municije, pored ostalih podataka, mora sadržavati podatke o vremenu za koje važi i rok u kojem se lovačko oružje i municija moraju vratiti, o čemu se vodi evidencija.
- (3) Lice kojem je dato lovačko oružje i municija na posluhu prema odredbi stava (1) ovog člana, mora pravnom licu koje upravlja lovištem vratiti oružje i neutrošenu količinu municije dobijenu na posluhu u određenom roku i ne smije iznositi oružje i municiju izvan lovišta.

Član 42.

(Davanje na posluhu sportskog oružja)

- (1) Sportske streljačke organizacije mogu davati na posluhu sportsko oružje i municiju svojim članovima za vrijeme vježbi gađanja ili takmičenja u gađanju na civilnom strelištu.
- (2) Članovi sportskih streljačkih organizacija koji koriste sportsko oružje organizacije čiji su članovi, za prenošenje takvog oružja i pripadajuće municije moraju imati važeći oružni list za tu vrstu i kategoriju oružja, kopiju izdatog odobrenja za držanje oružja i potvrdu sportske streljačke organizacije.

Član 43.

(Čuvanje oružja i municije)

- (1) Oružje i municija moraju se čuvati tako da nisu dostupni fizičkom licu koje nije ovlašteno posjedovati ga, a naročito djeci, zaključani i odvojeni u metalnom ormaru, sefu ili sličnom spremištu koje se ne može otvoriti alatom uobičajene upotrebe.
- (2) Oružje i municija moraju se čuvati u stambenom ili drugom odgovarajućem prostoru koji se nalaze u mjestu prebivališta, odnosno sjedišta vlasnika ili korisnika oružja i municije.
- (3) Vlasnik oružja, kojem je od strane nadležne policijske uprave izdat oružni list, koji napušta mjesto prebivališta na vrijeme duže od godinu dana, a oružje i municiju ne nosi sa sobom, dužan je predati isto na čuvanje fizičkom licu koje ima oružni list za istu vrstu oružja, ovlaštenom trgovcu oružjem ili sportskoj streljačkoj organizaciji.
- (4) Vlasnik oružja i municije dužan je u slučaju iz stava (3) ovog člana, o predaji oružja i

municije na čuvanje pismeno obavijestiti nadležnu policijsku upravu u roku od osam dana od dana predaje.

- (5) Pravna lica i obrtnici, sportske streljačke organizacije i organizacije koje upravljaju lovištem koja drže oružje i municiju na osnovu ovog zakona, dužni su da oružje i municiju drže i čuvaju u skladu sa odredbama ovog zakona i drugih propisa koji uređuju predmetnu oblast.

Član 44.

(Postupanje u slučaju gubitka ili krađe oružja i isprava o oružju)

- (1) Fizička lica, odnosno pravna lica i obrtnici koji drže i nose registrovano oružje i oružje koje je nabavljeno na osnovu odobrenja za nabavljanje oružja, a nije registrovano u roku iz člana 29. stav (1), odnosno stav (2) ovog zakona, dužni su prijaviti gubitak ili krađu oružja i municije odmah, a najkasnije u roku od 24 sata od momenta saznanja.
- (2) Fizička lica, pravna lica i obrtnici dužni su prijaviti gubitak ili krađu oružnog lista, odobrenja za držanje oružja i odobrenja za nabavljanje oružja odmah, a najkasnije u roku od 24 sata od momenta saznanja.
- (3) Fizička lica, pravna lica i obrtnici dužni su u službenim novinama oglasiti nestanak isprava o oružju, osim odobrenja izdatih u skladu sa ovim zakonom, a nadležna policijska uprava koja je izdala isprave o oružju, donosi rješenje kojim se isprava o oružju oglašava nevažećom.
- (4) Prijave iz st. (1) i (2) ovog člana podnose se nadležnoj policijskoj upravi prema mjestu događaja ili saznanja o gubitku ili krađi oružja i municije. U prijavi se moraju navesti okolnosti pod kojima su oružje, municija i isprave o oružju izgubljeni ili ukradeni, a koje su podnosiocu prijave poznati.
- (5) U slučaju gubitka ili krađe oružja, fizičko lice, pravno lice i obrtnici dužni su odmah, a najkasnije u roku od osam dana, predati ispravu o oružju nadležnoj policijskoj upravi radi poništenja, pri čemu se izdaje odgovarajuća potvrda.

Član 45.

(Pronalazak oružja i municije)

- (1) Ko nađe oružje, bitne dijelove oružja, municiju, dijelove municije, isprave o oružju ili sazna za sakriveno oružje, bitne dijelove oružja, municiju, dijelove municije i isprave o oružju, dužan je o tome odmah obavijestiti najbližu policijsku upravu ili policijsku stanicu ili policijskog službenika.
- (2) Ukoliko se vlasnik nađenog oružja ne javi u roku od godine dana od dana pronalaska oružja, a za isto nema saznanja da je predmet ili sredstvo izvršenja krivičnog djela ili prekršaja, sa nađenim oružjem i municijom će se postupiti na način propisan članom 57. ovog zakona.

Član 46.

(Promjena prebivališta, ličnog imena, naziva ili sjedišta i gubitak državljanstva)

- (1) Ako fizičko lice, pravno lice i obrtnik kome je izdata odgovarajuća isprava o oružju, promijeni prebivalište, odnosno sjedište, dužan je da u roku od 30 dana od dana promjene prebivališta, odnosno sjedišta, prijavi promjenu prebivališta, odnosno sjedišta nadležnoj policijskoj upravi na čijem području je novo prebivalište, odnosno sjedište, radi upisa odgovarajućih podataka u službene evidencije i izdavanja isprave o oružju.
- (2) Kada fizičko lice, pravno lice i obrtnik koji prema odredbama ovog zakona posjeduju oružje, promijeni lično ime, odnosno naziv, dužni su o tome obavijestiti nadležnu policijsku upravu u roku od 30 dana od dana te promjene, radi upisa odgovarajućih podataka u službene evidencije i izdavanja isprave o oružju.

- (3) Kada fizičkom licu pravosnažnom odlukom prestane državljanstvo Bosne i Hercegovine, dužan je odmah, a najkasnije u roku od osam dana od dana pravosnažnosti odluke o prestanku državljanstva, nadležnoj policijskoj upravi predati oružje o čemu mu se izdaje potvrda o privremeno oduzetom oružju i rješenjem nalaže dalje postupanje sa oružjem.

Član 47.

(Dobrovoljna predaja oružja i municije)

- (1) Vlasnik registrovanog oružja i municije može dobrovoljno, bez prava na naknadu, predati oružje i municiju nadležnoj policijskoj upravi na uništenje ili u korist Uprave policije, pri čemu daje izjavu na zapisnik.
- (2) Za oružje i municiju iz stava (1) ovog člana izdaje se potvrda o predaji oružja i municije i dostavlja komisiji iz člana 57. ovog zakona, a oružje se objavljuje iz evidencije registrovanog oružja.

Član 48.

(Dotrajalo oružje)

- (1) Vlasnik oružja koje je dotrajalo i za koje ne postoji mogućnost da se popravi, dužan je takvo oružje u roku od 30 dana od momenta potvrđivanja takve činjenice od strane pravnog lica ili obrtnika iz člana 58. stav (1) ovog zakona, predati nadležnoj policijskoj upravi i podnijeti zahtjev za brisanje iz evidencije registrovanog oružja.
- (2) Oružje iz stava (1) ovog člana prima se uz izjavu vlasnika oružja datu na zapisnik da se oružje predaje bez prava na naknadu, o čemu se izdaje potvrda o predaji oružja.
- (3) Sa zamijenjenim tehnički neispravnim bitnim dijelovima oružja postupa se u skladu sa odredbama iz st. (1) i (2) ovog člana.
- (4) Oružje iz stava (1) ovog člana i bitni dijelovi oružja iz stava (3) ovog člana se uništavaju u skladu sa članom 57. ovog zakona.

Član 49.

(Postupak u slučaju smrti vlasnika oružja i municije)

- (1) U slučaju smrti vlasnika oružja i municije, punoljetni član njegove porodice, zakonski zastupnik, staratelj, lice koje je sa njim živjelo u zajedničkom domaćinstvu ili lice kod kojeg se oružje, bitni dijelovi oružja, municija, dijelovi municije i isprave o oružju nalazili u trenutku smrti, dužno je najkasnije u roku od 30 dana po saznanju o postojanju istih obavijestiti nadležnu policijsku upravu i predati ih.
- (2) Nadležna policijska uprava o predatom oružju, bitnim dijelovima oružja, municiji, dijelovima municije i ispravama o oružju iz stava (1) ovog člana izdaje potvrdu, a u slučaju nepostupanja isto privremeno oduzima.
- (3) Nasljednik oružja i municije dužan je u roku od tri mjeseca od dana pravosnažnosti rješenja o nasljeđivanju preduzeti jednu od sljedećih mjera:
 - a) oružje i municiju prodati ili pokloniti;
 - b) podnijeti zahtjev za izdavanje odobrenja za nabavljanje oružja;
 - c) dati da se onesposobi oružje, te ga zadržati kao trofej;
 - d) predati nadležnoj policijskoj upravi oružje na uništenje bez prava na naknadu, o čemu daje izjavu na zapisnik;
 - e) predati oružje nadležnoj policijskoj upravi u korist Uprave policije, o čemu daje izjavu na zapisnik.
- (4) Izuzetno od stava (3) ovog člana, oružje i municija maloljetnog nasljednika čuva se u depozitu Ministarstva dok ne navrši 21 godinu života, osim u slučajevima iz člana 11. stav

- (12) ovog zakona.
- (5) Nasljednik oružja iz stava (4) ovog člana dužan je sa oružjem i municijom postupiti na način propisan stavom (3) ovog člana.
 - (6) Nasljednik oružja koji oružje proda ili pokloni, dužan je oružje odjaviti kod nadležne policijske uprave u roku od osam dana od dana prodaje ili poklona.
 - (7) Ukoliko nakon smrti lica nije pokrenut ostavinski postupak u dijelu koji se odnosi na registrovano oružje, nadležna policijska uprava poduzima mjere i radnje na pronalasku i preuzimanju oružja, te nakon protoka roka od tri godine od dana pronalaska ili predaje oružja, oružje se preuzima u korist Uprave policije, a sa istim se postupa na način propisan članom 57. ovog zakona.
 - (8) Nadležna policijska uprava prati i redovno ažurira evidenciju vlasnika oružja u skladu sa prijavljenim podacima u civilnom registru i to evidenciji JMB, prebivališta odnosno boravišta i izdatih ličnih karti koja je u nadležnosti Ministarstva, te u skladu sa pribavljenim podacima poduzima operativne radnje na terenu u cilju provođenja odredbi ovog člana.

Član 50.

(Postupak sa nasljeđenim oružjem i municijom)

- (1) Nasljednik oružja koji želi registrovati oružje podnosi nadležnoj policijskoj upravi zahtjev za izdavanje odobrenja za nabavljanje oružja.
- (2) Ukoliko nasljednik oružja u roku od tri mjeseca od dana pravosnažnosti rješenja o nasljeđivanju ne postupi u skladu sa članom 49. stav (3) ovog zakona ili ako mu je odbijen zahtjev za izdavanje odobrenja za nabavljanje oružja, nadležna policijska uprava rješenjem oduzima oružje i municiju i isprave o oružju i postupa u skladu sa članom 56. ovog zakona.
- (3) Sa oružjem koje je nasljednik dobrovoljno predao nadležnoj policijskoj upravi na uništenje, postupa se u skladu sa članom 57. ovog zakona i isto se odjavljuje po službenoj dužnosti.
- (4) Oružje koje nasljednik dobrovoljno preda nadležnoj policijskoj upravi u korist Uprave policije, odjavljuje se iz evidencije po službenoj dužnosti.

DIO ČETVRTI - ODUZIMANJE ORUŽJA, MUNICIJE I ISPRAVA O ORUŽJU

Član 51.

(Oduzimanje oružja, municije i isprava o oružju)

- (1) Nadležna policijska uprava donosi rješenje o oduzimanju oružja i municije i isprava o oružju od fizičkog lica ako nastupi neki od slučajeva koji bi bili u suprotnosti sa uslovima utvrđenim u čl. 11. st. (4) tač. a), c), d), e) i f), (5) tačka a), (6) tač. b) i c) i (12) i 12. st. (3) i (6) ovog zakona.
- (2) Protiv rješenja o oduzimanju oružja, municije i isprava o oružju iz stava (1) ovog člana može se izjaviti žalba policijskom komesaru u roku od 15 dana od dana prijema rješenja.
- (3) Žalba ne odlaže izvršenje rješenja.
- (4) Protiv konačnog rješenja iz stava (2) ovog člana ne može se voditi upravni spor.

Član 52.

(Oduzimanje oružja, municije i isprava o oružju u slučaju vanrednog zdravstvenog pregleda)

Nadležna policijska uprava oduzima oružje, municiju i isprave o oružju vlasniku oružja koji je na vanrednom zdravstvenom pregledu propisanim članom 15. stav (2) ovog zakona ocijenjen nesposobnim za držanje i nošenje oružja ili koji ne dostavi uvjerenje o zdravstvenoj sposobnosti za držanje i nošenje oružja u roku iz člana 15. stav (3) ovog zakona.

Član 53.

(Privremeno oduzimanje oružja, municije i isprava o oružju)

- (1) Policijski službenici Uprave policije od lica za koje postoje osnovi sumnje da je izvršilo krivično djelo ili prekršaj određen ovim zakonom, privremeno oduzimaju oružje i municiju i isprave o oružju za koje postoje osnovi sumnje da je sa njima izvršeno krivično djelo ili prekršaj ili su pribavljeni krivičnim djelom ili prekršajem ili su nastali izvršenjem krivičnog djela ili prekršaja.
- (2) Oružje, municija i isprave o oružju oduzima se i prije pokretanja upravnog, prekršajnog i krivičnog postupka, ako se utvrdi ili učini vjerovatnim da postoje okolnosti koje ukazuju da bi oružje moglo biti zloupotrijebljeno, a naročito češće i prekomjerno konzumiranje alkohola, konzumiranje narkotičkih sredstava ili drugih omamljujućih sredstava, kao i u cilju preduzimanja hitnih mjera radi zaštite od nasilja u porodici ili zbog zaštite javne sigurnosti koje se ne mogu odlagati.
- (3) Nadležna policijska uprava prilikom postupanja u skladu sa st. (1) i (2) ovog člana izdaje potvrdu o privremenom oduzimanju predmeta.
- (4) Oduzeto oružje i municija i isprave o oružju iz st. (1) i (2) ovog člana čuvaju se u depozitu Ministarstva u skladu sa propisom koji reguliše predmetnu oblast sa naročitom pažnjom.
- (5) Ukoliko nadležni organ u prekršajnom, odnosno krivičnom postupku ne utvrdi odgovornost vlasnika, sa privremeno oduzetim oružjem, municijom i ispravama o oružju postupa se u skladu sa odlukom nadležnog organa.

Član 54.

(Oduzimanje oružja, municije i isprava o oružju od pravnog lica i obrtnika)

- (1) Nadležna policijska uprava donosi rješenje o oduzimanju oružja i municije i isprava o oružju od pravnog lica i obrtnika ako nastupi neki od slučajeva koji bi bili u suprotnosti sa uslovima utvrđenim u članu 21. stav (1) ovog zakona i u slučaju kada ne postupi u skladu sa članom 31. st. (2), (4) i (5) ovog zakona.
- (2) Protiv rješenja o oduzimanju oružja, municije i isprava o oružju iz stava (1) ovog člana može se izjaviti žalba policijskom komesaru u roku od 15 dana od dana prijema rješenja.
- (3) Žalba ne odlaže izvršenje rješenja.
- (4) Protiv konačnog rješenja iz stava (2) ovog člana ne može se voditi upravni spor.

Član 55.

(Postupak sa oružjem, municijom i ispravama o oružju oduzetim u prekršajnom ili krivičnom postupku)

- (1) Sa oružjem, municijom i ispravama o oružju oduzetim u pravosnažno okončanom prekršajnom ili krivičnom postupku postupa se u skladu sa odlukom nadležnog organa.
- (2) Ukoliko nadležni organ donese odluku da se oružje i municija iz stava (1) ovog člana uništi, postupak uništenja provodi komisija iz člana 57. ovog zakona.

Član 56.

(Postupak sa oružjem, municijom i ispravama o oružju oduzetim u upravnom postupku)

- (1) Po pravosnažnosti rješenja o oduzimanju oružja, municije i isprava o oružju nakon provedenog upravnog postupka, nadležna policijska uprava poziva vlasnika oružja da u roku od šest mjeseci od dana pravosnažnosti rješenja oduzeto oružje i municiju proda, pokloni, onesposobi ili izjavi na zapisnik da je saglasan da se oružje i municija preda nadležnoj policijskoj upravi u korist Uprave policije ili na uništenje, bez prava na naknadu.

- (2) Ako vlasnik oružja ne postupi po odredbama iz stava (1) ovog člana, sa oduzetim oružjem i municijom se postupa u skladu sa članom 57. ovog zakona.
- (3) Isprave o oružju oduzete u upravnom postupku zadržava organ koji vodi upravni postupak oduzimanja.

Član 57.

(Komisija za postupanje sa oružjem, bitnim dijelovima oružja, municijom i dijelovima municije)

- (1) Postupke sa oduzetim i predatim oružjem, bitnim dijelovima oružja, municijom i dijelovima municije provodi posebna komisija koju obrazuje ministar na prijedlog policijskog komesara.
- (2) Način rada, sastav komisije, troškovi i naknade za rad, kao i druga pitanja koja se odnose na postupanja sa oružjem, utvrđuje se podzakonskim propisom koji na prijedlog policijskog komesara donosi ministar.

DIO PETI – POPRAVLJANJE, MODIFIKACIJA, PREPRAVLJANJE I TRAJNO ONESPOSOBLJAVANJE ORUŽJA

Član 58.

(Pravna lica i obrtnici ovlašteni za popravljavanje, modifikaciju, prepravljavanje i trajno onesposobljavanje oružja)

- (1) Popravljanjem, modifikacijom, prepravljavanjem i trajno onesposobljavanjem oružja mogu se baviti pravna lica i obrtnici koji su registrovani za djelatnost popravljanja, modifikacije, prepravljanja i onesposobljavanja oružja.
- (2) Pravna lica i obrtnici iz stava (1) ovog člana dužni su da u roku od osam dana od dana registracije djelatnosti o tome obavijeste nadležnu policijsku upravu.
- (3) U pravnom licu i obrtniku iz stava (1) ovog člana popravljavanje, modifikaciju, prepravljavanje i trajno onesposobljavanje oružja može obavljati samo punoljetno lice koje ispunjava uslove propisane članom 11. st. (4) tač. b), c), d), e), f) i (5) tač. a) i b) ovog zakona.
- (4) Ukoliko pravno lice i obrtnik ispunji uslove iz stava (3) ovog člana, kao i prostorne, tehničke i druge uslove propisane podzakonskim propisom, nadležna policijska uprava izdaje odobrenje iz stava (1) ovog člana.

Član 59.

(Popravljanje, modifikacija, prepravljavanje, trajno onesposobljavanje i postupanje sa oružjem)

- (1) Pravna lica i obrtnici iz člana 58. ovog zakona mogu primiti radi popravljanja, modifikacije, prepravljanja ili trajnog onesposobljavanja oružja, samo oružje za koje je izdata važeća isprava o oružju.
- (2) Pravna lica i obrtnici iz člana 58. ovog zakona nakon izvršenog popravljanja, modifikacije, prepravljanja ili trajnog onesposobljavanja oružja, licu odmah izdaju potvrdu, a najkasnije u roku od osam dana od dana izdavanja potvrde u pisanoj formi su o tome dužni obavijestiti nadležnu policijsku upravu.
- (3) Vlasnik oružja može svoje registrovano oružje dati na popravljavanje, modifikaciju prepravljavanje ili trajno onesposobljavanje, odnosno pretvoriti isto u trofejno oružje, te je dužan da najkasnije u roku od osam dana od dana prijema potvrde iz stava (2) ovog člana podnese zahtjev nadležnoj policijskoj upravi, radi unosa podataka u odgovarajuće isprave o oružju i odgovarajuće evidencije.

- (4) Oružje koje je primljeno radi popravljanja, modifikacije, prepravljanja oružja ili trajnog onesposobljavanja oružja ne smije se iznositi iz prostorija određenih za rad do njegove predaje vlasniku.
- (5) Izuzetno, od stava (4) ovog člana, oružje koje je primljeno radi popravljanja, modifikacije, prepravljanja oružja ili trajnog onesposobljavanja oružja smije se iznositi iz prostorija određenih za rad, prije njegove predaje vlasniku, radi funkcionalne probe.

Član 60.

(Trajno onesposobljavanje oružja)

- (1) Vlasnik oružja je obavezan da trajno onesposobljeno oružje odjavi kod nadležne policijske uprave najkasnije u roku od osam dana od dana onesposobljavanja i podnese zahtjev za prijavu trofejnog oružja.
- (2) Oružje onesposobljeno za upotrebu ne smije se osposobiti.
- (3) Način onesposobljavanja oružja iz stava (1) ovog člana utvrđuje se podzakonskim propisom koji na prijedlog policijskog komesara donosi ministar.

Član 61.

(Evidencija i propisi o načinu vođenja evidencija)

- (1) Pravna lica i obrtnici koji se bave popravljanjem, modifikacijom, prepravljanjem ili trajnim onesposobljavanjem oružja dužni su voditi evidenciju o popravljenom, modificiranom, prepravljenom i trajno onesposobljenom oružju.
- (2) Način vođenja evidencije iz stava (1) ovog člana, obrasci i sadržaj obrazaca utvrđuju se podzakonskim propisom iz člana 71. stav (8) ovog zakona.

DIO ŠESTI - PROMET ORUŽJA, BITNIH DIJELOVA ORUŽJA, MUNICIJE I BITNIH DIJELOVA MUNICIJE

Član 62.

(Pravna lica i obrtnici ovlaštena za promet i posredovanje u prometu oružjem, bitnim dijelovima oružja, municijom i bitnim dijelovima municije)

- (1) Prometom i posredovanjem u prometu oružja, bitnih dijelova oružja, municije i bitnih dijelova municije mogu se baviti pravna lica i obrtnici koji su registrovani za navedenu djelatnost i dobiju odobrenje nadležne policijske uprave (u daljnjem tekstu: trgovac ili posrednik oružjem).
- (2) Odgovorno lice u pravnom licu, odnosno obrtnik mora ispunjavati uslove iz člana 11. stav (4) tač. b), c), d), e) i f) ovog zakona, a lice koje neposredno rukuje oružjem mora ispunjavati uslove iz člana 11. st. (4) tač. b), c), d), e) i f) i (5) tač. a) i b) ovog zakona.
- (3) Ukoliko trgovac ili posrednik oružjem ispuni uslove iz stava (2) ovog člana, kao i prostorne, tehničke i druge uslove propisane podzakonskim propisom, nadležna policijska uprava izdaje odobrenje iz stava (1) ovog člana.

Član 63.

(Nabavljanje oružja, bitnih dijelova oružja, municije i bitnih dijelova municije u svrhu prometa)

- (1) Trgovac ili posrednik oružjem, u svrhu prometa, oružje, bitne dijelove oružja, municiju i bitne dijelove municije može nabavljati samo na osnovu odobrenja nadležne policijske uprave.
- (2) Odobrenje iz stava (1) ovog člana se izdaje na zahtjev trgovca ili posrednika oružjem za svaku ugovorenu količinu i važi šest mjeseci od dana izdavanja.
- (3) Zahtjev za izdavanje odobrenja iz stava (2) ovog člana podnosi se nadležnoj policijskoj upravi prema sjedištu podnosioca zahtjeva.
- (4) Trgovac ili posrednik oružjem dužan je u roku od osam dana od dana nabavljanja oružja, bitnih dijelova oružja, municije i bitnih dijelova municije o tome obavijestiti nadležnu policijsku upravu koja je izdala odobrenje za nabavljanje, kao i policijsku upravu na čijem području ima podružnicu.
- (5) Ukoliko iz bilo kojih razloga posumnja u porijeklo ili ispravnost oružja, bitnih dijelova oružja, municije i bitnih dijelova municije, trgovac ili posrednik oružjem odbija nabavljanje oružja, bitnih dijelova oružja, municije i bitnih dijelova municije ili posredovanje sa istim, te o navedenom odmah obavještava nadležnu policijsku upravu.

Član 64.

(Prodaja oružja, bitnih dijelova oružja, municije i bitnih dijelova municije)

- (1) Trgovac oružjem može prodavati:
 - a) oružje i bitne dijelove oružja kategorije A, A1 i B;
 - b) oružje kategorije C;
 - c) oružje kategorije D;
 - d) municiju i bitne dijelove municije.
- (2) Trgovac oružjem može prodati oružje iz stava (1) tačka a) ovog člana samo fizičkim licima, pravnim licima i obrtnicima kojima je nadležna policijska uprava za to izdala odobrenje, pri čemu je dužan zadržati jedan primjerak odobrenja za nabavljanje oružja, a na drugi primjerak staviti zabilješku o izvršenoj prodaji i ovjeriti pečatom i potpisom odgovornog lica, o čemu je dužan u roku od osam dana od dana prodaje obavijestiti nadležnu policijsku upravu.
- (3) Trgovac oružjem može prodati oružje iz stava (1) tačka b) ovog člana fizičkim licima, pravnim licima i obrtnicima o čemu je dužan u roku od osam dana od dana prodaje obavijestiti nadležnu policijsku upravu.
- (4) Trgovac oružjem može prodati oružje iz stava (1) tačka c) ovog člana fizičkim licima, pravnim licima i obrtnicima bez obaveze prijave nadležnoj policijskoj upravi.
- (5) Trgovac oružjem može prodavati municiju samo licima koja imaju važeću ispravu o oružju, o čemu je dužan u roku od osam dana od dana prodaje o tome obavijestiti policijsku upravu koja je izdala važeću ispravu o oružju.
- (6) Trgovac oružjem može prodavati bitne dijelove municije fizičkim i pravnim licima iz člana 26. ovog zakona kojima je izdato odobrenje za spravljanje municije, o čemu je dužan u roku od osam dana od dana prodaje obavijestiti policijsku upravu koja je izdala odobrenje.

Član 65.

(Ispunjavanje uslova za promet oružja, bitnih dijelova oružja, municije i bitnih dijelova municije)

- (1) Ispunjavanje uslova iz člana 62. ovog zakona utvrđuje komisija iz člana 11. stav (10) ovog zakona.
- (2) Način smještaja i čuvanja oružja u svrhu prometa propisuje se podzakonskim propisom iz člana 21. stav (7) ovog zakona.

Član 66.

(Obaveze trgovca ili posrednika oružjem)

Trgovac ili posrednik oružjem dužan je odbiti svaku radnju koja se odnosi na kupovinu ili prodaju, ugovaranje transakcija za kupovinu ili prodaju ili dogovaranje transfera oružja, bitnih dijelova oružja, municije i dijelova municije ili snabdijevanje istim, ukoliko iz bilo kojeg razloga posumnja u porijeklo ili ispravnost istih zbog njihove prirode ili obima, te je o navedenom dužan odmah obavijestiti nadležnu policijsku upravu.

DIO SEDMI - CIVILNO STRELIŠTE

Član 67.

(Uslovi za osnivanje i korištenje civilnog strelišta)

- (1) Za obavljanje sportske i druge djelatnosti civilno strelišta mogu osnovati registrovana udruženja i savezi, kao i pravna lica i obrtnici koji dobiju odobrenje nadležne policijske uprave (u daljnjem tekstu: osnivač civilnog strelišta).
- (2) Uslovi za izdavanje odobrenja za osnivanje civilnog strelišta su:
 - a) upotrebna dozvola ili zemljišnoknjižni izvadak;
 - b) da lice ovlašteno za zastupanje u udruženju i savezu, odgovorno lice u pravnom licu, odnosno obrtnik ispunjavaju uslove iz člana 11. stav (4) tač. b), c), d), e) i f) ovog zakona, a da fizičko lice koje neposredno rukuje oružjem u udruženju i savezu, odnosno pravnom licu, kao i obrtnik ispunjavaju uslove iz člana 11. st. (4) tač. b), c), d), e) i f) i (5) tač. a) i b) ovog zakona;
 - c) da osnivač civilnog strelišta ima pravo vlasništva ili pravo korištenja otvorenog odnosno zatvorenog objekta;
 - d) da ima obezbjeđen prostor za bezbjedno čuvanje i smještaj oružja i municije čiji će uslovi biti propisani podzakonskim propisom iz člana 21. stav (7) ovog zakona, što utvrđuje komisija iz člana 11. stav (10) ovog zakona;
 - e) da ispunjava prostorne, tehničke, sigurnosne i druge uslove propisane podzakonskim propisom iz stava (5) ovog člana, što utvrđuje komisija iz člana 11. stav (10) ovog zakona.
- (3) Odredbe ovog zakona ne primjenjuju se na privremena sportska i lovačka strelišta koja se koriste za sportska takmičenja, gađanje i testiranje lovačkog oružja svojih članova prema propisima o lovstvu, osim sigurnosnih uslova propisanih podzakonskim propisom iz stava (5) ovog člana.
- (4) Osnivač civilnog strelišta može drugom pravnom licu ustupiti na korištenje osnovano civilno strelišta ukoliko isti ispunjava uslove iz stava (2) tač. b), d) i e) ovog člana i ukoliko ima pravni osnov za korištenje civilnog strelišta.
- (5) Bliže odredbe o prostornim, tehničkim, sigurnosnim i drugim uslovima civilnog strelišta i druga mjesta određena za vježbe gađanja i sportske manifestacije, uređuju se podzakonskim propisom koji na prijedlog policijskog komesara donosi ministar u saradnji sa nadležnim ministarstvima.

Član 68.

(Ispunjavanje uslova za osnivanje civilnog strelišta)

Ispunjavanje uslova iz člana 67. ovog zakona utvrđuje komisija iz člana 11. stav (10) ovog zakona.

Član 69.

(Mjere i radnje na civilnom strelištu)

Osnivač ili korisnik civilnog strelišta dužan je preduzeti mjere i radnje na održavanju reda na civilnom strelištu i to da:

- a) vatreno oružje na civilnom strelištu može koristiti fizičko lice kojem je izdata odgovarajuća isprava o oružju;
- b) fizičko lice koje ne ispunjava uslove iz tačke a) ovog člana može koristiti isključivo oružje i municiju koja je vlasništvo osnivača civilnog strelišta i to samo pod nadzorom ovlaštenog lica osnivača ili korisnika civilnog strelišta;
- c) obavezno zabrani korištenje sportskog oružja maloljetnim licima, osim članovima sportskih streljačkih organizacija koji su stariji od 11 godina, ukoliko ispunjavaju uslove iz člana 38. stav (8) ovog zakona;
- d) zabrani pristup i korištenje civilnog strelišta licima iz tač. a) i b) ovog člana, ako njihovo ponašanje ukazuje da su pod dejstvom alkohola, opojnih droga ili drugih omamljujućih sredstava, odnosno da su u takvom stanju da nisu u mogućnosti shvatiti značenje svog postupanja, odnosno vladati svojom voljom.

Član 70.

(Usklađivanje rada civilnih strelišta)

Osnivači civilnog strelišta su dužni uskladiti svoj rad u roku od šest mjeseci od dana stupanja na snagu podzakonskih propisa iz čl. 21. stav (7) i 67. stav (5) ovog zakona, kao i sa uslovima iz člana 67. stav (2) ovog zakona.

DIO OSMI - EVIDENCIJE I NADZOR NAD SPROVOĐENJEM ZAKONA

Član 71.

(Evidencije)

- (1) Osnivač civilnog strelišta, korisnik civilnog strelišta, sportske streljačke organizacije i lovačke organizacije, kao i stručne ovlaštene organizacije iz člana 17. stav (1) ovog zakona vode evidencije o:
 - a) nabavljenom oružju, bitnim dijelovima oružja i municiji za kategoriju A;
 - b) nabavljenom oružju, bitnim dijelovima oružja i municiji za kategoriju A1;
 - c) nabavljenom oružju, bitnim dijelovima oružja i municiji za kategoriju B;
 - d) nabavljenom oružju kategorije C;
 - e) nabavljenom starom oružju;
 - f) zamjenjenom oružju;
 - g) izdatim ispravama licima kojima je oružje povjereno, odnosno dato na poslugu.
- (2) Sportske streljačke i lovačke organizacije i njihovi članovi obavezni su da vode evidenciju o spravljanju municije, kao i evidencije o ustupljenom oružju i municiji.
- (3) Trgovac oružjem obavezan je da vodi evidencije o:
 - a) nabavljenom oružju, razdvojene po kategorijama;
 - b) nabavljenim bitnim dijelovima oružja, razdvojene po kategorijama;
 - c) nabavljenoj municiji;
 - d) prodatom oružju, razdvojene po kategorijama;
 - e) prodatim bitnim dijelovima oružja, razdvojene po kategorijama;
 - f) prodatoj municiji;
 - g) oružju i municiji primljenim na čuvanje.
- (4) Pravna lica i obrtnici koji se bave popravkom, modifikacijom, prepravkom oružja ili trajnim onesposobljavanjem oružja obavezni su da vode evidenciju o popravljenom, modificiranom, prepravljenom i trajno onesposobljenom oružju.

- (5) Stručna ovlaštena organizacija iz člana 17. stav (1) ovog zakona obavezna je da vodi evidenciju o licima koja su prošla obuku za poznavanje propisa i tehničkih znanja koja se odnose na držanje, čuvanje i nošenje oružja.
- (6) Fizičko lice, pravno lice i obrtnik kojima je izdato odobrenje za sakupljanje starog oružja ili kolekcionarska dozvola, obavezni su voditi evidenciju o sakupljenom starom oružju.
- (7) Evidencije iz st. (1), (2), (3), (4), (5) i (6) ovog člana čuvaju se trajno, a u slučaju smrti fizičkog lica, odnosno prestanka postojanja pravnog lica i obrtnika predaju se nadležnoj policijskoj upravi.
- (8) Naziv, sadržaj i način vođenja evidencija iz ovog člana, utvrđuju se podzakonskim propisom koji na prijedlog policijskog komesara donosi ministar.

Član 72.

(Evidencije Uprave policije)

- (1) Nadležna policijska uprava obavezna je u pisanoj ili elektronskoj formi, voditi evidencije o:
 - a) podnesenim zahtjevima i izdatim odobrenjima za nabavljanje oružja;
 - b) izdatim oružnim listovima;
 - c) izdatim odobrenjima za držanje oružja;
 - d) izdatim odobrenjima za sakupljanje starog oružja i kolekcionarstvu;
 - e) prijavi oružja kategorije C i izdatim potvrdama o prijavi;
 - f) privremeno dobrovoljno predatom ili oduzetom oružju;
 - g) oduzetom oružju u upravnom postupku;
 - h) dobrovoljno predatom oružju;
 - i) nađenom i nestalom oružju;
 - j) prijavi nabavke municije;
 - k) izdatim odobrenjima za spravljanje municije;
 - l) prijavi nabavljanja baruta u svrhu spravljanja municije;
 - m) izvršenom nadzoru koji provode nadležne policijske uprave.
- (2) Komisija iz člana 17. stav (2) ovog zakona vodi evidenciju u pisanoj ili elektronskoj formi o licima koja su položila ispit o poznavanju propisa i tehničkim znanjima koja se odnose na držanje, čuvanje i nošenje oružja.
- (3) Evidencije iz st. (1) i (2) ovog člana čuvaju se trajno.
- (4) Naziv, sadržaj i način vođenja evidencija iz ovog člana utvrđuju se podzakonskim propisom koji na prijedlog policijskog komesara donosi ministar.

Član 73.

(Nadzor koji provodi nadležna policijska uprava)

- (1) Nadležna policijska uprava, putem komisije iz člana 11. stav (10) ovog zakona, vrši neposredni nadzor nad:
 - a) prodajom oružja i municije;
 - b) čuvanjem i smještajem oružja i municije od strane pravnih lica i obrtnika, uključujući sportske streljačke organizacije, organizacije koje upravljaju lovištem, pravnih lica i obrtnika koji se bave popravljavanjem, modifikacijom, prepravljavanjem oružja ili trajnim onesposobljavanjem oružja, osnivačima i korisnicima civilnih strelišta;
 - c) vođenjem evidencija iz člana 71. ovog zakona;
 - d) stručnim ovlaštenim organizacijama iz člana 17. stav (1) ovog zakona koje obavljaju obuku za poznavanje propisa i tehničkih znanja koja se odnose na držanje, čuvanje i nošenje oružja.
- (2) U obavljanju nadzora iz stava (1) ovog člana ovlaštena lica komisije nadležne policijske uprave mogu:

- a) pregledati skladišta oružja i municije, civilna strelišta i druge prostorije gdje se obavlja promet, posredovanje, popravlanje, modifikacija, prepravlanje, trajno onesposobljavanje i čuvanje oružja i municije, te obavljanje obuke iz člana 17. stav (1) ovog zakona;
 - b) izvršiti pregled propisanih evidencija i ostale dokumentacije u vezi s prometom, posredovanjem, popravlanjem, modifikacijom, prepravlanjem, trajnim onesposobljavanjem i čuvanjem oružja i municije, korištenjem civilnih strelišta i obavljanjem obuke iz člana 17. stav (1) ovog zakona;
 - c) privremeno zabraniti obavljanje djelatnosti prometa, posredovanja, popravlanja, modifikacije, prepravlanja, trajnog onesposobljavanja i čuvanja oružja i municije, korištenje civilnih strelišta i obavljanje obuke iz člana 17. stav (1) ovog zakona;
 - d) privremeno zabraniti korištenje civilnih strelišta i obavljanje obuke iz člana 17. stav (1) ovog zakona;
 - e) narediti da se utvrđene nepravilnosti otklone u određenom roku;
 - f) zabraniti daljnje bavljenje prometom, posredovanjem, popravlanjem, modifikacijom, prepravlanjem, trajnim onesposobljavanjem, čuvanjem oružja i municije, odnosno korištenje civilnih strelišta, obavljanje obuke iz člana 17. stav (1) ovog zakona, ako utvrdi da su u obavljanju tih djelatnosti učinjeni teži propusti u preduzimanju zaštitnih ili drugih sigurnosnih mjera ili druge teže kažnjive radnje, ukoliko je prestao postojati neki od uvjeta pod kojima je odobrenje izdato ili ako se ne postupi po nalogu nadležne policijske uprave i narediti preduzimanje i drugih propisanih mjera.
- (3) Lica iz stava (1) ovog člana dužna su omogućiti vršenje nadzora i dati na uvid traženu dokumentaciju, kao i pružiti potrebne podatke i obavijesti.
- (4) Ovlaštena lica komisije nadležne policijske uprave na temelju utvrđenih činjenica rješenjem naređuju mjere iz stava (2) ovog člana.
- (5) Protiv rješenja iz stava (4) ovog člana može se izjaviti žalba policijskom komesaru u roku od 15 dana od dana prijema rješenja, koja ne odlaže izvršenje rješenja.

Član 74.

(Komisija za unutrašnji nadzor)

- (1) U cilju zakonitog rada, provođenja i primjene ovog zakona od strane nadležnih policijskih uprava, policijski komesar formira komisiju za unutrašnji nadzor.
- (2) Način formiranja i sastav komisije, nadležnost i način rada, naknadu za rad u komisiji, kao i druga pitanja od značaja za rad komisije utvrđuju se podzakonskim propisom koji na prijedlog policijskog komesara donosi ministar.

DIO DEVETI - ODREDBE O SANKCIJAMA

Član 75.

(Krivična djela)

- (1) Novčanom kaznom ili kaznom zatvora od šest mjeseci do tri godine kaznit će se za krivično djelo:
 - a) ko bez odobrenja nabavi, drži ili nosi vatreno oružje kategorije A, A1 i B (čl. 11. i 21 ovog zakona);
 - b) ko proda vatreno oružje kategorije A, A1 i B pravnom licu, obrtniku ili fizičkom licu koji nemaju odobrenje za nabavljanje te vrste oružja (član 30. stav (4) ovog zakona);
 - c) ko drugom da vatreno oružje na poslugu ili ko da na poslugu lovačko oružje ili sportsko vatreno oružje licu koje za tu vrstu oružja nema oružni list (član 40. ovog zakona).
- (2) Za krivična djela iz stava (1) ovog člana obavezno se izriče i zaštitna mjera oduzimanja vatrenog oružja.

- (3) U izvršenju zaštitne mjere iz stava (2) ovog člana za krivično djelo iz stava (1) tač. b) i c) ovog člana oduzimaju se isprave o oružju ukoliko su za isto izdate.

Član 76.

(Novčane kazne od 500,00 do 1.000,00 KM i zaštitne mjere za prekršaje fizičkih lica)

- (1) Novčanom kaznom od 500,00 do 1.000,00 KM kaznit će se za prekršaj fizičko lice:
- a) koje ne ispunjava uslove za siguran smještaj i čuvanje oružja (član 11. stav (5) tačka c) ovog zakona);
 - b) koje u propisanom roku ne dostavi nadležnoj policijskoj upravi uvjerenje o zdravstvenoj sposobnosti (član 14. st. (1) i (2) ovog zakona);
 - c) koje u propisanom roku ne vrati odobrenje za nabavljanje oružja (član 19. stav (3) ovog zakona);
 - d) koje nosi, koristi i rukuje s oružjem koje mu je povjereno u vrijeme kada ne vrši službu, ili iznese oružje van objekta odnosno prostora ili pravca kretanja transporta koji obezbjeđuje ili ne čuva na bezbjednom mjestu tako da onemogući pristup oružju neovlaštenim licima (član 22. stav (2) ovog zakona);
 - e) koje u propisanom roku ne prijavi nabavku bitnih dijelova oružja nadležnoj policijskoj upravi (član 24. stav (1) ovog zakona);
 - f) koje nabavi municiju za oružje za koje nema izdat oružni list (član 25. stav (1) ovog zakona);
 - g) koje u propisanom roku ne prijavi nabavku municije, izuzev ukoliko je municija nabavljena na području Kantona Sarajevo (član 25. stav (2) ovog zakona);
 - h) koje postupi suprotno odredbama člana 27. stav (1) ovog zakona;
 - i) koje postupi suprotno odredbama člana 27. stav (2) ovog zakona;
 - j) koje u propisanom roku ne podnese pisani zahtjev nadležnoj policijskoj upravi za registraciju oružja i izdavanje oružnog lista (član 29. stav (1) ovog zakona);
 - k) koje u propisanom roku nadležnoj policijskoj upravi ne prijavi zamjenu vatrenog oružja, ne preda oružni list i ne podnese zahtjev za registraciju vatrenog oružja (član 30. stav (3) ovog zakona);
 - l) koje u propisanom roku ne prijavi prenos prava vlasništva na vatreno oružje (član 30. st. (5) i (6) ovog zakona);
 - m) koje u propisanom roku o izvršenoj nabavci, prodaji ili predaji starog oružja ne obavijesti nadležnu policijsku upravu (član 33. stav (8) ovog zakona);
 - n) koje u propisanom roku ne prijavi nadležnoj policijskoj upravi nabavljanje oružja kategorije C (član 34. stav (2) ovog zakona);
 - o) prekršajno odgovorno maloljetno lice koje nabavi, drži i nosi oružje kategorije D suprotno odredbama člana 35. ovog zakona, odnosno roditelj, usvojitelj ili staratelj maloljetnika koji nabavi, drži i nosi oružje kategorije D, suprotno odredbama člana 35. ovog zakona, ako je počinjeni prekršaj maloljetnika posljedica propuštanja nadzora nad maloljetnikom, a bio je u mogućnosti vršiti takav nadzor;
 - p) koje ne vrati pravnom licu koje upravlja lovištem oružje, odnosno neutrošenu količinu municije dobijenu na poslu u određenom roku ili ih upotrebljava, odnosno iznosi van određenog lovišta (član 41. stav (3) ovog zakona);
 - r) koje postupi suprotno odredbama člana 46. ovog zakona;
 - s) nasljednik oružja i municije koji u propisanom roku ne postupi u skladu sa ovim zakonom (član 49. stav (3) ovog zakona);
 - t) nasljednik oružja koji u propisanom roku nakon prodaje oružja isto ne odjavi kod nadležne policijske uprave (član 49. stav (6) ovog zakona);
 - u) vlasnik oružja koji u propisanom roku ne prijavi izvršenu popravku, modifikaciju, prepravku ili trajno onesposobljavanje oružja (član 59. stav (3) ovog zakona);

- v) koje ne vodi evidenciju iz člana 71. stav (6) ovog zakona.
- (2) Za prekršaje iz stava (1) tač. e), f), h), j), k), l), m), o) i u) ovog člana, pored novčane kazne, izriče se zaštitna mjera oduzimanja oružja, bitnih dijelova oružja, municije, bitnih dijelova municije i isprava o oružju.

Član 77.

(Novčane kazne od 1.000,00 do 2.000,00 KM i zaštitne mjere za prekršaje fizičkih lica)

- (1) Novčanom kaznom od 1.000,00 do 2.000,00 KM kaznit će se za prekršaj fizičko lice koje:
- a) ima saznanja o promjeni zdravstvenog stanja imaoca oružja, koja može uticati na sposobnost za držanje i nošenje oružja, a o tome ne obavijesti nadležnu policijsku upravu ili najbližu policijsku stanicu (član 15. stav (1) ovog zakona);
 - b) u propisanom roku, nakon upućivanja na vanredni zdravstveni pregled, nadležnoj policijskoj upravi ne dostavi uvjerenje o zdravstvenoj sposobnosti (član 15. stav (3) ovog zakona);
 - c) postupi suprotno odredbama člana 26. ovog zakona;
 - d) zamijeni oružje za vrstu oružja za koju nema izdat oružni list (član 30. st. (1), (2) i (4) ovog zakona);
 - e) bez odobrenja nadležne policijske uprave sakuplja staro oružje ili se bavi kolekcionarstvom (član 33. stav (1) ovog zakona);
 - f) preda ili proda staro oružje pravnom licu, obrtniku i fizičkom licu koji nemaju odobrenje za sakupljanje starog oružja (član 33. stav (7) ovog zakona);
 - g) postupi suprotno odredbama člana 36. ovog zakona;
 - h) postupi suprotno odredbama člana 37. ovog zakona;
 - i) postupi suprotno odredbama člana 38. ovog zakona;
 - j) postupi suprotno odredbi člana 39. ovog zakona;
 - k) prenosi sportsko oružje i pripadajuću municiju bez važećeg oružnog lista za tu vrstu i kategoriju oružja, kopije izdatog odobrenja za držanje oružja i potvrde sportske streljačke organizacije (član 42. stav (2) ovog zakona);
 - l) postupi suprotno odredbama člana 43. ovog zakona;
 - m) postupi suprotno odredbama člana 44. ovog zakona;
 - n) ne obavijesti najbliži policijski organ ili policijskog službenika u slučaju pronalaska oružja, bitnih dijelova oružja, municije, dijelova municije i isprava o oružju ili o saznanju za sakriveno oružje, bitne dijelove oružja, municiju, dijelove municije i isprave o oružju (član 45. stav (1) ovog zakona);
 - o) postupi suprotno odredbi člana 48. stav (1) ovog zakona;
 - p) osposobi staro oružje koje je onesposobljeno za upotrebu (član 60. stav (2) ovog zakona);
 - r) da na korištenje sportsko oružje maloljetnim licima suprotno odredbama člana 69. tačka c) ovog zakona;
- (2) Za prekršaje iz stava (1) tač. b), c), d), e), f), g), h), i), j), k), l), o), p) i r) ovog člana, pored novčane kazne, izriče se zaštitna mjera oduzimanja oružja, bitnih djelova oružja, municije, bitnih dijelova municije i isprava o oružju.

Član 78.

(Novčane kazne od 5.000,00 do 10.000,00 KM i zaštitne mjere za prekršaje pravnih lica i obrtnika)

- (1) Novčanom kaznom od 5.000,00 do 10.000,00 KM kaznit će se za prekršaj:
- a) lovačka organizacija i sportska streljačka organizacija koji u propisanom roku ne dostavi obavijest o prestanku članstva (član 12. st. (4) i (7) ovog zakona);

- b) odgovorno lice i lice zaduženo za sigurnost u pravnom licu, odnosno obrtnik ne postupe u skladu sa članom 14. stav (3) ovog zakona;
 - c) pravno lice i obrtnik koji ne izda posebnu potvrdu licu kojem povjeravaju oružje i koji ne obavijesti nadležnu policijsku upravu o licu kojem je povjerila oružje (član 22. stav (3) ovog zakona);
 - d) pravno lice i obrtnik koji u propisanom roku ne vrati odobrenje za nabavljanje oružja (član 23. stav (3) ovog zakona);
 - e) pravno lice i obrtnik koji u propisanom roku ne prijavi nabavku bitnih dijelova oružja nadležnoj policijskoj upravi (član 24. stav (1) ovog zakona);
 - f) ko postupi suprotno odredbama člana 27. stav (1) ovog zakona;
 - g) ko postupi suprotno odredbama člana 27. stav (2) ovog zakona;
 - h) pravno lice i obrtnik koji u propisanom roku ne podnese pisani zahtjev nadležnoj policijskoj upravi za registraciju oružja i izdavanje odobrenja za držanje oružja (član 29. stav (2) ovog zakona);
 - i) pravno lice i obrtnik koji postupi suprotno odredbama člana 30. stav (3) ovog zakona;
 - j) pravno lice i obrtnik koji postupi suprotno odredbama člana 30. st. (5) i (6) ovog zakona;
 - k) pravno lice i obrtnik koji postupi suprotno odredbama člana 46. ovog zakona;
 - l) imalac oružja koji postupi suprotno odredbi člana 48. stav (1) ovog zakona;
 - m) pravno lice, obrtnik, sportska streljačka organizacija, lovačka organizacija, trgovac i stručna ovlaštena organizacija koji ne vode propisane evidencije iz člana 71. ovog zakona.
- (2) Za prekršaje iz stava (1) ovog člana kaznit će se novčanom kaznom od 1.000,00 do 3.000,00 KM i odgovorno lice u pravnom licu i obrtnik.
- (3) Za prekršaj iz stava (1) tač. e), f), h), i), j) i l) ovog člana izriče se i zaštitna mjera oduzimanja oružja, bitnih dijelova oružja, municije, bitnih dijelova municije i isprava o oružju.

Član 79.

(Novčane kazne od 10.000,00 do 20.000,00 KM i zaštitne mjere za prekršaje pravnih lica i obrtnika)

- (1) Novčanom kaznom od 10.000,00 do 20.000,00 KM kaznit će se za prekršaj:
- a) zdravstvena ustanova koja ima saznanja o promjeni zdravstvenog stanja imaoaca oružja, koja može uticati na sposobnost za držanje i nošenje oružja, a o tome ne obavijesti policijsku upravu ili najbližu policijsku stanicu (član 15. stav (1) ovog zakona);
 - b) stručna ovlaštena organizacija koja postupi suprotno odredbama člana 17. ovog zakona;
 - c) pravna lica i obrtnici koji povjere nošenje oružja i municije licu koje nije određeno da neposredno vrši poslove zaštite i koje ne ispunjava uslove za nošenje oružja propisane ovim zakonom (član 22. stav (1) ovog zakona);
 - d) pravno lice i obrtnik koji naredi ili dozvoli da lice kome je povjereno oružje radi vršenja poslova zaštite nosi to oružje suprotno odredbama člana 22. stav (2) ovog zakona;
 - e) pravno lice i obrtnik koji nabavi municiju za oružje za koje nema izdat oružni list odnosno odobrenje za držanje oružja (član 25. stav (1) ovog zakona);
 - f) pravno lice i obrtnik koji u propisanom roku ne prijavi nabavku municije (član 25. stav (2) ovog zakona);
 - g) postupi suprotno odredbama člana 26. ovog zakona;
 - h) pravno lice i obrtnik koje postupi suprotno odredbama člana 30. stav (2) ovog zakona;
 - i) pravno lice i obrtnik koji ne obavijesti u propisanom roku nadležnu policijsku upravu o prestanku potrebe za daljnjim držanjem oružja i municije (član 31. stav (2) ovog zakona);

- j) pravno lice i obrtnik koji bez odobrenja nadležne policijske uprave sakuplja staro oružje ili se bavi kolekcionarstvom (član 33. stav (1) ovog zakona);
 - k) pravno lice i obrtnik koji proda ili preda staro oružje fizičkom ili pravnom licu ili obrtniku koji nemaju odobrenje za sakupljanje starog oružja (član 33. stav (7) ovog zakona);
 - l) pravno lice i obrtnik koji u propisanom roku o izvršenoj nabavci, prodaji ili predaji starog oružja ne obavijesti nadležnu policijsku upravu (član 33. stav (8) ovog zakona),
 - m) pravno lice i obrtnik koji u propisanom roku ne prijavi nadležnoj policijskoj upravi nabavljanje oružja kategorije C (član 34. stav (2) ovog zakona);
 - n) pravno lice i obrtnik koji postupi suprotno odredbama člana 38. st. (6), (8), (9) i (11) ovog zakona;
 - o) pravno lice koje upravlja lovištem koje postupi suprotno odredbama člana 41. ovog zakona;
 - p) streljačka organizacija koja postupi suprotno odredbama člana 42. ovog zakona;
 - r) pravno lice i obrtnik, sportska streljačka organizacija i organizacija koja upravlja lovištem koji postupe suprotno odredbama člana 43. stav (5) ovog zakona;
 - s) pravno lice i obrtnik koji postupe suprotno odredbama člana 44. ovog zakona;
 - t) pravno lice i obrtnik koji se bave popravljanjem i prepravljanjem oružja, koji postupe suprotno odredbama člana 58. ovog zakona;
 - u) pravno lice i obrtnik koji se bave popravljanjem i prepravljanjem oružja, koji postupe suprotno odredbama člana 59. ovog zakona;
 - v) pravno lice i obrtnik koji osposobi staro oružje koje je onesposobljeno za upotrebu (član 60. stav (2) ovog zakona);
 - z) pravno lice i obrtnik koji se bavi prometom oružja, bitnih dijelova oružja, municije i dijelova municije, koji postupe suprotno odredbama člana 62. stav (1) ovog zakona;
 - aa) trgovac ili posrednik oružjem koji postupi suprotno odredbama člana 63. ovog zakona;
 - bb) trgovac oružjem koji ne postupi u skladu sa odredbama člana 64. ovog zakona;
 - cc) pravno lice i obrtnik koji postupi suprotno odredbama člana 67. ovog zakona;
 - dd) osnivač odnosno korisnik civilnog strelišta koji postupi suprotno odredbama člana 69. ovog zakona;
 - ee) osnivač odnosno korisnik civilnog strelišta, koji u propisanom roku ne uskladi svoj rad u skladu sa odredbama zakona i podzakonskog propisa (član 70. ovog zakona).
- (2) Za prekršaje iz stava (1) ovog člana kaznit će se novčanom kaznom od 2.000,00 do 4.000,00 KM i odgovorno lice u pravnom licu i obrtnik.
- (3) Za prekršaj iz stava (1) tač. c), d), e), f), g), h), j), n), v), z), aa), bb), cc) i dd) ovog člana se izriče zaštitna mjera oduzimanja oružja, bitnih dijelova oružja, municije, bitnih dijelova municije i isprava o oružju, a za prekršaje iz stava (1) tač. b), c), d), g), k), n), r), s), t), u), v), z), aa), bb), cc), dd) i ee) može se izreći i zaštitna mjera zabrane vršenja djelatnosti u trajanju do šest mjeseci i zaštitna mjera privremenog oduzimanja oružja.
- (4) Za ponovljeni prekršaj iz stava (1) tač. c), d), e), f), g), h), j), n), s), v), z), aa), bb), cc) i dd) ovog člana se izriče i zaštitna mjera oduzimanja oružja, bitnih dijelova oružja, municije, bitnih dijelova municije i isprava o oružju, a za ponovljene prekršaje iz stava (1) tač. b), c), d), g), k), n), r), s), t), u), v), z), aa), bb), cc), dd) i ee) obavezno se izriče i zaštitna mjera zabrane vršenja djelatnosti u trajanju do šest mjeseci.

DIO DESETI - PRELAZNE I ZAVRŠNE ODREDBE

Član 80. (Započeti postupci)

Svi postupci koji do dana stupanja na snagu ovog zakona nisu pravosnažno okončani završit će se po odredbama Zakona o nabavljanju, držanju i nošenju oružja i municije („Službene novine Kantona Sarajevo“, br. 1/18, 13/18 – Ispravka i 30/19).

Član 81.

(Donošenje podzakonskih propisa)

- (1) U roku od šest mjeseci od dana stupanja na snagu ovog zakona, na prijedlog policijskog komesara, ministar donosi sljedeće podzakonske propise:
 - a) o izgledu i sadržaju obrazaca isprava o oružju, obrazaca zahtjeva za izdavanje isprava o oružju i drugih dokumenata kao i obrasca izjave o ispunjavanju uslova za siguran smještaj i čuvanje oružja (član 9. stav (2) ovog zakona i član 11. stav (5) tačka c) ovog zakona);
 - b) o nadležnosti, načinu rada i pravu na naknadu komisije iz člana 11. stav (10) ovog zakona (član 11. stav (11) ovog zakona);
 - c) o načinu i programu osposobljavanja i druga pitanja koja se odnose na obuku o poznavanju propisa i tehničkih znanja koji se odnose na držanje, čuvanje i nošenje oružja, način rada stručne ovlaštene organizacije iz člana 17. stav (1), kao i način rada i naknada za rad komisije iz člana 17. stav (2) (član 17. stav 4. ovog zakona);
 - d) o načinu smještaja i čuvanja oružja i municije (član 21. stav (7) ovog zakona);
 - e) o načinu rada, sastavu komisije, troškovima i naknadama za rad, kao i druga pitanja koja se odnose na postupanja sa oružjem iz člana 57. ovog zakona (član 57. stav (2) ovog zakona);
 - f) o načinu trajnog onesposobljavanja oružja (član 60. stav (3) ovog zakona);
 - g) o prostornim, tehničkim, sigurnosnim i drugim uslovima koje mora ispunjavati civilno strelište i druga mjesta određena za vježbe gađanja i sportske manifestacije (član 67. stav (5) ovog zakona);
 - h) o evidencijama koje se vode u skladu sa odredbama čl. 71. i 72. ovog zakona;
 - i) o načinu formiranja, sastavu komisije, nadležnosti, načinu rada, naknadi za rad u komisiji, kao i druga pitanja od značaja za rad komisije (član 74. stav (2) ovog zakona);
 - j) o mjerama i radnjama koje poduzima Uprava policije na provođenju amnestije za nelegalno posjedovanje oružja, kao i u vezi legalizacije oružja (član 85. stav (3) ovog zakona).
- (2) U roku od tri mjeseca od dana stupanja na snagu ovog zakona, ministar zdravstva Kantona Sarajevo u saradnji sa Ministarstvom, donosi propis o bližim uslovima koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost za držanje i nošenje oružja, načinu i postupku obavljanja redovnih i vanrednih zdravstvenih pregleda, popisu bolesti i zdravstvenih stanja koja lice čine nepodobnim za držanje i nošenje oružja, načinu vođenja evidencije i medicinske dokumentacije, razmjeni podataka o izdatim ljekarskim uvjerenjima i promjenama u pogledu zdravstvene sposobnosti imaoca oružja, sadržaju uvjerenja o izvršenom zdravstvenom pregledu, naknadi u vezi sa utvrđivanjem zdravstvene sposobnosti, te drugim pitanjima od značaja za utvrđivanje zdravstvene sposobnosti (član 16. ovog zakona).

Član 82.

(Obaveza prijave oružja kategorije C)

Lice koje posjeduje oružje kategorije C, a za koje po ranije važećim propisima nije bila propisana obaveza prijavljivanja dužno je da takvo oružje prijavi nadležnoj policijskoj upravi u roku od 12 mjeseci od dana stupanja na snagu ovog zakona.

Član 83.

(Važenje isprava o oružju i obaveza davanja saglasnosti)

- (1) Isprave o oružju izdate u skladu sa odredbama propisa koji se stavlja van snage ovim zakonom ostaju važeći do promjene bilo kojeg podatka, odnosno činjenice upisane u iste.
- (2) Lica kojima je izdata isprava o oružju po odredbama propisa koji se stavlja van snage ovim zakonom, dužna su u roku od šest mjeseci od dana stupanja na snagu podzakonskog propisa propisanog ovim zakonom dostaviti izjavu iz člana 11. stav (5) tačka c) ovog zakona.

Član 84.

(Usklađivanje obavljanja djelatnosti)

- (1) Pravno lice i obrtnik koji obavlja djelatnost prometa oružja, bitnih dijelova oružja, municije i bitnih dijelova municije, popravljanja, modifikacije, prepravljanja oružja, trajnog onesposobljavanja oružja ili osnivanja civilnih strelišta, dužno je svoju djelatnost uskladiti sa odredbama ovog zakona i odgovarajućih podzakonskih propisa iz člana 81. ovog zakona u roku od šest mjeseci od dana stupanja na snagu podzakonskih propisa.
- (2) Pravnom licu i obrtniku iz stava (1) ovog člana, koji u roku iz stava (1) ovog člana ne podnese zahtjev nadležnoj policijskoj upravi u cilju usklađivanja poslovanja sa odredbama ovog zakona, nadležna policijska uprava rješenjem zabranjuje daljnje obavljanje djelatnosti.

Član 85.

(Amnestija)

- (1) Lice koje na dan stupanja na snagu ovog zakona posjeduje oružje kategorije A, A1 i B suprotno odredbama čl. 11. stav (1) i 21. stav (1) ovog zakona obavezno je da ga odmah preda nadležnoj policijskoj upravi.
- (2) Lice koje dobrovoljno preda oružje iz stava (1) ovog člana neće odgovarati za nelegalno posjedovanje u skladu sa odredbama ovog zakona.
- (3) Mjere i radnje koje poduzima Uprava policije na provođenju amnestije za nelegalno posjedovanje oružja iz stava (1) ovog člana, kao i u vezi legalizacije oružja iz člana 86. ovog zakona, utvrđuju se podzakonskim propisom koji na prijedlog policijskog komesara donosi ministar.

Član 86.

(Legalizacija oružja)

- (1) Lice koje posjeduje oružje kategorije A1 i B bez isprave o oružju, a koje prema ranije važećim propisima nije registrovano, dužno je najkasnije u roku od tri godine od dana stupanja na snagu ovog zakona nadležnoj policijskoj upravi podnijeti zahtjev za registraciju i izdavanje isprave o oružju.
- (2) Prilikom podnošenja zahtjeva iz stava (1) ovog člana, lice nije dužno da dokazuje porijeklo oružja.
- (3) Isprava o oružju se neće izdati licu koje ne ispunjava uslove iz člana 11. st. (4), (5) i (6) ovog zakona kao i kada se oružje potražuje od nadležnih organa i u slučaju kada je oružje već registrovano.
- (4) U slučaju iz stava (3) ovog člana nadležna policijska uprava će oduzeti oružje, o čemu se donosi posebno rješenje.
- (5) Nakon pravosnažnosti rješenja iz stava (4) ovog člana oružje će se dostaviti komisiji iz člana 57. ovog zakona na dalje postupanje.

Član 87.

(Primjena propisa iz oblasti upravnog postupka)

Na sva pitanja postupka koja nisu uređena ovim zakonom, primjenjuju se odredbe propisa kojim je uređena oblast upravnog postupka.

Član 88.

(Primjena propisa koji uređuju oblast agencija i unutrašnjih službi za zaštitu ljudi i imovine)

Odredbe ovog zakona primjenjuju se na pravna lica koja obavljaju poslove fizičke i tehničke zaštite, ukoliko nisu u suprotnosti sa odredbama propisa koji uređuju oblast agencija i unutrašnjih službi za zaštitu ljudi i imovine.

Član 89.

(Primjena propisa koji uređuju oblast zaštite ličnih podataka)

Svi subjekti koji na bilo koji način primjenjuju odredbe ovog zakona, dužni su obradu ličnih podataka vršiti u skladu sa odredbama propisa koji uređuju oblast zaštite ličnih podataka.

Član 90.

(Prestanak važenja ranijeg propisa)

Danom stupanja na snagu ovog zakona prestaje da važi Zakon o nabavljanju, držanju i nošenju oružja i municije ("Službene novine Kantona Sarajevo", br. 1/18, 13/18-Ispravka i 30/19).

Član 91.

(Primjena podzakonskih propisa)

Do donošenja podzakonskih propisa iz člana 81. ovog zakona primjenjivat će se podzakonski propisi doneseni na osnovu Zakona o nabavljanju, držanju i nošenju oružja i municije („Službene novine Kantona Sarajevo“, br. 1/18, 13/18 - Ispravka i 30/19).

Član 92.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj _____/
____. ____ 20__ . godine
Sarajevo

**Predsjedavajući
Skupštine Kantona Sarajevo
Elvedin Okerić**

O B R A Z L O Ž E N J E

I – PRAVNI OSNOV

Pravni osnov za donošenje ovog Zakona sadržan je u odredbama člana 18. tačka b) Ustava Kantona Sarajevo (“Službene novine Kantona Sarajevo”, br. 1/96, 2/96, 3/96, 16/97, 14/00, 4/01, 28/04, 6/13 i 31/17), kojima je utvrđena zakonodavna funkcija Skupštine Kantona Sarajevo.

II – RAZLOZI ZA DONOŠENJE ZAKONA

Razlog donošenja ovog Zakona je usklađivanje odredbi Zakona o nabavljanju, držanju i nošenju oružja i municije (“Službene novine Kantona Sarajevo”, br. 1/18, 13/18 – ispravka i 30/19) sa međunarodnim standardima, odnosno aktima Evropske unije sadržanih u Direktivi (EU) 2021/555 od 24. marta 2021. godine o nadzoru nabavljanja i posjedovanja oružja (kodificirani tekst – objedinjene Direktive sa izmjenama), kao i radi jasnijeg i preciznijeg određivanja pojedinih normi koji za cilj imaju lakšu primjenu i provedbu Zakona, kako u odnosu na građane, pravna lica i obrtnike, tako i u odnosu na ovlaštena službena lica koja primjenjuju odredbe Zakona i vode računa o provedbi istog.

Skupština Kantona Sarajevo je na 29. Radnoj sjednici održanoj dana 06.03.2026. godine zaključkom broj 01-02-7780/26 od 06.03.2026. godine, utvrdila Nacrt Zakona o izmjenama i dopunama Zakona o policijskim službenicima Kantona Sarajevo. U tački 3. utvrđeno je da će se javna rasprava održati u kantonalnim organima uprave, jedinicama lokalne samouprave, kantonalnim ustanovama i javnim preduzećima trajat će 15 dana. Skupština Kantona Sarajevo je zadužila Vladu Kantona Sarajevo nakon provedene javne rasprave dostavi Izvještaj o rezultatima javne rasprave koja sadrži primjedbe, prijedloge i mišljenja kao da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Zakona o izmjenama i dopunama Zakona o unutrašnjim poslovima Kantona Sarajevo.

Ministarstvo unutrašnjih poslova Kantona Sarajevo je predložilo Službi za skupštinske poslove da učesnici javne rasprave na Nacrt Zakona o nabavljanju, držanju i nošenju oružja i municije budu kantonalni organi uprave, jedinice lokalne samouprave, kantonalne ustanove i javna preduzeća.

Klub zastupnika SDP-BiH u Skupštini Kantona Sarajevo dostavio je dana 19.03.2026. godine prijedloge za izmjene na Nacrt Zakona o nabavljanju, držanju i nošenju oružja i municije i predložio sljedeće izmjene:

-izmjenu člana 6. stav (1) tačka e) Nacrta zakona gdje se startni pištolj i revolver odnosno oružje za uzbuđivanje i signalizaciju svrstavaju u kategoriju D, bez obaveze prijave uz zadržavanje zabrane njihove prepravke i svih snakcija za zloupotrebu;

-izmjenu člana 11. stav (7) Nacrta zakona u smislu da se uvede rok organu koji izdaje odobrenje za nabavljanje oružja iste vrste za koje je već ranije izdalo dozvolu;

-izmjenu člana 14. stav (2) Nacrta zakona da se iz predloženog teksta izbrišu riječi kao i sva lica koja su članovi sportske streljačke organizacije i aktivno se bave sportskim streljaštvom;

-izmjenu član 26. Nacrta zakona u smislu razrađivanja načina sigurnosti prilikom spravljanja municije kako bi navedena norma bila u praksi bila provođena.

-izmjenu člana 27. Nacrta zakona u smislu dopune istog sa riječima kapisla;

-izmjenu člana 33. Nacrta zakona u smislu omogućavanja kolekcionarima mogućnosti da nabavljaju oružje iz kategorije A.

-izmjenu člana 53. stav (4) u smislu zaštite oduzetog oružja od oštećenja tako što bi se na postojeći tekst dodale riječi „sa naročitom pažnjom u pravilnom čuvanju, održavanju u ispravnom stanju“.

Predlagač je gore navedene primjedbe i prijedloge djelimično prihvatio na sljedeći način:

- Prijedlog za izmjenu člana 6. stav (1) tačka e) Nacrta zakona se prihvata. Obzirom da su i po trenutnom važećem zakonu startni pištolj i revolver odnosno oružje za uzbunjivanje i signalizaciju svrstavaju u kategoriju D i da u praksi nema negativnih pojava u vezi navedenog predlagač smatra da je navedeni prijedlog prihvatljiv.

- Prijedlog za izmjenu člana 11. stav (7) Nacrta zakona u smislu da se uvede rok organu koji izdaje odobrenje za nabavljanje oružja iste vrste za koje je već ranije izdalo dozvolu predlagač smatra neprihvatljivim, obzirom da su Zakonom o upravnom postupku definisani rokovi za postupanje organa uprave koji se mogu skratiti do 15 dana, a takođe moguće je podzakonskim propisom utvrditi da se Komisija koja razmatra zahtjeve sastaje dva puta u mjesecu, pa bi se time ubrzao proces utvrđivanja ispunjavanja uslova za navedena lica i u nekim slučajevima bi bio ispod osam dana kako je to predloženo u prijedlogu. Shodno navedenom predlagač smatra da bi uvođenje traženog roka dovelo do opterećavanja rada organa, te prouzrokovalo potrebu za proširivanjem sistematizacije radnih mjesta povećanjem broja zaposlenika na poslovima izdavanja odobrenje za nabavljanje oružja što bi dodatno opteretilo Budžet Kantona Sarajevo.

-Prijedlog izmjene člana 14. stav (2) Nacrta zakona da se iz predloženog teksta izbrišu riječi kao i sva lica koja su članovi sportske streljačke organizacije i aktivno se bave sportskim streljaštvom predlagač smatra prihvatljivim jer se provjera ispunjenosti uslova za dobijanje oružja odnosi na vlasnika oružja, a ne na sportske strijelce odnosno na članove sportske streljačke organizacije. Većina članova sportskih organizacija posjeduje vlastito oružje i obavezni su proći ljekarski pregled.

- Prijedlog za izmjenu člana 26. Nacrta zakona u smislu razrađivanja načina sigurnosti prilikom spravljanja municije kako bi navedena norma bila u praksi lakše provođena, predlagač smatra prihvatljivim navedeni prijedlog te je u tom u smislu modifikovao predloženi tekst od strane Kluba zastupnika SDP-a BiH sa tekstom iz Nacrta zakona, najviše u obezbjeđivanja sigurnosti i čuvanja prilikom spravljanja municije. Navedenom izmjenom radi usaglašavanja teksta zakona mijenjani su i članovi 76. stav (1) tačka c), 79. stav (1) tačka g).

-Prijedlog izmjene člana 27. Nacrta zakona u smislu dopune istog sa riječima kapisla, predlagač smatra prihvatljivim, u smislu lakšeg spravljanja oružja s tim da je dodao u tekst ispravan naziv inicijalna kapisla.

-Prijedlog izmjene člana 33. Nacrta zakona u smislu omogućavanja kolekcionarima mogućnosti da nabavljaju oružje iz kategorije A predlagač smatra ne prihvatljivim obzirom da drugim članovima Nacrta zakona regulisano ko može imati vatreno oružje kategorije A, te da za tu nabavljanje navedene kategorije nisu predviđeni kolekcionari.

-Prijedlog izmjene člana 53. stav (4) u smislu zaštite oduzetog oružja od oštećenja tako što bi se na postojeći tekst dodale riječi „sa naročitom pažnjom u pravilnom čuvanju, održavanju u ispravnom stanju“ predlagač smatra djelimično prihvatljivim u smislu dodavanja riječi „sa naročitom pažnjom te pravilnim čuvanjem“, a ne dodavanjem riječi „ i održavanjem u ispravnom stanju“. Naime dodavanjem riječi „ i održavanjem u ispravnom stanju“ opteretio bi se rad lica koja se brinu o oružju obzirom da bi isti bili obavezni servisirati navedeno oružje što iziskuje dodatno opterećenje na Budžet Kantona Sarajevo u smislu zapošljavanja proširivanja

sistematizacije radnih mjesta koja obavljaju navedene poslove kao i obezbjeđivanja dodatnih prostorija za obavljanje dodatnih radnji koji bila Uprava policije obavezna dodavanjem navedenih riječi. Shodno navedenom predlagač smatra da bi se efekat zaštite oduzetog oružja postigao i dodavanjem riječi „sa naročitom pažnjom te pravilnim čuvanjem“.

Savez praktičnog streljaštva Federacije Bosne i Hercegovine je aktom broj:Dp. 184-03/26 od 23.03.2026. godine dostavio prijedloge za izmjene na Nacrt Zakona o nabavljanju, držanju i nošenju oružja i municije i predložio sljedeće izmjene:

-izmjenu člana 11. stav (7) Nacrta zakona u smislu da se uvede rok organu koji izdaje odobrenje za nabavljanje oružja iste vrste za koje je već ranije izdalo dozvolu;

-izmjenu člana 14. stav (2) Nacrta zakona da se iz predloženog teksta izbrišu riječi kao i sva lica koja su članovi sportske streljačke organizacije i aktivno se bave sportskim streljaštvom;

-izmjenu član 26. Nacrta zakona u smislu razrađivanja načina sigurnosti prilikom spravljanja municije kako bi navedena norma bila u praksi bila provođena.

-izmjenu člana 27. Nacrta zakona u smislu dopune istog sa riječima kapisla;

-Izmjena člana 43. stav (3) Nacrta zakona u smislu da se na predloženi tekst Nacrta zakona dodaju riječi „ili sportskoj streljačkoj organizaciji“.

Predlagač je gore navedene primjedbe i prijedlozge djelimično prihvatio

- Prijedlog za izmjenu člana 11. stav (7) Nacrta zakona u smislu da se uvede rok organu koji izdaje odobrenje za nabavljanje oružja iste vrste za koje je već ranije izdalo dozvolu predlagač smatra neprihvatljivim, obzirom da su Zakonom o upravnom postupku definisani rokovi za postupanje organa uprave koji se mogu skratiti do 15 dana, a takođe moguće je podzakonskim propisom utvrditi da se Komisija koja razmatra zahtjeve sastaje dva puta u mjesecu, pa bi se time ubrzao proces utvrđivanja ispunjavanja uslova za navedena lica i u nekim slučajevima bi bio ispod osam dana kako je to predloženo u prijedlogu. Shodno navedenom predlagač smatra da bi uvođenje traženog roka dovelo do opterećavanja rada organa, te prouzrokovalo potrebu za proširivanjem sistematizacije radnih mjesta povećanjem broja zaposlenika na poslovima izdavanja odobrenje za nabavljanje oružja što bi dodatno opteretilo Budžet Kantona Sarajevo.

-Prijedlog izmjene člana 14. stav (2) Nacrta zakona da se iz predloženog teksta izbrišu riječi kao i sva lica koja su članovi sportske streljačke organizacije i aktivno se bave sportskim streljaštvom predlagač smatra prihvatljivim jer se provjera ispunjenosti uslova za dobijanje oružja odnosi na vlasnika oružja, a ne na sportske strijelce odnosno na članove sportske streljačke organizacije. Većina članova sportskih organizacija posjeduje vlastito oružje i obavezni su proći lječarski pregled.

- Prijedlog za izmjenu člana 26. Nacrta zakona u smislu razrađivanja načina sigurnosti prilikom spravljanja municije kako bi navedena norma bila u praksi lakše provođena, predlagač smatra prihvatljivim navedeni prijedlog te je u tom u smislu modifikovao predloženi tekst od strane Kluba zastupnika SDP-a BiH sa tekstom iz Nacrta zakona, najviše u obezbjeđivanja sigurnosti i čuvanja prilikom spravljanja municije. Navedenom izmjenom radi usaglašavanja teksta zakona mijenjani su i članovi 76. stav (1) tačka c), 79. stav (1) tačka g).

-Prijedlog izmjene člana 27. Nacrta zakona u smislu dopune istog sa riječima kapisla, predlagač smatra prihvatljivim, u smislu lakšeg spravljanja oružja s tim da je dodao u tekst ispravan naziv inicijalna kapisla.

- Prijedlog izmjena člana 43. stav (3) Nacrta zakona u smislu da se na predloženi tekst Nacrta zakona dodaju riječi „ili sportskoj streljačkoj organizaciji“, predlagač smatra prihvatljivim iz razloga što sportske streljačke organizacije dobijaju odobrenja od nadležnih Policijskih uprava i moraju imati održeni magacinski prostor i sefove za smještaj oružja, te shodno tome ispunjavaju

sve uslove za mogu vlasnici oružja ukoliko napuštaju mjesto prebivališta da predaju isto i sportskim streljačkim organizacijama.

Na 29. radnoj sjednici Skupštine Kantona Sarajevo održanoj dana 06.03.2026. godine, prilikom rasprave o Nacrtu Zakona o nabavljanju, držanju i nošenju oružja i municije zastupnik u Skupština Kantona Sarajevo Selmanović Faruk istakao je sljedeće primjedbe na gore navedeni Nacrt zakona

-u smislu člana 5. stava (1) tačke a) podtačke 15) Nacrta Zakona koja definiše pojam staro oružje u kojem je naveo da prema Nacrtu zakona navedeno oružje bi moralo biti uništeno ili onesposobljeno.

-u smislu člana 11. stav (5) tačka c) da bi dozvoljavanje na osnovu izjave lica da policijski službenici ulaze u privatni posjed bilo suprotno članom 8. Evropske konvencije o ljudskim pravima;

-u smislu da se pravi dodatni pritisak na zdravstvene ustanove u smislu provjere zdravstvene sposobnosti svakih pet godina.

Predlagač je gore navedene primjedbe i prijedloge djelimično prihvatio.

- U smislu člana 5. stava (1) tačke a) podtačke 15) Nacrta Zakona koja definiše pojam staro oružje predlagač smatra primjedbu neprihvatljivom obzirom obzirom da predloženom normom nije određeno da staro oružje mora biti uništeno već da je trajno onesposobljeno za upotrebu.

-U smislu člana 11. stav (5) tačka c) da bi dozvoljavanje na osnovu izjave lica da policijski službenici ulaze u privatni posjed bilo suprotno članom 8. Evropske konvencije o ljudskim pravima primjedbu smatramo prihvatljivom te je predlagač u tom smislu izmjenio tekst norme i dodao riječi „da ispunjava uslove za siguran smještaj i čuvanje oružja o čemu daje pismenu izjavu na obrascu propisanom podzakonskim propisom koji, na prijedlog policijskog komesara, donosi ministar. A brisan dio teksta „i saglasnost za pregled i kontrolu smještaja prilikom podnošenja zahtjeva“, a sve u cilju da bi onemogućilo eventualno kršenja ljudskih prava vlasnika oružja u smislu da policijskih službenici mogu na osnovu navedene izjave da uđu u stan odnosno kuću vlasnika oružja.

U vezi izmjene navedeni član radi usaglašavanja sa istim izmjenjen je član 76. stav (1) tačka a), član 81. i član 83.

- U smislu da se pravi dodatni pritisak na zdravstvene ustanove u smislu provjere zdravstvene sposobnosti svakih pet godina predlagač smatra da je primjedba neprihvatljiva obzirom da je predlagač je u odnosu na trenutno važeći Zakon, koji propisuje obavezu zdravstvenog pregleda svakih deset godina, ovu odredbu uskladio sa odredbom člana 10. stav (4) Direktive, a koja predviđa obavezu periodičnog preispitivanja izdate dozvole u periodu od najduže pet godina, te je u skladu s tim, predloženim zakonskim rješenjem propisana obaveza provjeravanja daljnijeg ispunjavanja posebnog uslova koji se odnosi na zdravstvenu sposobnost svakih pet godina. Isto se odnosi obrtnike i odgovorna lica u pravnom licu.

Predlagač je prilikom analize Nacrta zakona izmjenio član 11. stav 10) u smislu da načelnik nadležne policijske uprave formira komisiju koju čine tri člana i njihovi zamjenici, od kojih su dva člana i zamjenici policijski službenici iz policijske uprave, a jedan član je državni službenik ili namještenik Uprave policije koji rade na poslovima za sprovođenje propisa o oružju, od kojih je jedan član, a drugi zamjenik. Naime norma navedena u Nacrtu zakona je sačinjena za idealne uslove u praksi se može dogoditi situacija da nisu sva radna mjesta u nadležnoj policijskoj upravi popunjena, te da se Komisija ne može formirati. Ovim rješenjem ta mogućnost se onemogućava.

Takođe predlagač je u članovima 5, 14,15, 26, 43, 53, 58, 65, 79, 81 i 91 navedenog Nacrta zakona, modifikovao nomotehnički tekst navedenih članova kako bi norma bila jasnija, te time nije promjenio suštinu predloženih normi.

III OBRAZLOŽENJE PREDLOŽENIH PRAVNIH RJEŠENJA

Prijedlog Zakona podijeljen je i sistematizovan u 10 dijelova koji čine jednu cjelinu.

DIO PRVI – OSNOVNE ODREDBE - uređuje predmet Zakona, primjenu, izuzetke, ravnopravnost spolova, značenje pojmova, kategorizaciju i vrste oružja, kao i ograničenja.

Član 1. – Definiše šta sve propisuje Zakon. U odnosu na odredbe postojećeg Zakona, razlikuje se samo u detaljnijem opisu svih stavki koje su uređene ovim Zakonom.

Član 2. – Propisuje odredbe koje se odnose na primjenu ovog Zakona, a koja podrazumijeva primjenu ovog Zakona kako na domaće, tako i na strane državljanje, sa jednom razlikom u odnosu na trenutno važeći Zakon, a to je da se ovaj Zakon primjenjuje i na strane državljanine koji imaju odobren privremeni boravak duži od godinu dana.

Ovaj član je u stavu (4) precizirao ko sve ima pravo nošenja oružja na području Kantona Sarajevo, a što trenutno važećim zakonom nije bilo regulisano.

Član 3. – Propisuje šta se sve u smislu ovog Zakona ne smatra oružjem i u istom nije bilo značajnih izmjena u odnosu na postojeći Zakon.

Član 4. – Određjuje da gramatička terminologija koja je korištena u ovom Zakonu podrazumijeva uključanje oba spola.

Član 5. – Predstavlja važan član ovog Zakona, jer je ovim članom uređeno pojmovno značenje koje je korišteno u ovom Zakonu. Ovim članom detaljnije su propisani pojmovi koji su razvrstani u posebne grupe i to: oružje, municija, isprave o oružju, subjekti, radnje i ostalo, čime se postiglo usklađivanje sa Direktivom (EU) 2021/555 od 24. marta 2021. godine o nadzoru nabavljanja i posjedovanja oružja (kodificirani tekst – objedinjene Direktive sa izmjenama) (u daljem tekstu “Direktiva”).

Član 6. – Jedan od vrlo značajnih članova ovog Zakona, koji uređuje kategorizaciju oružja, a koja je u ovom Zakonu podijeljena u pet kategorija i to: A, A1, B, C i D.

Ovdje je bitno istaći da uvedena kategorija A1 predstavlja izuzetak od kategorije A, iz razloga što ista propisuje mogućnost izdavanja odobrenja za nabavljanje oružja pravnim i fizičkim licima, kao i obrtnicima koji ispunjavaju posebne dodatne uslove propisane ovim Zakonom, a što je usklađeno sa odredbama člana 9. st. (2) i (6) Direktive, koji glasi: „Države članice mogu sportskim strijelcima odobriti nabavljanje i posjedovanje poluautomatskog vatrenog oružja razvrstanog u tačku 6 ili 7 kategorije A po posebnim uslovima“. Predlagač se opredijelio za ovakovo zakonsko rješenje iz razloga što je propisivanjem kategorije A1 jasno određeno koja lica i pod kojim uslovima mogu ostvariti pravo na nabavku određenog oružja, a što poznaju i zakonodavstva drugih evropskih zemalja (npr. Francuska).

Predlagač je zadržao dosadašnje zakonsko rješenje u pogledu kategorije D, kako bi propisao koje oružje ne podliježe obavezi pribavljanja prethodnog odobrenja, odnosno prijavljivanja istog nadležnom organu, a što nije u suprotnosti sa Direktivom, te je prepoznato i u drugim zakonodavstvima zemalja Evropske unije (Slovenija, Hrvatska, Češka, Francuska itd).

U skladu sa iznesenim ostale kategorije su usklađene i upotpunjene, te preciznije definisane.

Član 7. – Definiše ograničenja koja se odnose na nabavljanje, posjedovanje, držanje ili nošenje,

trgovinu i/ili posredovanje vatrenim oružjem, bitnim dijelovima oružja, municije i dijelova municije, usklađeno sa prethodnim članom koji uređuje kategorizaciju oružja.

Član 8. – Propisuje vrste oružja kategorije B.

DIO DRUGI – POSTUPAK NABAVLJANJA ORUŽJA I MUNICIJE – uređuje, između ostalog, isprave o oružju, nadležnosti, opće i posebne uslove za nabavljanje oružja, utvrđivanje i promjenu zdravstvene sposobnosti, izdavanje, odbijanje i oduzimanje odobrenja za nabavljanje oružja, registraciju oružja, nabavljanje bitnih dijelova oružja i municije, spravljanje municije, prenos prava vlasništva, nabavku i držanje starog oružja i kolekcionarstvo.

Član 9. – Uređuje šta se sve smatra ispravom o oružju.

Član 10. - Definiše nadležnu policijsku upravu prema teritorijalnom principu (mjestu prebivališta ili boravišta, odnosno sjedišta podnosioca zahtjeva) kao organizacionu jedinicu Uprave policije Ministarstva nadležnu za provođenje Zakona.

Član 11. - Izuzetno značajan član koji propisuje opće i posebne uslove za izdavanje odobrenja za nabavljanje oružja kategorije A1 i/ili B za fizička lica.

Trenutno važeći Zakon svrstava poluautomatsko oružje u kategoriju B, za čije je nabavljanje potrebno prethodno odobrenje nadležnog organa.

Direktivom je ovo oružje kao razvrstano u kategoriju A, odnosno zabranjeno oružje, ali kao izuzetak, odnosno kao oružje čije se nabavljanje može odobriti uz ispunjavanje posebnih uslova. Shodno tome, predlagač je navedeno oružje koje se u važećem Zakonu nalazi u kategoriji B, uvrstio u kategoriju A1, kako bi se kategorizacija uskladila sa Direktivom, a pritom izbjegle nedoumice prilikom primjene zakona, s obzirom na to da je oružje razvrstano u kategoriju A zabranjeno za nabavljanje.

Nadalje, kada je u pitanju izvršenje krivičnih djela, propisano je da je smetnja za izdavanje odobrenja kada je protiv lica potvrđena optužnica, kada se vodi krivična istraga za krivična djela propisana krivičnim zakonodavstvom u Bosni i Hercegovini za koja je propisana kazna zatvora od pet godina i više, ili za druga djela kod kojih je radnja izvršenja nasilje, što pretstavlja preciznije definisanje norme u odnosu na važeći Zakon.

Norma je preciznije definisana i kada je riječ o prekršajima, gdje je propisano da je smetnja za izdavanje odobrenja za nabavljanje oružja ukoliko je lice kažnjavano za prekršaj protiv javnog reda i mira s obilježjem nasilja, prekršaj propisan ovim Zakonom za koji mu je izrečena zaštitna mjera oduzimanja oružja, bitnih dijelova oružja i municije, prekršaj s obilježjem nasilja propisan drugim zakonom ili ako mu je u skladu sa zakonom o zaštiti od nasilja u porodici izrečena zaštitna mjera.

Nadalje, u odnosu na postojeće zakonsko rješenje, kao uslov za nabavljanje oružja propisano je da lice ukoliko nema dug u Registru novčanih kazni.

Osim gore navedenog, a u odnosu na raniji zakon, u dijelu koji se odnosi na ispunjavanje općih uslova, propisano je da se odobrenje za nabavljanje oružja neće izdati i licu ukoliko su izraženo poremećeni porodični odnosi, ukoliko postoje kriminalističko-obavještajni razlozi i razlozi koji ukazuju na povezanost sa licima evidentiranim u kriminalističko-obavještajnim evidencijama.

Kada su u pitanju posebni uslovi, pored zdravstvene sposobnosti za držanje i nošenje oružja, raspolaganja tehničkim znanjem za pravilno rukovanje oružjem i poznavanja propisa koji se odnose na držanje i nošenje oružja, uvodi se još jedan poseban uslov, a to je da lice ispunjava uslove za siguran smještaj i čuvanje oružja.

U odnosu na raniji zakon, drugačije je precizirana mogućnost nabavljanja poluautomatskog oružja, tako da pored općih i posebnih uslova podnosilac zahtjeva mora ispunjavati i dodatne uslove, a to su: da je član streljačkog kluba, da aktivno vježba za sudjelovanje u streljačkim takmičenjima i da se redovno, najmanje 12 mjeseci, bavi streljaštvom.

Nadalje, ovaj član određuje da se neće sprovesti postupak za utvrđivanje općih i posebnih uslova za podnosioca zahtjeva koji već ima važeći oružni list, kao i ovlaštenje nadležne policijske uprave da može vršiti provjere ispunjavanja općih i posebnih uslova lica kojem je izdat oružni list.

Također, u odnosu na raniji zakon, ukoliko fizičko lice koje posjeduje oružni list za oružje koje je ranije nabavilo na osnovu izdatog odobrenja za nabavljanje oružja, podnese zahtjev za izdavanje odobrenja za nabavljanje oružje druge vrste i kategorije, utvrđivat će se samo posebni uslovi i to: da poznaje propise koji se odnose na držanje, čuvanje i nošenje oružja, da raspolaže tehničkim znanjem za pravilno rukovanje oružjem i da ispunjava uslove za siguran smještaj i čuvanje oružja, kao i uslove koji se odnose na članstvo u streljačkom klubu i na aktivno bavljenje streljaštvom.

Ovim članom propisana je i obaveza formiranja komisija pri policijskim upravama koje će neposredno cijeniti ispunjavanje i opravdanost zahtjeva za dobijanje odobrenja za nabavljanje oružja.

Član 12. - Propisuje način utvrđivanja općih uslova za izdavanje odobrenja za nabavljanje oružja fizičkim licima.

Član 13. - Propisuje način utvrđivanja opravdanog razloga za nabavljanje oružja i drugih okolnosti.

Član 14. - Propisuje način dokazivanja ispunjavanja prvog posebnog uslova, koji se odnosi na zdravstvenu sposobnost podnosioca zahtjeva za držanje i nošenje oružja, kao i važenje uvjerenja o zdravstvenoj sposobnosti za držanje i nošenje oružja. Predlagač je u odnosu na trenutno važeći Zakon, koji propisuje obavezu zdravstvenog pregleda svakih deset godina, ovu odredbu uskladio sa odredbom člana 10. stav (4) Direktive, a koja predviđa obavezu periodičnog preispitivanja izdate dozvole u periodu od najduže pet godina, te je u skladu s tim, predloženim zakonskim rješenjem propisana obaveza provjeravanja daljnjeg ispunjavanja posebnog uslova koji se odnosi na zdravstvenu sposobnost svakih pet godina. Isto se odnosi obrtnike i odgovorna lica u pravnom licu.

Član 15. - Vrlo značajan član koji u svom prvom stavu daje imperativnu dužnost zdravstvenoj ustanovi i svakom drugom licu (npr. ljekaru) koje ima saznanja o promjeni zdravstvenog stanja imaoaca oružja, a koje može utjecati na sposobnost držanja i nošenja oružja, da odmah po saznanju za takvu promjenu obavijeste nadležnu policijsku upravu ili najbližu policijsku stanicu. Navedena odredba je preventivnog karaktera i ima za cilj podizanje nivoa sigurnosti građana Kantona Sarajevo. Nadalje, ovaj član sadrži i odredbe o upućivanju na vanredni zdravstveni pregled, rokove i troškove zdravstvenog pregleda.

Član 16. - Daje obavezu ministru zdravstva Kantona Sarajevo, da u saradnji s Ministarstvom unutrašnjih poslova Kantona Sarajevo (u daljnjem tekstu: Ministarstvo) donese podzakonski akt koji se odnosi na utvrđivanje zdravstvene sposobnosti lica za držanje i nošenje oružja i postupke.

Član 17. - Propisuje način utvrđivanja poznavanja propisa koji se odnose na držanje, čuvanje i nošenje oružja i tehničkog znanja, izuzetke od obaveze obuke, nosioce osposobljavanja, kao i obavezu ministra da na prijedlog policijskog komesara donese propis u navedenoj oblasti. Za razliku od trenutnog zakonskog rješenja, koje poznaje dvije odvojene obuke i to: poznavanje propisa, dio koji provodi Ministarstvo i raspolaganje oružjem, dio koji provodi stručna ovlaštena

organizacija, predloženo zakonsko rješenje predviđa da kompletnu obuku provodi stručna ovlaštena organizacija, a ispit o poznavanju propisa i usvojenim tehničkim znanjima, koji se odnosi na držanje, čuvanje i nošenje oružja provodi komisija koju na prijedog policijskog komesara formira ministar.

Član 18. - Određuje rok u kojem se moraju dostaviti dokazi o ispunjavanju posebnih uslova, te postupak u slučaju nedostavljanja dokaza o ispunjavanju posebnih uslova u propisanom roku.

Član 19. - Definiše ko donosi rješenje kojim se odobrava nabavljanje vatrenog oružja kategorije A1 i/ili B fizičkom licu koje ispunjava zakonom propisane uslove. Također, istim članom je propisan rok važenja tog rješenja, kao i obaveze lica koje nije realizovalo nabavku u zakonom propisanom roku.

Član 20. – Preciznije definiše odbijanje zahtjeva fizičkog lica za izdavanje odobrenja za nabavljanje oružja. Naime, rješenje kojim se odbija zahtjev za izdavanje odobrenja za nabavljanje oružja kategorije A1 i/ili B sadrži razloge odbijanja, osim ukoliko bi to bilo u suprotnosti sa odredbama zakona kojima je regulisan krivični postupak. Također, u obrazloženju rješenja kojim se odbija zahtjev za izdavanje odobrenja za nabavljanje oružja kategorije A1 i/ili B fizičkom licu, zbog određenih okolnosti propisanih ovim Zakonom, nadležna policijska uprava nije obavezna navoditi načine utvrđivanja i pribavljanja podataka kojima se rukovodila prilikom donošenja rješenja, a ukoliko se zahtjev odbija zbog kriminalističko-obavještajnih razloga ili zbog razloga koji ukazuju na povezanost sa licima evidentiranim u kriminalističko-obavještajnim evidencijama, neće posebno obrazlagati utvrđeno činjenično stanje. U skladu sa odredbama člana 11. Zakona o upravnim sporovima („Službene novine Federacije BiH“, broj: 9/05), propisano je da se u predmetu ne može voditi upravni spor.

Član 21. - Propisuje uslove za izdavanje odobrenja za nabavljanje oružja za pravna lica i obrtnike. Ovim članom su propisani i opravdani razlozi nabavljanja oružja za pravna lica i obrtnike. U odnosu na raniji Zakon, uvedna je novina koja se odnosi na mogućnost nabavljanja oružja kategorije A pravnim licima i obrtnicima kada je to potrebno za obrazovne, istraživačke, historijske ili kulturne svrhe, kao i za prevoz, čuvanje izuzetno opasnih ili visokovrijednih transporta ili čuvanje infrastrukture od vitalnog značaja i osjetljivih prostora, a što je usklađeno sa odredbama člana 9. stav (2) Direktive, te je nadalje predviđeno da jedan od uslova za izdavanje odobrenja za nabavljanje oružja pravnom licu/obrtniku bude to da pravno lice odnosno obrtnik nije pravosnažno kažnjeno po odredbama zakona koji reguliše oblast oružja.

Shodno navedenim odredbama, pravnim licima koja postupaju u skladu s odredbama Zakona o agencijama i unutrašnjim službama za zaštitu ljudi, nadležna policijska uprava može izdati odobrenje za nabavljanje i držanje oružja uz prethodnu saglasnost Federalnog ministarstva unutrašnjih poslova. U okviru svojih nadležnosti i ovlaštenja komisija će cijeliti ispunjavanje i opravdanost zahtjeva za dobijanje odobrenja za nabavljanje oružja za pravna lica i obrtnike, a u skladu s odredbama ovog Zakona.

Član 22. - Definiše povjeravanje nošenja oružja u pravnom licu i kod obrtnika. Naime, pravna lica i obrtnici, koji drže oružje na osnovu Zakona, mogu povjeriti njegovo nošenje samo licima koja ispunjavaju uslove propisane Zakonom, a lica kojima je oružje povjereno mogu njime rukovati samo za vrijeme obavljanja poslova u objektu, odnosno u prostoru u kojem se obavlja djelatnost i pravcu kretanja lica i transporta koji obezbjeđuju. U vremenskom periodu dok se oružje ne koristi, čuva se na bezbjednom mjestu tako da pristup tom oružju ne mogu imati neovlaštena lica.

Član 23. - Propisuje postupanje po zahtjevu za izdavanje odobrenja za nabavljanje oružja pravnom licu i obrtniku. Nadležna policijska uprava rješenjem odobrava nabavljanje oružja

kategorije A, A1 i/ili B pravnom licu i obrtniku ukoliko ispunjava uslove propisane Zakonom, a pravno lice i obrtnik kojem je rješenjem odobreno nabavljanje, a oružje nije nabavio u roku, dužan je vratiti rješenje u roku od osam dana od dana isteka roka važenja nadležnoj policijskoj upravi koja je donijela rješenje. U skladu sa odredbama člana 11. Zakona o upravnim sporovima („Službene novine Federacije BiH“, broj: 9/05) propisano je da se u predmetu ne može voditi upravni spor.

Član 24. - Propisuje nabavljanje bitnih dijelova oružja. Vlasnik oružja može nabavljati bitne dijelove oružja na osnovu odobrenje za nabavljanje bitnih dijelova oružja, uz obavezu prijave nadležnoj policijskoj upravi u roku od osam dana od dana nabavljanja. Podaci o nabavljenim dijelovima unose u propisane isprave o oružju i evidenciju, a rješenje kojim je odobreno nabavljanje bitnih dijelova oružja važi šest mjeseci od dana prijema rješenja.

Član. 25. - Propisuje nabavljanje municije. Fizička lica, pravna lica ili obrtnici mogu nabaviti municiju samo za registrovano oružje, izuzev civilnih strelišta i sportskih streljačkih organizacija, koji mogu nabavljati različitu municiju za svoje potrebe i potrebe obuke na osnovu odobrenja o registraciji, o čemu vode propisane evidencije. Nadalje, fizička lica, pravna lica i obrtnici dužni su u roku od osam dana od dana nabavljanja municije o izvršenoj nabavci municije obavijestiti nadležnu policijsku upravu, izuzev ukoliko su municiju nabavili na području Kantona Sarajevo.

Član 26. - Propisuje spravljanje municije. Sportske streljačke i lovačke organizacije i njihovi članovi mogu spravljati municiju za svoje registrovano oružje na osnovu odobrenja za spravljanje municije nadležne policijske uprave. Važno je napomenuti da spravljanje municije za registrovano oružje ne smatra se proizvodnjom municije, a odobrenje će se izdati fizičkom licu ako ispuni zakonom propisane uslove. Također, komisija će cijeniti ispunjavanje i opravdanost zahtjeva za dobijanje odobrenja za spravljanje municije za sportske streljačke i lovačke organizacije, a u skladu s odredbama ovog Zakona.

Član 27. - Propisuje nabavljanje baruta i inicijalnih kapisli u svrhu spravljanja municije, na način da pravna i fizička lica u skladu sa ovim Zakonom, barut u svrhu spravljanja municije, mogu nabavljati na osnovu rješenja nadležne policijske uprave o spravljanju municije.

Član 28. - Propisuje uslove i proceduru oduzimanja odobrenja za nabavljanje oružja fizičkom i pravnom licu, prije izvršene nabavke oružja. U skladu sa odredbama člana 11. Zakona o upravnim sporovima („Službene novine Federacije BiH“, broj: 9/05) propisano je da se u predmetu ne može voditi upravni spor.

Član 29. - Određuje postupak registracije oružja i izdavanje oružnog lista, odnosno odobrenja za držanja oružja, postupak odbijanja zahtjeva za registraciju oružja, kao i postupak oduzimanja oružja i odobrenja. U skladu sa odredbama člana 11. Zakona o upravnim sporovima („Službene novine Federacije BiH“, broj: 9/05) propisano je da se u predmetu ne može voditi upravni spor.

Član 30. - Propisuje uslove i postupak za zamjenu oružja, odnosno prenos prava svojine, korištenja i raspolaganja.

Član 31. - Propisuje izdavanje odobrenja za držanje oružja pravnom licu i obrtniku, rok važenja i postupke pravnih lica i obrtnika, kao i sportskih streljačkih i lovačkih organizacija u slučaju prestanka potrebe za daljnjim držanjem oružja i municije.

Član 32. – Preciznije propisuje da fizičko lice, pravno lice i obrtnik, bez odobrenja, može nabaviti i držati najviše četiri komada starog oružja (definicija starog oružja data u članu 5. stav (1) tačka a), podtačka 15).

Član 33. – Preciznije propisuje postupak za izdavanje odobrenja za sakupljanje starog oružja fizičkom licu, pravnom licu i obrtniku, i to na način da se licima koja se bave sakupljanjem

starog oružja omogućuje nabavka najmanje pet, odnosno deset komada oružja za kolekcionare. U skladu sa odredbama člana 11. Zakona o upravnim sporovima („Službene novine Federacije BiH“, broj: 9/05) propisano je da se u predmetu ne može voditi upravni spor.

Član 34. – Preciznije propisuje postupak nabavljanja oružja kategorije C, uz obavezu prijavljivanja oružja nadležnoj policijskoj upravi.

Član 35. - Propisuje da fizička lica, pravna lica i obrtnici mogu bez odobrenja i prijave nabavljati i držati oružje kategorije D.

DIO TREĆI - POSTUPANJE S ORUŽJEM I MUNICIJOM – uređuje nošenje i prenošenje oružja i municije, zabrane, davanje na poslugu, čuvanje, gubitak ili krađu i pronalazak oružja, predaju oružja i nasljeđivanje.

Član 36. - Opća odredba koja se odnosi na postupanje s oružjem i municijom.

Član 37. - Propisuje određena pravila ponašanja prilikom nošenja i prenošenja oružja i municije, s posebnim akcentom na fizičko i psihičko stanje fizičkog lica, način nošenja oružja na javnim mjestima i dr.

Član 38. - Vrlo značajan član u kojem je posebna pažnja posvećena postupanju s oružjem i municijom, kao i zabrani nošenja oružja i municije na vjerskim, sportskim i drugim javnim okupljanjima, u obrazovnim, zdravstvenim i drugim javnim ustanovama, u prostorijama državnih organa i institucija, ugostiteljskim objektima i prostorima koji se koriste za pružanje ugostiteljskih usluga. Također, ovim članom se propisuje i postupanje sa sportskim oružjem, lovačkim oružjem, kao i sa starim oružjem i trofejnim oružjem, te se propisuju i određene zabrane koje se odnose zabranu popravljivanja, modifikacije, prepravljivanja starog, trofejnog, vazdušnog, gasnog oružja, oružja za uzbunjivanje i signalizaciju, airsoft i paintball naprava i reprodukcija oružja za ispaljivanje bojeve municije, kao i svakog drugog oružja, osim oružja za koje je izdata važeća isprava o oružju. Navedene odredbe doprinose discipliniranju imaoaca oružja čime se u krajnjoj liniji nastoje izbjeći teške i tragične posljedice koje mogu nastupiti.

Član 39. - Propisuje način eventualne upotrebe električnih paralizatora i sprejeva za omamljivanje.

Član 40. - Propisuje davanje vatrenog oružja na poslugu. Naime, davanje vatrenog oružja na poslugu generalno je zabranjeno, uz izuzetke kada se radi o lovačkom i sportskom oružju uz oružni list. Kršenje odredbe ovog člana predstavlja krivično djelo.

Član 41. - Propisuje uslove pod kojima pravna lica koja upravljaju lovištem mogu dati na poslugu lovačko oružje.

Član 42. - Propisuje uslove pod kojima sportske streljačke organizacije mogu dati na poslugu sportsko oružje.

Član 43. - Izuzetno značajan član koji u svojim odredbama propisuje određene postupke koji se odnosi na čuvanje oružja i municije. Značaj ovoj problematici daje i odredba člana 21. stav (8) ovog Zakona kojom se, na prijedlog policijskog komesara, ministar ovlašćuje da posebnim podzakonskim aktom propiše način smještaja i čuvanja oružja i municije.

Član 44. - Propisuje procedure i rokove koje moraju poštovati fizička lica, pravna lica i obrtnici u slučaju gubljenja ili krađe oružja i isprava o oružju.

Član 45. - Propisuje obavezu lica koje pronađe oružje, bitne dijelove oružja, municiju, dijelove municije i isprave o oružju da odmah obavijesti najbliži policijski organ ili policijskog službenika.

Član 46. - Propisuje rokove i obavezu fizičkog lica, pravnog lica i obrtnika da u nadležnoj policijskoj upravi izvrši prijavu promjene prebivališta, odnosno sjedišta kao i ličnog imena i

naziva. Ovaj član propisuje i obavezu fizičkog lica da preda oružje nadležnoj policijskoj upravi u slučaju kada mu pravosnažnom odlukom prestane državljanstvo Bosne i Hercegovine.

Član 47. – Propisuje mogućnost vlasnika registrovanog oružja da dobrovoljno i bez prava na naknadu preda oružje policijskoj upravi na uništenje ili u korist Uprave policije Ministarstva unutrašnjih poslova Kantona Sarajevo.

Član 48. – Propisuje obavezu, rok i način postupanja vlasnika dotrajalog oružja za koje ne postoji mogućnost popravke.

Član 49. – Propisuje postupak u slučaju smrti vlasnika oružja. U odnosu na trenutno važeći Zakon, ovim članom su propisani kraći rokovi za postupanje sa oružjem u slučaju smrti vlasnika oružja. Nadalje, propisano je i postupanje Uprave policije sa oružjem u situacijama kada nakon smrti lica nije pokrenut ostavinski postupak, kao i obaveza nadležnih policijskih uprava da prate i ažuriraju evidenciju vlasnika oružja u skladu sa prijavljenim podacima u civilnom registru.

Član 50. – Propisuje postupak sa naslijeđenim oružjem i municijom. Predloženo zakonsko rješenje predviđa kraći rok za postupanje nasljednika s oružjem nakon provedenog ostavinskog postupka.

DIO ČETVRTI- ODUZIMANJE ORUŽJA, MUNICIJE I ISPRAVA O ORUŽJU – uređuje oblast oduzimanja oružja i postupak sa oduzetim oružjem, municijom i ispravama o oružju.

Član 51. – Propisuje slučajeve u kojima će nadležna policijska uprava donijeti rješenje o oduzimanju oružja i municije i isprava o oružju od fizičkog lica. U skladu sa odredbama člana 11. Zakona o upravnim sporovima („Službene novine Federacije BiH“, broj: 9/05) propisano je da se u predmetu ne može voditi upravni spor.

Član 52. – Propisuje obavezu nadležne policijske uprave da oduzme oružje, municiju i isprave o oružju vlasniku oružja koji je na vanrednom zdravstvenom pregledu ocijenjen nesposobnim za držanje i nošenje oružja, kao i onom licu koje u roku propisanom članom 15. stav (3) ovog Zakona ne dostavi uvjerenje o zdravstvenoj sposobnosti.

Član 53. – Propisuje slučajeve u kojima se privremeno oduzimaju oružje, municija i isprave o oružju.

Član 54. – Propisuje u kojim situacijama će nadležna policijska uprava donijeti rješenje o oduzimanju oružja i municije i isprava o oružju od pravnog lica i obrtnika. U skladu sa odredbama člana 11. Zakona o upravnim sporovima („Službene novine Federacije BiH“, broj: 9/05) propisano je da se u predmetu ne može voditi upravni spor.

Član 55. – Uređuje oblast postupanja sa oružjem, municijom i ispravama o oružju koje su oduzete u prekršajnom ili krivičnom postupku.

Član 56. – Propisuje postupanje sa oružjem i municijom, kao i ispravama o oružju, koje su oduzete u upravnom postupku, ali sa određenim izmjenama u odnosu na trenutno važeći zakon u smislu ostavljanja mogućnosti vlasniku oružja da oduzeto oružje proda, pokloni, onesposobi ili preda u korist Uprave policije.

Član 57. – Propisuje obavezu ministra da na prijedlog policijskog komesara formira komisiju i donese podzakonski akt o njenom radu, koja će imati zadatak da postupa sa oduzetim i predatim oružjem, bitnim dijelovima oružja, municijom i dijelovima municije. U odnosu na trenutno važeći zakon, komisija će odlučivati o tome da li će se oduzeto i predato oružje, bitni dijelovi oružja, municija i dijelovi municije uništiti ili zadržati za potrebe Uprave policije.

DIO V – POPRAVLJANJE, MODIFIKACIJA, PREPRAVLJANJE I ONESPOSOBLJAVANJE ORUŽJA – uređuje oblast popravljanja, modifikacije, prepravljanja i onesposobljavanja oružja, kao i odredbe o evidencijama.

Član 58. – Propisuje ko se može baviti popravljanjem, modifikacijom, prepravljanjem i onesposobljavanjem oružja.

Član 59. – Propisuje proceduru u popravljanja, modifikacije, prepravljanja, onesposobljavanja i postupanja sa oružjem.

Član 60. – Uređuje oblast onesposobljavanja oružja u smislu da propisuje u kojoj proceduri se može onesposobiti oružje, kao i da će se sam način onesposobljavanja propisati podzakonskim aktom koji na prijedlog policijskog komesara donosi ministar.

Član 61. – Propisuje evidencije koje moraju voditi pravna lica i obrtnici koji se bave popravkom, modifikacijom, prepravkom i onesposobljavanjem oružja.

DIO VI – PROMET ORUŽJA, BITNIH DIJELOVA ORUŽJA, MUNICIJE I BITNIH DIJELOVA MUNICIJE – uređuje promet i posredovanje u prometu oružjem, bitnim dijelovima oružja, municije i bitnim dijelovima municije.

Član 62. – Uređuje koja pravna lica i obrtnici, odnosno trgovci i/ili posrednici oružjem, mogu da se bave prometom i posredovanjem oružja, bitnih dijeova oružja, municije i bitnih dijelova municije.

Član 63. – Propisuje proceduru nabavljanja oružja, bitnih dijelova oružja, municije i dijelova municije u svrhu daljeg prometa.

Član 64. - Ovaj član propisuje proceduru prodaje oružja, bitnih dijelova oružja, municije i dijelova municije. U odnosu na postojeće zakonsko rješenje, a u svrhu usklađivanja sa Direktivom, umjesto termina "Ovlašteni prodavac" koristit će se termin "Trgovac oružjem".

Član 65. - Propisuje utvrđivanje uslova za promet oružja, bitnih dijelova oružja, municije i dijelova municije,

Član 66. - Propisuje obaveze trgovca oružjem.

DIO VII – CIVILNO STRELIŠTE – propisuje uslove za osnivanje i korištenje civilnih strelišta.

Član 67. - Propisuje uslove za osnivanje i korištenje civilnog strelišta.

Član 68. - Propisuje da postojanje uslova za osnivanje i korištenje civilnog strelišta utvrđuje komisija.

Član 69. - Propisuje mjere i radnje na civilnom strelištu.

Član 70. - Propisuje usklađivanje rada civilnih strelišta, te je u odnosu na postojeće zakonsko rješenje izmijenjen rok osnivaču civilnog strelišta da uskladi svoj rad sa zakonskim i podzakonskim propisim, koji je umjesto dosadašnjih devet mjeseci, smanjen na rok od šest mjeseci.

DIO VIII- EVIDENCIJE I NADZOR NAD SPROVOĐENJEM ZAKONA – uređuje oblast evidencija i nadzora nad primjenom ovog Zakona.

Član 71. – Propisuje evidencije koje vode pravna lica i obrtnici kao i drugi subjekti, a koje su u odnosu na trenutno važeći Zakon unaprijeđene i prilagođene ovom nacrtu Zakona.

Član 72. - Propisuje evidencije koje vodi Uprava policije, a koje su u odnosu na trenutno važeći Zakon unaprijeđene i prilagođene ovom nacrtu Zakona.

Član 73. - Detaljno propisuje ovlaštenja nadležne policijske uprave, odnosno Komisije iz člana 11. stav (10) ovog Zakona, kao i način postupanja iste prilikom vršenja neposrednog nadzora.

Član 74. - Propisuje da će, u cilju zakonitog rada, provođenja i primjene ovog Zakona od strane nadležnih policijskih uprava, policijski komesar formirati Komisiju za nadzor, a način formiranja i sastav Komisije, nadležnost i način rada, naknadu za rad u Komisiji, kao i druga pitanja od značaja za rad Komisije, na prijedlog policijskog komesara, će propisati ministar.

DIO IX – ODREDBE O SANKCIJAMA – uređuje oblast koja se odnosi na krivična djela, novčane kazne i zaštitne mjere.

Član 75. - Direktiva je utvrdila obavezu uvođenja kazni za nepoštivanje propisa donesenih na osnovu Direktive, a koje moraju biti adekvatne potrebi afirmacije poštovanja tih propisa, odnosno moraju biti učinkovite, proporcionalne i odvraćajuće.

U odredbama o sankcijama u ovom Zakonu izvršena je klasifikacija kršenja pojedinih normi ovog Zakona, tako da je kršenje jednih normi okvalifikovano kao krivično djelo, a drugih kao prekršaj. Članom 75. ovog Zakona propisano je da će se novčanom kaznom ili kaznom zatvora od šest mjeseci do tri godine kazniti za krivično djelo:

- 1) ko bez odobrenja nabavi, drži ili nosi vatreno oružje kategorije A, A1 i B,
- 2) ko proda vatreno oružje kategorije A, A1 i B pravnom licu, obrtniku ili fizičkom licu koji ne posjeduje odobrenje za nabavljanje te vrste oružja i
- 3) ko drugom da vatreno oružje na poslugu ili ko da na poslugu lovačko oružje ili sportsko vatreno oružje licu koje za tu vrstu oružja nema oružni list.

Propisano je i da se za navedena krivična djela obavezno izriče i zaštitna mjera oduzimanja vatrene oružja, a za krivična djela iz tačke 2) i 3) oduzimaju se i isprave o oružju, ukoliko su za isto izdate.

Članovima 76. do 79. - ovog Zakona izvršeno je prilagođavanje kaznene politike novim nacrtom, te su sistematičnije određene prekršajne sankcije, zavisno od prirode i težine prekršaja, kao i drugih značajnih okolnosti za određivanje prekršajne sankcije.

Član 76. - Propisuje 21 prekršaj, odnosno novčanih kazni za prekršaje fizičkim licima, u rasponu od 500,00 do 1.000,00 KM, a od toga za devet prekršaja se zbog njihove težine, obavezno izriče i zaštitna mjera oduzimanja oružja i/ili municije i/ili bitnih dijelova oružja i/ili isprava o oružju. Raspon kazni nije povećan u odnosu na trenutno važeći Zakon.

Član 77. - Propisuje 17 prekršaja, odnosno novčanih kazni za prekršaje fizičkim licima, u rasponu od 1.000,00 do 2.000,00 KM, a od toga za 14 prekršaja se zbog njihove težine, obavezno izriče i zaštitna mjera oduzimanja oružja i/ili municije i/ili bitnih dijelova oružja i/ili isprava o oružju. Raspon kazni nije povećan u odnosu na trenutno važeći Zakon.

Član 78. - Propisuje 13 prekršaja, odnosno novčanih kazni za prekršaje pravnim licima i obrtnicima, u rasponu od 5.000,00 do 10.000,00 KM.

Od toga se za šest prekršaja, zbog njihove težine, obavezno izriče i zaštitna mjera oduzimanja oružja, bitnih dijelova oružja, municije, dijelova municije i isprava o oružju.

Za sve prekršaje iz ovog člana kaznit će se novčanom kaznom od 1.000,00 do 3.000,00 KM i odgovorno lice u pravnom licu i obrtnik. Raspon kazni nije povećan u odnosu na trenutno važeći Zakon.

Član 79. - Propisuje 27 prekršaja, odnosno novčanih kazni za prekršaje pravnim licima i obrtnicima, u rasponu od 10.000,00 do 20.000,00 KM.

Od toga za 14 prekršaja se zbog njihove težine, obavezno izriče i zaštitna mjera oduzimanja oružja, bitnih dijelova oružja, municije, dijelova municije i isprava o oružju, a za 17 prekršaja od toga, prema ovom Zakonu – može se izreći zaštitna mjera zabrane vršenja djelatnosti u trajanju od šest mjeseci.

Nadalje, u odnosu na postojeće zakonsko rješenje, predviđeno je da će se za 15 ponovljenih prekršaja izreći i zaštitna mjera oduzimanja oružja i/ili bitnih dijelova oružja i/ili municije i/ili dijelova municije i/ili isprava o oružju, a za 17 ponovljenih prekršaja obavezno će se izreći i zaštitna mjera zabrane vršenja djelatnosti u trajanju do šest mjeseci.

Za sve prekršaje iz ovog člana kaznit će se novčanom kaznom od 2.000,00 do 4.000,00 KM i odgovorno lice u pravnom licu i obrtnik.

U odnosu na trenutno važeći Zakon došlo je do povećanja raspona kazni i to na način da se pravno lice i obrtnik prema važećem Zakonu mogu kazniti od 10.000,00 do 15.000,00 KM, a odgovorno lice od 2.000,00 do 3.000,00 KM, dok je prijedlogom Zakona predviđen raspon kazni za pravna lica i obrtnike od 10.000,00 do 20.000,00 KM, a odgovornom lice u pravnom licu i obrtniku od 2.000,00 do 4.000,00 KM.

DIO X – PRELAZNE I ZAVRŠNE ODREDBE – uređuje proceduru okončanja započelih postupaka, donošenje propisa, obavezu prijave C kategorije, važenje isprava o oružju, usklađivanje obavljanja djelatnosti, amnestiju i legalizaciju, primjenu drugih zakona i direktiva.

Član 80. - Propisuje da će se postupci, koji do dana stupanja na snagu ovog Zakona nisu okončani, završiti po odredbama Zakona koji je bio na snazi u vrijeme pokretanja postupka.

Član 81. - Propisuje donošenje posebnih propisa, odnosno podzakonskih akata, u roku od šest mjeseci od dana stupanja na snagu ovog Zakona.

Nadalje, propisuje i da će podzakonske akte, kojih ima ukupno 11, deset donijet ministar, na prijedlog policijskog komesara, dok će jedan donijeti ministar Ministarstva zdravstva Kantona Sarajevo u saradnji sa Ministarstvom unutrašnjih poslova.

Član 82. - Propisuje da su lica, koja posjeduju oružje kategorije C, a za koje po ranijem zakonskom rješenju nije bila propisana obaveza prijavljivanja, dužna da takvo oružje prijave nadležnoj policijskoj upravi, i to u roku od 12 mjeseci od stupanja na snagu ovog Zakona.

Član 83. - Propisuje se da isprave o oružju koje su izdate prema trenutno važećem Zakonu ostaju na snazi do promjene bilo kojeg podatka, odnosno činjenice upisane u isprave o oružju.

Član 84. - Propisuje se da su pravna lica i obrtnici, koji obavljaju djelatnost prometa oružja, bitnih dijelova oružja i municije, popravljivanja, modifikacije i/ili prepravljivanja oružja ili vođenje civilnih strelišta, svoje poslovanje dužni uskladiti s odredbama ovog Zakona i odgovarajućih podzakonskih propisa iz člana 81. ovog zakona u roku od šest mjeseci od dana stupanja na snagu podzakonskih propisa, kao i donošenje rješenja kojim se zabranjuje dalje obavljanje djelatnosti za pravna lica i obrtnike, ukoliko u predviđenom roku ne podnesu zahtjev nadležnoj policijskoj upravi radi usklađivanja svog poslovanja u skladu sa odredbama ovog zakona.

Član 85. - Propisuje „Amnestiju“, odnosno o oslobađanje od odgovornosti lica za nelegalno posjedovanje oružja kategorije A, A1 i B ukoliko isto dobrovoljno preda nadležnoj policijskoj upravi, te upućuje na donošenje posebnog propisa kojeg na prijedlog policijskog komesara donosi ministar, a kojim se detaljnije propisuju mjere i radnje koje Uprava policije preduzima na provođenju amnestije za nelegalno posjedovanje oružja.

Član 86. - Propisuje postupak legalizacije oružja kategorije A1 i B bez isprava o oružju, odnosno oružja koje prema ranije važećim propisima nije registrovano, za lica koja u roku od tri godine od dana stupanja na snagu ovog zakona nadležnoj policijskoj upravi podnesu zahtjev za registraciju takvog oružja i izdavanje isprava o oružju

Član 87. - Propisuje primjenu odredbi Zakona o upravnom postupku Federacije Bosne i Hercegovine ("Službene novine Federacije BiH", broj 2/98, 48/99 i 61/22) na sve postupke koji nisu uređeni ovim Zakonom.

Član 88. - Propisuje da se odredbe ovog Zakona primjenjuju na pravna lica koja obavljaju poslove fizičke i tehničke zaštite, ukoliko nisu u suprotnosti s odredbama Zakona o agencijama i unutrašnjim službama za zaštitu ljudi i imovine ("Službene novine Federacije BiH", br. 78/08 i 67/13).

Član 89. - Propisuje obavezu svih subjekata koji primjenjuju odredbe ovog Zakona da obradu ličnih podataka vrše u skladu sa Zakonom o zaštiti ličnih podataka ("Službeni glasnik BiH", br. 49/06, 76/11 i 89/11) kao i provedbenih propisa i planova donesenih na osnovu istog.

Član 90. - Propisuje je da danom stupanja na snagu ovog zakona prestaje da važi Zakon o nabavljanju, držanju i nošenju oružja i municije ("Službene novine Kantona Sarajevo", br. 1/18, 13/18-Ispravka i 30/19).

Član 91. – Propisuje primjenu podzakonskih propisa do donošenja novih podzakonski propisa iz člana 81. ovog zakona primjenjivat će se podzakonski propisi doneseni na osnovu Zakona o nabavljanju, držanju i nošenju oružja i municije („Službene novine Kantona Sarajevo“, br. 1/18, 13/18 i Ispr. 30/19).

Član 92. - Propisuje stupanje na snagu Zakona, a to je osmog dana od dana objavljivanja u "Službenim novinama Kantona Sarajevo".

III FINANSIJSKO OBRAZLOŽENJE

Za provođenje ovog Zakona nije potrebno obezbjediti dodatna finansijska sredstva iz razloga što Zakon ne proizvodi dodatne finansijske efekte na budžet Kantona Sarajevo.

Sastavni dio ovog dijela obrazloženja je Obrazac Izjave o fiskalnoj procjeni - Obrazac IFP-NE koji je sačinjen u skladu sa Pravilnikom o proceduri za izradu Izjave o fiskalnoj procjeni zakona, drugih propisa i akata planiranja na budžet ("Službene novine Federacije BiH", broj: 34/16 i 15/18).

**BOSNA I HERCEGOVINA
FEDERACIJE BOSNE I HERCEGOVINE
KANTON SARAJEVO
VLADA**

**IZVJEŠTAJ O REZULTATIMA JAVNE RASPRAVE O NACRTU
ZAKONA O NABAVLJANJU, DRŽANJU I NOŠENJU ORUŽJA I
MUNICIJE**

**Nosilac izrade
Ministarstvo unutrašnjih poslova Kantona Sarajevo**

Sarajevo, April 2026. godine

IZVJEŠTAJ O REZULTATIMA JAVNE RASPRAVE NACRTU ZAKONA O NABAVLJANJU, DRŽANJU I NOŠENJU ORUŽJA I MUNICIJE

Skupština Kantona Sarajevo je na 29. Radnoj sjednici održanoj dana 06.03.2026. godine zaključkom broj 01-02-7780/26 od 06.03.2026. godine, utvrdila Nacrt Zakona o izmjenama i dopunama Zakona o policijskim službenicima Kantona Sarajevo. U tački 3. utvrđeno je da će se javna rasprava održati u kantonalnim organima uprave, jedinicama lokalne samouprave, kantonalnim ustanovama i javnim preduzećima i trajat će 15 dana. Skupština Kantona Sarajevo je zadužila Vladu Kantona Sarajevo nakon provedene javne rasprave dostavi Izvještaj o rezultatima javne rasprave koja sadrži primjedbe, prijedloge i mišljenja kao da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Zakona o izmjenama i dopunama Zakona o unutrašnjim poslovima Kantona Sarajevo.

Ministarstvo unutrašnjih poslova Kantona Sarajevo je predložilo Službi za skupštinske poslove da učesnici javne rasprave na Nacrt Zakona o nabavljanju, držanju i nošenju oružja i municije budu kantonalni organi uprave, jedinice lokalne samouprave, kantonalne ustanove i javna preduzeća.

PRIMJEDBE, PRIJEDLOZI, MIŠLJENJA I SUGESTIJE

Klub zastupnika SDP-BiH u Skupštini Kantona Sarajevo

Klub zastupnika SDP-BiH u Skupštini Kantona Sarajevo dostavio je dana 19.03.2026. godine prijedloge za izmjene na Nacrt Zakona o nabavljanju, držanju i nošenju oružja i municije i predložio sljedeće izmjene:

-izmjenu člana 6. stav (1) tačka e) Nacrta zakona gdje se startni pištolj i revolver odnosno oružje za uzbuđivanje i signalizaciju svrstavaju u kategoriju D, bez obaveze prijave uz zadržavanje zabrane njihove prepravke i svih snakcija za zloupotrebu;

-izmjenu člana 11. stav (7) Nacrta zakona u smislu da se uvede rok organu koji izdaje odobrenje za nabavljanje oružja iste vrste za koje je već ranije izdalo dozvolu;

-izmjenu člana 14. stav (2) Nacrta zakona da se iz predloženog teksta izbrišu riječi kao i sva lica koja su članovi sportske streljačke organizacije i aktivno se bave sportskim streljaštvom;

-izmjenu član 26. Nacrta zakona u smislu razrađivanja načina sigurnosti prilikom spravljanja municije kako bi navedena norma bila u praksi bila provođena.

-izmjenu člana 27. Nacrta zakona u smislu dopune istog sa riječima kapisla;

-izmjenu člana 33. Nacrta zakona u smislu omogućavanja kolekcionarima mogućnosti da da nabavljaju oružje iz kategorije A.

-izmjenu člana 53. stav (4) u smislu zaštite oduzetog oružja od oštećenja tako što bi se na postojeći tekst dodale riječi „sa naročitom pažnjom u pravilnom čuvanju, održavanju u ispravnom stanju“.

STAV PREDLAGAČA

Primjedbe i prijedlozi se djelimično prihvataju

- Prijedlog za izmjenu člana 6. stav (1) tačka e) Nacrta zakona se prihvata. Obzirom da su i po trenutnom važećem zakonu startni pištolj i revolver odnosno oružje za uzbunjivanje i signalizaciju svrstavaju u kategoriju D i da u praksi nema negativnih pojava u vezi navedenog predlagač smatra da je navedeni prijedlog prihvatljiv.

- Prijedlog za izmjenu člana 11. stav (7) Nacrta zakona u smislu da se uvede rok organu koji izdaje odobrenje za nabavljanje oružja iste vrste za koje je već ranije izdalo dozvolu predlagač smatra neprihvatljivim, obzirom da su Zakonom o upravnom postupku definisani rokovi za postupanje organa uprave koji se mogu skratiti do 15 dana, a takođe moguće je podzakonskim propisom utvrditi da se Komisija koja razmatra zahtjeve sastaje dva puta u mjesecu, pa bi se time ubrzao proces utvrđivanja ispunjavanja uslova za navedena lica i u nekim slučajevima bi bio ispod osam dana kako je to predloženo u prijedlogu. Shodno navedenom predlagač smatra da bi uvođenje traženog roka dovelo do opterećavanja rada organa, te prouzrokovalo potrebu za proširivanjem sistematizacije radnih mjesta povećanjem broja zaposlenika na poslovima izdavanja odobrenje za nabavljanje oružja što bi dodatno opteretilo Budžet Kantona Sarajevo.

-Prijedlog izmjene člana 14. stav (2) Nacrta zakona da se iz predloženog teksta izbrišu riječi kao i sva lica koja su članovi sportske streljačke organizacije i aktivno se bave sportskim streljaštvom predlagač smatra prihvatljivim jer se provjera ispunjenosti uslova za dobijanje oružja odnosi na vlasnika oružja, a ne na sportske strijelce odnosno na članove sportske streljačke organizacije. Većina članova sportskih organizacija posjeduje vlastito oružje i obavezni su proći ljekarski pregled.

- Prijedlog za izmjenu člana 26. Nacrta zakona u smislu razrađivanja načina sigurnosti prilikom spravljanja municije kako bi navedena norma bila u praksi lakše provođena, predlagač smatra prihvatljivim navedeni prijedlog te je u tom u smislu modifikovao predloženi tekst od strane Kluba zastupnika SDP-a BiH sa tekstom iz Nacrta zakona, najviše u obezbjeđivanja sigurnosti i čuvanja prilikom spravljanja municije. Navedenom izmjenom radi usaglašavanja teksta zakona mijenjani su i članovi 76. stav (1) tačka c), 79. stav (1) tačka g).

-Prijedlog izmjene člana 27. Nacrta zakona u smislu dopune istog sa riječima kapisla, predlagač smatra prihvatljivim, u smislu lakšeg spravljanja oružja s tim da je dodao u tekst ispravan naziv inicijalna kapisla.

-Prijedlog izmjene člana 33. Nacrta zakona u smislu omogućavanja kolekcionarima mogućnosti da nabavljaju oružje iz kategorije A predlagač smatra ne prihvatljivim obzirom da drugim članovima Nacrta zakona regulisano ko može imati vatreno oružje kategorije A, te da za tu nabavljanje navedene kategorije nisu predviđeni kolekcionari.

-Prijedlog izmjene člana 53. stav (4) u smislu zaštite oduzetog oružja od oštećenja tako što bi se na postojeći tekst dodale riječi „sa naročitom pažnjom u pravilnom čuvanju, održavanju u ispravnom stanju“ predlagač smatra djelimično prihvatljivim u smislu dodavanja riječi „sa naročitom pažnjom“, a ne dodavanjem riječi „ te pravilnim čuvanjem i održavanjem u ispravnom stanju“. Naime dodavanjem riječi „te pravilnim čuvanjem i održavanjem u ispravnom stanju“ opteretio bi se rad lica koja se brinu o oružju obzirom da bi isti bili obavezni servisirati navedeno oružje što iziskuje dodatno opterećenje na Budžet Kantona Sarajevo u smislu zapošljavanja proširivanja sistematizacije radnih mjesta koja obavljaju navedene poslove kao i objezbjeđivanja dodatnih prostorija za obavljanje dodatnih radnji koji bila Uprava policije obavezna dodavanjem navedenih riječi. Shodno navedenom predlagač smatra da bi se efekat

zaštite oduzetog oružja postigao i dodavanjem riječi „sa naročitom pažnjom te pravilnim čuvanjem.

SAVEZ PRAKTIČNOG STRELJAŠTVA FEDERACIJE BOSNE I HERCEGOVINE

Savez praktičnog streljaštva Federacije Bosne i Hercegovine je aktom broj:Dp. 184-03/26 od 23.03.2026. godine dostavio prijedloge za izmjene na Nacrt Zakona o nabavljanju, držanju i nošenju oružja i municije i predložio sljedeće izmjene:

-izmjenu člana 11. stav (7) Nacrta zakona u smislu da se uvede rok organu koji izdaje odobrenje za nabavljanje oružja iste vrste za koje je već ranije izdalo dozvolu;

-izmjenu člana 14. stav (2) Nacrta zakona da se iz predloženog teksta izbrišu riječi kao i sva lica koja su članovi sportske streljačke organizacije i aktivno se bave sportskim streljaštvom;

-izmjenu član 26. Nacrta zakona u smislu razrađivanja načina sigurnosti prilikom spravljanja municije kako bi navedena norma bila u praksi bila provođena.

-izmjenu člana 27. Nacrta zakona u smislu dopune istog sa riječima kapisla;

-Izmjena člana 43. stav (3) Nacrta zakona u smislu da se na predloženi tekst Nacrta zakona dodaju riječi „ili sportskoj streljačkoj organizaciji“.

STAV PREDLAGAČA

Primjedbe i prijedlozi se djelimično prihvataju

- Prijedlog za izmjenu člana 11. stav (7) Nacrta zakona u smislu da se uvede rok organu koji izdaje odobrenje za nabavljanje oružja iste vrste za koje je već ranije izdalo dozvolu predlagrač smatra neprihvatljivim, obzirom da su Zakonom o upravnom postupku definisani rokovi za postupanje organa uprave koji se mogu skratiti do 15 dana, a takođe moguće je podzakonskim propisom utvrditi da se Komisija koja razmatra zahtjeve sastaje dva puta u mjesecu, pa bi se time ubrzao proces utvrđivanja ispunjavanja uslova za navedena lica i u nekim slučajevima bi bio ispod osam dana kako je to predloženo u prijedlogu. Shodno navedenom predlagrač smatra da bi uvođenje traženog roka dovelo do opterećavanja rada organa, te prouzrokovalo potrebu za proširivanjem sistematizacije radnih mjesta povećanjem broja zaposlenika na poslovima izdavanja odobrenje za nabavljanje oružja što bi dodatno opteretilo Budžet Kantona Sarajevo.

-Prijedlog izmjene člana 14. stav (2) Nacrta zakona da se iz predloženog teksta izbrišu riječi kao i sva lica koja su članovi sportske streljačke organizacije i aktivno se bave sportskim streljaštvom predlagrač smatra prihvatljivim jer se provjera ispunjenosti uslova za dobijanje oružja odnosi na vlasnika oružja, a ne na sportske strijelce odnosno na članove sportske streljačke organizacije. Većina članova sportskih organizacija posjeduje vlastito oružje i obavezni su proći ljekarski pregled.

- Prijedlog za izmjenu člana 26. Nacrta zakona u smislu razrađivanja načina sigurnosti prilikom spravljanja municije kako bi navedena norma bila u praksi lakše provođena, predlagrač smatra prihvatljivim navedeni prijedlog te je u tom u smislu modifikovao predloženi tekst od strane Kluba zastupnika SDP-a BiH sa tekstom iz Nacrta zakona, najviše u obezbjeđivanja sigurnosti i čuvanja prilikom spravljanja municije. Navedenom izmjenom radi usaglašavanja teksta zakona mijenjani su i članovi 76. stav (1) tačka c), 79. stav (1) tačka g).

-Prijedlog izmjene člana 27. Nacrta zakona u smislu dopune istog sa riječima kapisla, predlagač smatra prihvatljivim, u smislu lakšeg spravljanja oružja s tim da je dodao u tekst ispravan naziv inicijalna kapisla.

- Prijedlog izmjena člana 43. stav (3) Nacrta zakona u smislu da se na predloženi tekst Nacrta zakona dodaju riječi „ili sportskoj streljačkoj organizaciji“, predlagač smatra prihvatljivim iz razloga što sportske streljačke organizacije dobijaju odobrenja od nadležnih Policijskih uprava i moraju imati određeni magacinski prostor i sefove za smještaj oružja, te shodno tome ispunjavaju sve uslove za mogu vlasnici oružja ukoliko napuštaju mjesto prebivališta da predaju isto i sportskim streljačkim organizacijama.

Na 29. radnoj sjednici Skupštine Kantona Sarajevo održanoj dana 06.03.2026. godine, prilikom rasprave o Nacrtu Zakona o nabavljanju, držanju i nošenju oružja i municije zastupnik u Skupština Kantona Sarajevo Selmanović Faruk istakao je sljedeće primjedbe na gore navedeni Nacrta zakona

-u smislu člana 5. stava (1) tačke a) podtačke 15) Nacrta Zakona koja definiše pojam staro oružje u kojem je naveo da prema Nacrtu zakona navedeno oružje bi moralo biti uništeno ili onesposobljeno.

-u smislu člana 11. stav (5) tačka c) da bi dozvoljavanje na osnovu izjave lica da policijski službenici ulaze u privatni posjed bilo suprotno članom 8. Evropske konvencije o ljudskim pravima;

-u smislu da se pravi dodatni pritisak na zdravstvene ustanove u smislu provjere zdravstvene sposobnosti svakih pet godina.

STAV PREDLAGAČA

Primjedbe i prijedlozi se djelimično prihvataju

- U smislu člana 5. stava (1) tačke a) podtačke 15) Nacrta Zakona koja definiše pojam staro oružje predlagač smatra primjedbu neprihvatljivom obzirom da predloženom normom nije određeno da staro oružje mora biti uništeno već da je trajno onesposobljeno za upotrebu.

-U smislu člana 11. stav (5) tačka c) da bi dozvoljavanje na osnovu izjave lica da policijski službenici ulaze u privatni posjed bilo suprotno članom 8. Evropske konvencije o ljudskim pravima primjedbu smatramo prihvatljivom te je predlagač u tom smislu izmjenio tekst norme i dodao riječi „da ispunjava uslove za siguran smještaj i čuvanje oružja o čemu daje pismenu izjavu na obrascu propisanom podzakonskim propisom koji, na prijedlog policijskog komesara, donosi ministar. A brisan dio teksta „i saglasnost za pregled i kontrolu smještaja prilikom podnošenja zahtjeva“, a sve u cilju da bi onemogućilo eventualno kršenja ljudskih prava vlasnika oružja u smislu da policijskih službenici mogu na osnovu navedene izjave da uđu u stan odnosno kuću vlasnika oružja.

U vezi izmjene navedeni član radi usaglašavanja sa istim izmjenjen je član 76. stav (1) tačka a), član 81. i član 83.

- U smislu da se pravi dodatni pritisak na zdravstvene ustanove u smislu provjere zdravstvene sposobnosti svakih pet godina predlagač smatra da je primjedba neprihvatljiva obzirom da je predlagač je u odnosu na trenutno važeći Zakon, koji propisuje obavezu zdravstvenog pregleda svakih deset godina, ovu odredbu uskladio sa odredbom člana 10. stav (4) Direktive, a koja predviđa obavezu periodičnog preispitivanja izdate dozvole u periodu od najduže pet godina,

te je u skladu s tim, predloženim zakonskim rješenjem propisana obaveza provjeravanja daljnjeg ispunjavanja posebnog uslova koji se odnosi na zdravstvenu sposobnost svakih pet godina. Isto se odnosi obrtnike i odgovorna lica u pravnom licu.

Predlagač je prilikom analize Nacrta zakona izmjenio član 11. stav 10) u smislu da načelnik nadležne policijske uprave formira komisiju koju čine tri člana i njihovi zamjenici, od kojih su dva člana i zamjenici policijski službenici iz policijske uprave, a jedan član je državni službenik ili namještenik Uprave policije koji rade na poslovima za sprovođenje propisa o oružju, od kojih je jedan član, a drugi zamjenik. Naime norma navedena u Nacrtu zakona je sačinjena za idealne uslove u praksi se može dogoditi situacija da nisu sva radna mjesta u nadležnoj policijskoj upravi popunjena, te da se Komisija ne može formirati. Ovim rješenjem ta mogućnost se onemogućava.

Takođe predlagač je u članovima 5, 14,15, 26, 43, 53, 58, 65, 79, 81 i 91 navedenog Nacrta zakona, modifikovao nomotehnički tekst navedenih članova kako bi norma bila jasnija, te time nije promjenio suštinu predloženih normi.



Bosnia and Herzegovina
Federation of Bosnia and Herzegovina

CANTON SARAJEVO
Ministry of Finance

Broj: 08-03-11-18921/26 NB
Sarajevo, 17.04.2026. godine

KANTON SARAJEVO
MINISTARSTVO UNUTRAŠNJIH POSLOVA

Predmet: Mišljenje na Prijedlog zakona o nabavljanju, držanju i nošenju oružja i municije;

Veza: Vaš dopis, broj: 01-9-02-1570/26 od 15.04.2026. godine;

Vezano za vaš zahtjev za mišljenje na Prijedlog zakona o nabavljanju, držanju i nošenju oružja i municije, u skladu sa članom 8. Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, br. 34/16 i 15/18), dajemo sljedeće mišljenje:

Ministarstvo unutrašnjih poslova Kantona Sarajevo je postupilo u skladu sa navedenim Pravilnikom i Ministarstvu finansija uz Prijedlog Zakona dostavilo na mišljenje popunjen i potpisan obrazac IFP-NE u kojem je data sljedeća izjava: „Provođenje ovog Prijedloga zakona o nabavljanju, držanju i nošenju oružja i municije ne zahtjeva dodatna finansijska sredstva i nema fiskalne posljedice na Budžet Kantona Sarajevo“.

Obzirom da za provođenje Prijedloga Zakona nisu potrebna dodatna sredstva iz Budžeta Kantona Sarajevo, na navedeni Prijedlog zakona o nabavljanju, držanju i nošenju oružja i municije, Ministarstvo finansija, sa aspekta fiskalnog učinka na Budžet, nema primjedbi.

Budžetski korisnici mogu preuzimati obaveze najviše do visine sredstava odobrenih operativnim budžetom, u skladu s članom 53. Zakona o budžetima Federacije BiH. Prema članu 46. stav (4) istog Zakona, budžetski korisnici odgovorni su za zakonito, namjensko, efikasno i ekonomično raspolaganje budžetskim sredstvima.

Ovo mišljenje je dato u skladu sa odredbama Prijedloga Zakona koji se obrađuje i podataka navedenih u Obrascu IFP-NE Izjave o fiskalnoj procjeni, čija tačnost je u isključivoj odgovornosti Predlagača, te ukoliko se naknadno utvrdi da navedene odredbe i podaci odstupaju od stvarno činjeničnog stanja, ovo mišljenje će se staviti van snage.

Dostaviti:

1. Naslovu
2. MF-Sektor za budžet i fiskalni sistem
3. a/

Pripremio:
Kontrolisao:



MINISTAR
[Redacted]
Dr. Alan Kalamujić



Bosnia and Herzegovina
Federation of Bosnia and Herzegovina
CANTON SARAJEVO
Ministry of Justice and Administration

Broj: 03-04/2-02-18942-1/26
Sarajevo, 20.04.2026. godine

KANTON SARAJEVO
MINISTARSTVO UNUTRAŠNJIH POSLOVA
gosp. Admir Katica, ministar

PREDMET: Prijedlog Zakona o nabavljanju, držanju i nošenju oružja i municije, mišljenje –
VEZA: Vaš akt, broj: 01-9-02-1570/26 od 15.04.2026. godine

Postupajući po Vašem aktu, broj i datum gornji, na osnovu odredbi člana 7. Zakona o ministarstvima i drugim organima uprave Kantona Sarajevo (“Službene novine Kantona Sarajevo”, broj 40/22) i člana 4. stav 6. Uredbe o postupku i načinu pripremanja, izrade i dostavljanja propisa (“Službene novine Kantona Sarajevo”, br. 50/17 – Drugi novi prečišćeni tekst, 2/18 – Ispravka i 32/22), Ministarstvo pravde i uprave razmotrilo je dostavljeni prijedlog Zakona i daje sljedeće

MIŠLJENJE

Prijedlog Zakona o nabavljanju, držanju i nošenju oružja i municije je propis kojim se ne povrjeđuju prava zaštićena odredbama Evropske konvencije o zaštiti ljudskih prava i osnovnih sloboda, niti je u suprotnosti sa drugim pravnim aktima, kojima je utvrđena zaštita ljudskih prava i sloboda.

S poštovanjem,

Dostaviti:
1. Naslovu;
2. a/a.



MINISTARICA

Darja Softić Kadenić



Broj: 09-02-18934/26
Sarajevo, 21.04.2026. godine

KANTON SARAJEVO
MINISTARSTVO UNUTRAŠNJIH POSLOVA

PREDMET: Mišljenje na prijedlog Zakona o nabavljanju, držanju i nošenju oružja i municije.-

Na osnovu člana 3. stav (1) tačka b) Uredbe o osnivanju Ureda za zakonodavstvo Vlade Kantona Sarajevo ("Službene novine Kantona Sarajevo", broj 20/23) i člana 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17-Drugi novi prečišćeni tekst, 2/18-Ispravka i 32/22), Ured za zakonodavstvo Vlade Kantona Sarajevo, daje slijedeće

MIŠLJENJE

1. S obzirom da do danas na nivou Federacije Bosne i Hercegovine nije donesen zakon o nabavljanju, držanju i nošenju oružja, a uvažavajući činjenicu da je ova oblast u Kantonu Sarajevo već ranije uređivana kantonalnim zakonom, Ured za zakonodavstvo Vlade Kantona Sarajevo podržava napore nosioca pripreme predmetnog materijala da predmetnu oblast uređuje kantonalnim zakonom, a kojim će se zaštititi interesi kantona u ovoj oblasti.

Prijedlog Zakona o nabavljanju, držanju i nošenju oružja i municije (u daljem tekstu: Zakon) sadrži stručna pitanja iz nadležnosti nosioca pripreme predmetnog materijala.

Ured za zakonodavstvo Vlade Kantona Sarajevo napominje da je članom 371. Krivičnog zakona Federacije Bosne i Hercegovine ("Službene novine Federacije BiH", br. 36/03, 37/03 – Ispravka, 21/04 - Ispravka, 69/04, 18/05, 42/10, 42/11, 59/14, 76/14, 46/16, 75/17, 31/23 i 58/25) propisano kao krivično djelo nedozvoljeno držanje oružja ili eksplozivnih materija, koji, između ostalog, propisuje kao sankciju kaznu zatvora do tri godine za neovlaštenu izradu, prepravku, prodaju, nabavku ili razmjenu vatrenog oružja ili municije ili za neovlašteno držanje vatrenog oružja ili municije čija nabavka građanima uopće nije dozvoljena, a da su u članu 75. stav (1) prijedloga Zakona propisani kao sankcija novčana kazna ili kazna zatvora od šest mjeseci do tri godine za krivična djela koja se odnose na nabavku, držanje ili nošenje vatrenog oružja kategorije A, A1 i B bez odobrenja, prodaju vatrenog oružja kategorije A, A1 i B pravnom licu, obrtniku ili fizičkom licu koji nemaju odobrenje za nabavljanje te vrste oružja i davanje drugom na poslugu vatrenog oružja ili davanje na poslugu lovačkog oružja ili sportskog vatrenog oružja licu koje za tu vrstu oružja nema oružni list.

2. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17- Drugi novi prečišćeni tekst, 2/18-Ispravka i 32/22), te se isti može razmatrati na jednoj od narednih sjednica Vlade Kantona Sarajevo.

Dostaviti:

1. Naslovu
2. Evidencija
3. Arhiva



ŠEF UREDA



Elma Bećirović

Obrazac 1.

OBRAZAC ZA PROVOĐENJE PRETHODNE PROCJENE UTICAJA PROPISA

Naziv prednacrt/nacrta/prijedloga propisa <i>(Obavezno navesti formu propisa: prednacrt, nacrt ili prijedlog propisa)</i>	Prijedlog Zakona o nabavljanju, držanju i nošenju oružja i municije
Obrađivač (naziv organa)	Ministarstvo unutrašnjih poslova Kantona Sarajevo
Datum	16.04.2026. godine
1. Usklađenost prednacrt/nacrta/prijedloga propisa sa prijedlogom godišnjeg programa rada Vlade Kantona Sarajevo, pravnim okvirom i strateškim okvirom Kantona, Federacije Bosne i Hercegovine i Bosne i Hercegovine	
1.1. Koji je pravni osnov za donošenje propisa? Odgovor: Član 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17).	
1.2. Da li je oblast koja će biti regulisana propisom u isključivoj nadležnosti Kantona Sarajevo? Ukoliko je odgovor negativan, navedite druge nivoe vlasti koji su nadležni za regulisanje predmetne oblasti? Odgovor: Oblast nabavljanja, držanja i nošenja oružja i municije je u isključivoj nadležnosti Kantona Sarajevo.	
1.3. Da li je izrada propisa predviđena prijedlogom godišnjeg programa rada Vlade Kantona Sarajevo? Odgovor: <u>DA</u> /NE (označiti)	
1.4. Navedite zakone i druge propise (uključujući međunarodne sporazume i druge instrumente) kojima su regulisana pojedina pitanja u vezi sa predmetom propisa. Odgovor: Direktiva Evropske unije broj: 2021/555 o nadzoru nabavljanja i posjedovanja oružja (kodificirani tekst- objedinjena Direktiva sa izmjenama)	
1.5. Da li je propis u skladu sa strateškim okvirom Kantona, Federacije Bosne i Hercegovine i Bosne i Hercegovine i kojim? Navesti sve relevantne strateške i planske dokumente i politike. Odgovor: NE	
1.6. Da li usvajanje propisa zahtjeva izmjenu, dopunu ili stavljanje van snage drugih propisa i kojih? Odgovor: Usvajanje propisa zahtjeva stavljanje van snage sljedećih propisa: : Zakon o nabavljanju, držanju i nošenju oružja i municije („Službene novine Kantona Sarajevo“, br. 1/18, 13/18- ispravka, 30/19)	
2. Analiza postojećeg stanja i utvrđeni ciljevi prednacrt/nacrta/prijedloga propisa	
2.1. Navesti ključne probleme koji se nastoje riješiti usvajanjem ovog propisa. Navesti ciljne grupe i druge zainteresirane strane na koje će normativna rješenja imati uticaja. Odgovor: Ministarstvo unutrašnjih poslova Kantona Sarajevo, na osnovu obuhvatne i detaljne analize odnosnih elemenata, parametara i aspekata u procesu primjene Zakona o nabavljanju, držanju i nošenju oružja i municije u proteklom periodu, konstatovalo je neophodnost usklađivanja materijalnog propisa sa Direktivom Evropske unije broj: 2021/555 o nadzoru nabavljanja i posjedovanja oružja (kodificirani tekst- objedinjena Direktiva sa izmjenama), ali i direktivama Vijeća Evrope i Evropskog parlamenta, a gdje će određenim ciljnim skupinama (pravna i fizička lica) ova problematika biti dostupna.	
2.2. Koje su posljedice zadržavanja postojećeg stanja odnosno nerješavanja identificiranih problema normativnim putem ili poduzimanjem drugih mjera? Odgovor: U postojećem pravnom propisu postojale su određene pravne prepreke i manje manjkavosti za cjelishodno rješavanje određena pitanja u ovom propisu, a što treba biti pojednostavljeno i riješeno sa novim propisom. Dakle cilj propisa je prije svega usklađivanje sa Evropskom stečevinom i međunarodnim standardima, odnosno Direktivom Vijeća Evrope 91/477/ EEC, od 18.06.1991. godine o kontroli nabavke i posjedovanja oružja; Direktive 2008/51/EZ Evropskog parlamenta i Vijeća o d 21.05.2008. godine, a tiče se izmjena i dopuna gore navedene Direktive vijeća; Direktive EU 2017/853 Evropskog parlamenta i vijeća od 17.05.2017. godine izmjeni gore navedene Direktive prije svega u pravcu nadzora, nabavke i posjedovanja oružja.	
2.3. Koji se opći i specifični ciljevi žele postići propisom (Član 10. Uredbe) ? U kojoj mjeri i u kojem periodu se propisom mogu postići ovi ciljevi? Odgovor:	

Opći cilj: Uspostavljanje kontrole u oblasti naoružanja,
 Specifični ciljevi: Smanjenje posjedovanja nelegalnog oružja na području Kantona Sarajevo

3. Rješenja koja se predviđaju prednacrtom/nacrtom/prijedlogom propisa i pregled mogućih nenormativnih rješenja

3.1. Navedite ključna rješenja koja će biti obuhvaćena propisom radi adresiranja identificiranih problema i postizanja općeg i specifičnih ciljeva.
 Odgovor: Ovim zakonom uređuju se preciznije procedure za legalno posjedovanje oružja

3.2. Navedite nenormativne mjere (npr. obuke, edukacije, studije, okrugli stolovi i sl. ili druge nenormativne mjere) kojima je moguće postići opći i specifične ciljeve.
 Odgovor: a.) informisanje zainteresovanih grupa stanovništva b.) edukacija zaposlenika koji implementiraju ove procese

4. Proces konsultacija
(sa ciljnim grupama i drugim zainteresiranim strana identificiranim pod 2.1.)

4.1. Navedite sve kantonalne organe i institucije Kantona Sarajevo, kao i institucije drugih nivoa vlasti (ako je relevantno), sa kojima je potrebno provesti konsultacije i na koji način.
 Odgovor: a.) Ured za zakonodavstvo Kantona Sarajevo b) Ministarstvo pravde i uprave Kantona Sarajevo c) Ministarstvo finansija Kantona Sarajevo

4.2. Navedite podatke o konsultacijama sa institucijama, organizacijama i pojedincima koje je potrebno provesti u sklopu konsultacija sa javnošću i na koji način.
 Odgovor: Konsultacije sa udruženjima koja se bave streljačkim djelatnostima, kao i sportskim streljačkim klubovima, ali se može predvidjeti i šira javna rasprava, prije svega sa institucijama koje se bave operativno-sigurnosnim poslovima.

5. Procjena uticaja propisa (odnosi se samo na opciju koja podrazumijeva normativna rješenja)
 (nivo uticaja: a) bez uticaja (ili sa zanemarljivim uticajem), b) značajni uticaji, c) vrlo značajni uticaji, u skladu sa članom 12. Uredbe

5.1. UTVRĐIVANJE FISKALNIH UTICAJA

	Vrsta uticaja	Mjerilo uticaja		
		a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
	Utvrđite uticaj na:			
		Da/Ne	Da/Ne	Da/Ne
5.1.1.	Prihodi i rashodi za tekuću i naredne dvije budžetske godine	Da	Ne	Ne
5.1.2.	Budžetski i izvanbudžetski korisnici i drugi budžeti, kao i vanbudžetski fondovi	Da	Ne	Ne
5.1.3.	Drugi fiskalni uticaji, ukoliko se procjenjuju značajnim	Da	Ne	Ne
5.1.4.	Obrazloženje za analizu utvrđivanja direktnih uticaja od 5.1.1. do 5.1.3. Provođenje ovog propisa ne izaziva negativne fiskalne uticaje, a moguće su i minimalni pozitivni uticaji u odnosu na budžetske prihode.			

5.2. UTVRĐIVANJE EKONOMSKIH UTICAJA

	Vrsta uticaja	Mjerilo uticaja		
		a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
	Utvrđite uticaj na:			
		Da/Ne	Da/Ne	Da/Ne

5.2.1.	Priliv investicija	Da	Ne	Ne
5.2.2.	Zapošljavanje u privrednim subjektima	Da	Ne	Ne
5.2.3.	Siva ekonomija	Da	Ne	Ne
5.2.4.	Produktivnost, poslovanje privrednih subjekata i njihove operativne troškove	Da	Ne	Ne
5.2.5.	Konkurentnost i nelojalna konkurencija	Da	Ne	Ne
5.2.6.	Novi administrativni troškovi za privredne subjekte	Da	Ne	Ne
5.2.7.	Uticao na imovinska prava	Da	Ne	Ne
5.2.8.	Uspostavljanje novih javnih ovlaštenja	Da	Ne	Ne
5.2.9.	Razvoj i poslovanje malih i srednjih preduzeća	Da	Ne	Ne
5.2.10.	Drugi identificirani ekonomski uticaji, ukoliko se procjenjuju značajnim	Da	Ne	Ne
5.2.11.	Obrazloženje za analizu utvrđivanja direktnih uticaja od 5.2.1. do 5.2.10.: Provođenje ovog propisa nema uticaj na ekonomske faktore, kao što su priliv investicija, sprečavanje sive ekonomije i nelojalne konkurencije, te značajan uticaj na zapošljavanje u privrednim subjektima.			
5.3.	UTVRĐIVANJE SOCIJALNIH UTICAJA			
	Vrsta uticaja	Mjerilo uticaja		
	Utvrđite uticaj na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne
5.3.1.	Zaposlenost i pristup tržištu rada	Da	Ne	Ne
5.3.2.	Prava vezana za kvalitet radnog mjesta	Da	Ne	Ne
5.3.3.	Socijalna uključenost i zaštita posebno ranjivih društvenih grupa ili pojedinaca	Da	Ne	Ne
5.3.4.	Javno zdravlje	Da	Ne	Ne
5.3.5.	Pristup socijalnoj i zdravstvenoj zaštiti i obrazovanju	Da	Ne	Ne
5.3.6.	Kultura	Da	Ne	Ne
5.3.7.	Javna sigurnost, uključujući kriminal i terorizam	Da	Ne	Ne
5.3.8.	Drugi identificirani socijalni uticaji, ukoliko se procjenjuju značajnim	Da	Ne	Ne
5.3.9.	Obrazloženje za analizu utvrđivanja direktnih uticaja od 5.3.1. do 5.3.8.: Provođenje ovog propisa ne izaziva negativne socijalne uticaje, ali su mogući pozitivni pomoci koji se prije svega u ovoj oblasti odnose na ranjive kategorije stanovništva.			
5.4.	UTVRĐIVANJE UTICAJA NA ZAŠTITU LJUDSKIH PRAVA			
	Vrsta uticaja	Mjerilo uticaja		
	Utvrđite uticaj na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji

		Da/Ne	Da/Ne	Da/Ne
5.4.1.	Ravnopravnost spolova u smislu jednakog statusa, jednake mogućnosti za ostvarivanje svih prava, kao i jednaku korist od ostvarenih rezultata	Da	Ne	Ne
5.4.2.	Pravo na jednaki tretman i prilike naročito u pogledu ostvarivanja materijalnih prava, zapošljavanja, rada i drugih zagarantovanih prava	Da	Ne	Ne
5.4.3.	Direktna ili indirektna diskriminacija	Da	Ne	Ne
5.3.4.	Pravo na privatnost i zaštitu ličnih podataka	Da	Ne	Ne
5.4.5.	Ostvarivanje pravne zaštite, djelotvoran pravni lijek, pristup sudu i pravo na besplatnu pravnu pomoć	Da	Ne	Ne
5.4.6.	Pravo na međunarodnu zaštitu, privremenu zaštitu i postupanje s tim u vezi	Da	Ne	Ne
5.4.7.	Pravo na pristup informacijama	Da	Ne	Ne
5.4.8.	Drugi identificirani uticaji koji se odnose na zaštitu ljudskih prava, ukoliko se procjenjuju značajnim	Da	Ne	Ne
5.4.9.	Obrazloženje za analizu utvrđivanja direktnih uticaja od 5.4.1. do 5.4.8.: Provođenje ovog propisa ne izaziva negativne uticaje na zaštitu ljudskih prava, ali se može povećati stepen zaštite ljudskih prava.			
5.5.	UTVRĐIVANJE UTICAJA NA ZAŠTITU OKOLIŠA			
	Vrsta uticaja	Mjerilo uticaja		
	Utvrđite učinak na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne
5.5.1.	Klima	Da	Ne	Ne
5.5.2.	Kvalitet zraka	Da	Ne	Ne
5.5.3.	Kvalitet vode i vodnih resursa	Da	Ne	Ne
5.5.4.	Kvalitet i upotreba zemljišta	Da	Ne	Ne
5.5.5.	Korištenje energije (obnovljivi i neobnovljivi izvori energije)	Da	Ne	Ne
5.5.6.	Upravljanje otpadom	Da	Ne	Ne
5.5.7.	Uticaj aktivnosti privrednih subjekata na okolinu	Da	Ne	Ne
5.5.8.	Zaštita životinja i biljaka i sigurnost hrane	Da	Ne	Ne
5.5.9.	Drugi identificirani uticaji na okoliš, ukoliko se procjenjuju značajnim	Da	Ne	Ne
5.5.10.	Obrazloženje za analizu utvrđivanja direktnih uticaja od 5.5.1. do 5.5.9.: Provođenje ovog propisa ne izaziva negativne uticaje na zaštitu okoliša.			
5.6.	UTVRĐIVANJE MOGUĆIH KORUPTIVNIH RIZIKA			
	Vrsta uticaja	Mjerilo uticaja		

	Utvrđite uticaj na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne
5.6.1.	Jasnoća, nedvosmislenost i preciznost odredaba	Da	Ne	Ne
5.6.2.	Adekvatno ograničavanje diskrecionih ovlaštenja nosilaca javne funkcije	Da	Ne	Ne
5.6.3.	Jasno i sveobuhvatno utvrđene procedure i postupci	Da	Ne	Ne
5.6.4.	Regulisanje sprječavanja sukoba interesa	Da	Ne	Ne
5.6.5.	Transparentnost	Da	Ne	Ne
5.6.6.	Adekvatnost utvrđenih sankcija	Da	Ne	Ne
5.6.7.	Kreiranje neopravdano povlaštenog položaja grupa ili pojedinaca	Da	Ne	Ne
5.6.8.	Drugi rizici koji mogu uticati na razvoj korupcije, ukoliko se procjenjuju značajnim	Da	Ne	Ne
5.6.9.	Obrazloženje za analizu utvrđivanja direktnih uticaja od 5.6.1. do 5.6.8.:	Provođenje ovog propisa ne utiče na stvaranje mogućih koruptivnih rizika.		

6. Na osnovu prethodne procjene uticaja propisa utvrđeno je da **NE POSTOJI** potreba provođenja postupka sveobuhvatne procjene uticaja propisa.

POTPIS KOORDINATORA POSTUPKA PROCJENE UTICAJA

Jesenkovic Emir

POTPIS RUKOVODIOCA OBRADIVAČA

Admir Katica, ministar



OBRAZAC IZJAVA O FISKALNOJ PROCJENI

Obrazac IFP NE

A 1. Obradivač propisa		KOD	NAZIV	
		1702	MINISTARSTVO UNUTRAŠNJIH POSLOVA KANTON SARAJEVO - UPRAVA POLICIJE	
B 2. Osnovni podaci o prijedlogu propisa				
Vrsta propisa/akta	Zakon	DA	Odluka	Strategija
	Uredba	NE	Drugi akti	Drugi akti planiranja
Naziv propisa/akta				
Zakon o nabavljanju, držanju i nošenju oružja i municije - Prijedlog				
C 3. Izjava o nepostojanju dodatnih fiskalnih efekata predloženog propisa				

Provođenje ovog Prijedloga Zakon o nabavljanju, držanju i nošenju oružja i municije ne zahtjeva dodatna finansijska sredstva i nema fiskalne posljedice na Budžet Kantona Sarajevo.

D 4. Pečat i potpis odgovornog lica obradivača, odnosno predlagача propisa

Mjesto i datum



SARAJEVO
15-04-2026

**OBRAZLOŽENJE OBRASCA IZJAVE O FISKALNOJ PROCJENI (IFP-NE)
za Prijedlog Zakona o nabavljanju, držanju i nošenju oružja i municije za dio
koji se odnosi na razdjel-17, glava-02, UPRAVA POLICIJE**

Provođenje odredbi ovog Prijedloga Zakon o nabavljanju, držanju i nošenju oružja i municije, ne iziskuje dodatna finansijska sredstva u Budžetu Kantona Sarajevo.

Uvažavajući činjenicu da se ovim Prijedlogom Zakona vrši usklađivanje odredbi Zakona o nabavljanju, držanju i nošenju oružja i municije ("Službene novine Kantona Sarajevo", broj 1/18, 13/18-ispavka i 30/19) sa međunarodnim standardima, odnosno uputama Direktive Evropskog parlamenta i Vijeća Evrope, o kontroli nabavke i posjedovanja oružja, primjena ovog Prijedloga nema finansijski uticaj na Budžet Kantona Sarajevo. Naime, predloženim Zakonom daju se precizniji opisi i definicije, uslovi nabavljanja i držanja oružja i municije, te postupanja sa oružjem, načina smještaja i čuvanja oružja i municije, obaveze nalazioca oružja, obaveze vlasnika dotrajalog oružja za koje ne postoji mogućnost popravke, te postupak u slučaju smrti vlasnika oružja. Prijedlog Zakona propisuje obavezu nadležnih policijskih uprava u pogledu praćenja i ažuriranja evidencija vlasnika oružja, što se planira realizovati u okviru redovnih aktivnosti na unapređenju informatičke opremljenosti i u okviru budžetom odobrenih sredstava za tu namjenu. Također, i sve evidencije Uprave policije propisane ovim Zakonom se planiraju obezbijediti u okviru budžetom odobrenih sredstava za izdatke za nabavku materijala.



Bosnia and Herzegovina
Federation of Bosnia and Herzegovina

**CANTON SARAJEVO
ASSEMBLY**

Na osnovu čl. 140., 141. i 142. Poslovnika Skupštine Kantona Sarajevo („Službene novine Kantona Sarajevo”, br.: 41/12 - Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22-Ispravka i 47/24), Skupština Kantona Sarajevo, na 29. Radnoj sjednici održanoj dana 06.03.2026. godine, donijela je

ZAKLJUČAK

1. Utvrđuje se Nacrt Zakona o nabavljanju, držanju i nošenju oružja i municije.
2. Nacrt Zakona iz tačke 1. ovog zaključka stavlja se na javnu raspravu.
3. Javna rasprava održat će se u kantonalnim organima uprave, jedinicama lokalne samouprave, kantonalnim ustanovama i javnim preduzećima i trajat će 15 dana.
4. Primjedbe, prijedloge, sugestije i mišljenja učesnici javne rasprave dostavljaju Vladi Kantona Sarajevo koja organizuje i provodi javnu raspravu, putem Ministarstva unutrašnjih poslova Kantona Sarajevo.
5. Vlada Kantona Sarajevo je dužna, nakon provedene javne rasprave Skupštini Kantona Sarajevo, dostaviti Izvještaj o rezultatima javne rasprave koji sadrži primjedbe, prijedloge i mišljenja kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi prijedloga Zakona o nabavljanju, držanju i nošenju oružja i municije.
6. Ovaj zaključak stupa na snagu danom donošenja.

Broj: 01-02-7780/26
06.03.2026.godine
SARAJEVO



**PREDSJEDAVAJUĆI
SKUPŠTINE KANTONA SARAJEVO**

Elvedin Okerić



Član 139.

Ako Skupština ocijeni da nije potrebno da se zakon donese, zaključkom odbija nacrt i taj zaključak dostavlja podnosiocu nacrta i podnosiocu inicijative.

Zaključak iz prethodnog stava sadrži razloge koji su naveli Skupštinu da donese ovakvu ocjenu i odbije nacrt.

Član 140.

Ako Skupština ocijeni da se nastavi postupak donošenja zakona, ona će po završenom pretresu zaključkom utvrditi nacrt zakona uz stavove i primjedbe na nacrt zakona koji su sastavni dio zaključka, dostaviti podnosiocu nacrta da ih uzme u obzir prilikom izrade prijedloga zakona.

- Javna diskusija o nacrtu zakona, drugog propisa ili općeg akta

Član 141.

U cilju očitovanja i davanja mišljenja i sugestija kantonalnih organa uprave, javnih preduzeća i ustanova, lokalne samouprave i javnosti Kantona u cjelini, o nacrtu zakona koji Skupština utvrdi, provodi se javna rasprava.

Obavezni sudionici javne rasprave su kantonalni organi uprave i jedinice lokalne samouprave, te kantonalne ustanove i javna preduzeća na koja se nacrt zakona neposredno odnosi, odnosno koja su određena zaključkom o otvaranju javne rasprave.

Član 142.

Zaključak o otvaranju javne rasprave sadrži odredbe o subjektima koji će organizovati i provesti raspravu, obimu rasprave, kao i načinu finansiranja i roku za njeno provođenje.

Rok za provođenje javne rasprave je najmanje trideset dana. Izuzetno, Skupština može odrediti kraći rok javne rasprave. Rok za provođenje javne rasprave teče od dana dostave nacrta zakona obaveznim sudionicima javne rasprave. Tokom javne rasprave, nadležno radno tijelo Skupštine učestvuje u javnom pretresu koje organizuje predlagač.

O rezultatima javne rasprave Skupštini se podnosi izvještaj koji sadrži primjedbe, prijedloge i mišljenja.

Član 143.

Predlagač zakona dužan je da prilikom izrade prijedloga zakona uzme u obzir primjedbe, prijedloge i mišljenja sadržana u izvještaju o javnoj raspravi, kao i da obrazloži razloge zbog kojih nije pojedine primjedbe, prijedloge ili mišljenja uvrstio u prijedlog zakona.

Izuzetno, ako je radno tijelo koje podnosi izvještaj o rezultatima javne rasprave istovremeno i predlagač zakona, može zajedno sa izvještajem dostaviti prijedlog zakona, a Skupština će na istoj sjednici razmatrati izvještaj i prijedlog zakona.

Član 144.

Odredbe ovog poslovnika koje se odnose na javnu raspravu o nacrtu zakona, shodno se primjenjuju i na javnu raspravu o nacrtima drugih propisa ili općih akata Skupštine.

- Prijedlog zakona

Član 145.

Prijedlog zakona podnosi se u obliku u kome se donosi zakon.

Obrazloženje prijedloga sadrži, pored pitanja iz člana 138. stav 3. ovog poslovnika, objašnjenja važnih pravnih instituta, izmjene i dopune koje su izvršene u odnosu na nacrt zakona, primjedbe i prijedloge na nacrt zakona koji nisu prihvaćeni i iz kojih razloga, kao i druge značajne okolnosti u vezi sa pitanjima koja se zakonom uređuju.

Član 146.

O načinu podnošenja prijedloga zakona, njegovog upućivanja Skupštini, drugim tijelima Skupštine i zainteresiranim organima i drugim organizacijama i zajednicama, njegovog razmatranja u Zakonodavno-pravnoj komisiji, kao i razmatranja po pitanjima zaštite vitalnih nacionalnih interesa, shodno se primjenjuju odgovarajuće odredbe ovog poslovnika koje se odnose na nacrt zakona.

Član 147.

Predsjedavajući Skupštine po prijemu dostavlja prijedlog zakona poslanicima/zastupnicima i on se može pretresati na sjednici Skupštine po isteku roka od 14 dana od dana dostavljanja poslanicima/zastupnicima.

Član 148.

Prijedlog zakona prethodno razmatraju ovim poslovníkom ovlaštena radna tijela Skupštine, klubovi naroda i klubovi poslanika/zastupnika u skladu sa svojim nadležnostima.

Član 149.

Pretres prijedloga zakona na sjednici Skupštine je, po pravilu, jedinstven.

Skupština može odlučiti da pretres prijedloga zakona obuhvata opći pretres i pretres u pojedinostima.

U općem pretresu prijedloga raspravlja se o prijedlogu u načelu i da li je prijedlog izraden u skladu sa zaključkom usvojenim prilikom pretresa nacrta zakona, a mogu da se iznose mišljenja, traže objašnjenja i pokreću druga pitanja u vezi sa rješenjem datim u prijedlogu.

U toku pretresa o pojedinostima raspravlja se o pojedinim rješenjima prijedloga.

Član 150.

Podnosilac prijedloga zakona i Vlada mogu do završetka pretresa predložiti Skupštini da se pretres prijedloga zakona odloži.

O prijedlozima iz prethodnog stava i o drugim prijedlozima za odlaganje pretresa prijedloga zakona Skupština odlučuje odmah.

Podnosilac prijedloga zakona može da do otvaranja pretresa povuče svoj prijedlog zakona.

- Amandmani

Član 151.

Prijedlog za izmjenu i dopunu prijedloga zakona podnosi se u obliku amandmana.

Pravo predlaganja amandmana ima svaki poslanik/zastupnik u Skupštini, svaki klub naroda, svaki klub poslanika/zastupnika, radna tijela Skupštine i Vlada.

Član 152.

Amandman se podnosi pismeno, sa obrazloženjem.

Ako amandman sadrži odredbu kojom se angažuju finansijska sredstva, podnosilac amandmana je dužan da ukaže na izvore ovih sredstava.

Amandman se podnosi predsjedavajućem Skupštine u roku koji ne može biti kraći od sedam dana od dana određenog za održavanje sjednice na kojoj će se pretresati prijedlog zakona.

Rok iz prethodnog stava primjenjuje se i na amandmane koje podnose klubovi naroda.

Podnosilac prijedloga zakona može da podnosi amandmane do završetka pretresa prijedloga zakona.

Vlada može da podnose amandmane i na prijedlog zakona koji nije podnijela.

- d) komunikacijska i transportna infrastruktura;
- e) socijalna politika;
- f) provođenje zakona i drugih propisa o državljanstvu;
- g) imigracija i azil;
- h) turizam;
- i) korištenje prirodnih bogatstava.

Član 14.

Vršenje nadle nosti

Svoje nadle nosti Kanton izvršava donošenjem sopstvenih propisa i primjenom propisa Bosne i Hercegovine i Federacije.

Nadle nosti iz člana 13. ovog Ustava Kanton vrši u obimu dogovorenom sa federalnim vlastima. U slučaju da takav dogovor ne postoji te nadle nosti će Kanton vršiti cjelovito i samostalno.

Član 15.

Prenošenje nadle nosti

Svoje nadle nosti iz oblasti obrazovanja, kulture, turizma, lokalnog poslovanja i dobrotvornih aktivnosti, radija i televizije Kanton može prenositi na općine u svom sastavu. Ove nadle nosti će se obavezno prenositi na one općine u kojima većinsko stanovništvo prema nacionalnoj strukturi nije stanovništvo koje čini većinu i na području cijelog Kantona.

Kanton može i neke od svojih nadle nosti prenijeti i na federalne vlasti, ukoliko bi se na taj način obezbijedilo njihovo efikasnije i racionalnije vršenje.

Odluku o prenošenju nadle nosti u smislu ovog člana donosi Skupština.

IV - STRUKTURA VLASTI

A) ZAKONODAVNA VLAST

Član 16.

Opća odredba

Zakonodavnu vlast u Kantonu vrši Skupština Kantona.

Član 17.

Sastav Skupštine

Skupština je jednodomo predstavničko tijelo sastavljeno od 45 (četrdesetpet) poslanika. Poslanici se biraju tajnim glasanjem na neposrednim izborima na cijelom području Kantona.

Prilikom izbora poslanika obezbjeđuje se odgovarajuća zastupljenost predstavnika Bošnjaka, Hrvata i ostalih naroda proporcionalno nacionalnoj strukturi stanovništva na području Kantona.

Izbor poslanika u Skupštini provodi se sukladno federalnim izbornim propisima, s tim što izbore raspisuje i provodi Skupština.

Mandat poslanika u Skupštini traje 2 (dvije) godine.

Član 18.

Nadle nosti Skupštine

Skupština Kantona:

- a) priprema i dvotrećinskom većinom usvaja Ustav Kantona;
- b) donosi zakone i druge propise u okviru izvršavanja nadle nosti Kantona, izuzev propisa koji su ovim Ustavom ili zakonom dati u nadle nost Vlade Kantona;
- c) bira i razrješava Predsjednika i podpredsjednika Kantona sukladno Ustavu Federacije i ovom Ustavu;
- d) utvrđuje politiku i donosi programe razvoja Kantona;
- e) potvrđuje imenovanje Premijera, zamjenika Premijera i članova Vlade Kantona;
- f) osniva kantonalne i općinske sudove i utvrđuje njihove nadle nosti;
- g) bira sudije kantonalnih sudova sukladno Ustavu Federacije i ovom Ustavu;
- h) usvaja bud et Kantona i donosi zakone o oporezivanju i na drugi način osigurava potrebno finansiranje;
- i) bira zastupnike u Dom naroda Federacije sukladno Ustavu Federacije;
- j) odlučuje o prijenosu ovlaštenja Kantona na općine i Federaciju;
- k) odobrava zaključivanje ugovora i sporazuma u oblasti međunarodnih odnosa i međunarodne suradnje;
- l) provodi istragu sukladno ovom Ustavu i posebnim propisima;
- m) vrši i druge poslove utvrđene federalnim propisima, ovim Ustavom i kantonalnim propisima.

Član 19.

Način rada Skupštine

Skupština bira predsjedavajućeg i dva njegova zamjenika iz reda izabranih poslanika.

Skupština zasijeda javno, izuzev u slučajevima kada je to predviđeno njenim poslovníkom. Izvještaji o zasjedanjima i donesenim odlukama se objavljuju u sredstvima javnog informiranja.

Način rada Skupštine bli e se uređuje poslovníkom.

Član 20.

Poslanički imunitet

Krivični postupak ili građanska parnica ne mogu biti pokrenuti protiv kantonalnog poslanika, niti kantonalni poslanik može biti zadržan u pritvoru ili kažnjen na bilo koji način zbog iznesenog mišljenja i datog glasa u Skupštini.

Član 21.

Način odlučivanja u Skupštini

U vršenju svojih nadle nosti Skupština donosi zakone, druge propise, te opće i pojedinačne akte (dalje: propisi).

VII - AKTA VLADE KANTONA

Član 26.

Vlada Kantona u ostvarivanju svojih nadležnosti utvrđenih ustavom donosi uredbе, odluke, rješenja i zaključke.

Član 27.

Izuzetno za vrijeme trajanja ratnog stanja ili neposredne ratne opasnosti kada postoji objektivna nemogućnost da se sazove Skupština Kantona, Vlada može donositi i propise iz nadležnosti Skupštine Kantona.

Propisima iz stava 1. ovog člana ne mogu se staviti van snage prava i slobode utvrđene ustavom i drugim propisima.

Propise iz stava 1. ovog člana Vlada će dostaviti Skupštini na potvrdu čim ona bude u mogućnosti da se sastane.

Član 28.

Uredbom se uređuju najvažnija pitanja iz nadležnosti Vlade Kantona, bliže uređuju odnosi za provođenje zakona, obrazuju stručne i druge službe Vlade Kantona i utvrđuju načela za unutrašnju organizaciju organa uprave Kantona.

Odlukom se uređuju pojedina pitanja ili propisuju mjere Vlade Kantona, daje saglasnost ili potvrđuju akta drugih organa ili organizacija i odlučuje o drugim pitanjima o kojima se ne odlučuje uredbom.

Rješenjem se odlučuje o imenovanjima i razrješenjima, kao i o drugim pojedinačnim pitanjima iz nadležnosti Vlade Kantona.

Zaključkom se utvrđuju stavovi o pitanjima od značaja za provođenje utvrđene politike, uređuju unutrašnji odnosi u Vladi Kantona i određuju zadaci organima uprave i službama, kao i radnim tijelima Vlade Kantona. Zaključkom se odlučuje i u drugim slučajevima u kojima se ne donose druga akta.

Član 29.

Uredbe i odluke Vlade Kantona objavljuju se u "Službenim novinama Kantona Sarajevo", a ostali akti Vlade ako je to u njima navedeno.

VIII - JAVNOST RADA VLADE KANTONA

Član 30.

Javnost rada Vlade Kantona obezbjeđuje se u skladu sa zakonom kojim se reguliše sloboda pristupa informacijama u Federaciji Bosne i Hercegovine.

IX - STRUČNE I DRUGE SLUŽBE KANTONA

Član 31.

Za obavljanje stručnih i drugih poslova za potrebe Skupštine Kantona, Vlade Kantona i organe uprave, Vlada Kantona može osnivati određene stručne, tehničke i druge službe, kao zajedničke ili samostalne službe, u skladu sa zakonom.

Aktom o obrazovanju službe iz prethodnog stava, utvrđuje se njen djelokrug, kao i status i odgovornost te službe i lica koje njom rukovodi.

Član 32.

Vlada Kantona vrši nadzor nad radom stručnih službi koje obrazuje.

Sekretar Vlade Kantona rukovodi radom Stručne službe koja obavlja poslove za potrebe Vlade Kantona i odgovoran je za njen rad.

X - PRELAZNE I ZAVRŠNE ODREDBE

Član 33.

Vlada Kantona je dužna donijeti Poslovnik o svom radu u roku od 30 dana od svog konstituisanja.

Član 34.

Vlada Kantona Sarajevo dužna je uskladiti Poslovnik o radu sa odredbama Zakona o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 38/13), u roku od 30 dana od dana njegovog stupanja na snagu.

Član 35.

Poslovnik Izvršnog odbora Grada Sarajeva i drugi propisi koji se odnose na njegovo unutrašnje organizovanje i funkcionisanje, koji su na snazi na dan stupanja na snagu Zakona o Vladi Kantona Sarajevo ("Službene novine Kantona Sarajevo", broj 7/96), ukoliko nisu u suprotnosti sa Ustavom Kantona i ovim zakonom, primjenjivaće se kao propisi Vlade, dok se ne donese Poslovnik o radu Vlade Kantona.

Član 36.

Do imenovanja premijera i članova Vlade u skladu sa Zakonom o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 4/01), poslove iz nadležnosti Vlade vršit će Vlada u dosadašnjem sastavu.

Član 37.

Ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćeni tekst Zakona o Vladi Kantona Sarajevo.

Član 38.

Zakon o izmjenama i dopunama Zakona o Vladi Kantona Sarajevo stupio je na snagu osmog dana od dana objavljivanja u "Službenim novinama Kantona Sarajevo", broj 38/13.

Na osnovu člana 16. Zakona o izmjenama i dopunama Zakona o sudskim taksama ("Službene novine Kantona Sarajevo", broj 18/14) i člana 181. Poslovnika Skupštine Kantona Sarajevo ("Službene novine Kantona Sarajevo", broj 41/12 - Drugi novi prečišćeni tekst i br. 15/13 i 47/13), Zakonodavno - pravna komisija Skupštine Kantona Sarajevo, na sjednici 22.08.2014. godine, utvrdila je Prečišćeni tekst Zakona o sudskim taksama.

Prečišćeni tekst Zakona o sudskim taksama obuhvata: Zakon o sudskim taksama ("Službene novine Kantona Sarajevo", broj 21/09), Zakon o izmjenama i dopunama Zakona o sudskim taksama ("Službene novine Kantona Sarajevo", broj 29/09), Zakon o izmjeni Zakona o sudskim taksama ("Službene novine Kantona Sarajevo", broj 14/11), Zakon o izmjenama Zakona o sudskim taksama ("Službene novine Kantona Sarajevo", broj 36/13) i Zakon o izmjenama i dopunama Zakona o sudskim taksama ("Službene novine Kantona Sarajevo", broj 18/14), u kojim je naznačen dan stupanja na snagu tih zakona.

Broj 01-05.22971-2/14

22. augusta 2014. godine
Sarajevo

Po ovlaštenju
Esad Hrvaić, s. r.

ZAKON

O SUDSKIM TAKSAMA

(Prečišćeni tekst)

DIO PRVI. OPĆE ODREDBE

Član 1.

(Plaćanje sudske takse)

- (1) Ovim zakonom utvrđuje se način plaćanja sudskih taksa (u daljnjem tekstu: takse) u postupku pred Kantonalnim sudom u Sarajevu i Općinskim sudom u Sarajevu (u daljnjem tekstu: sud).
- (2) Postupci u kojima se plaća taksa i visina takse za pojedine radnje, utvrđeni su u Tarifi sudskih taksi, koja je sastavni dio ovog zakona.

Član 2.

(Obveznik plaćanja takse)

- (1) Takse propisane ovim zakonom plaća lice po čijem zahtjevu ili u čijem interesu se preduzimaju radnje u postupku, za koje je ovim zakonom utvrđeno plaćanje takse (u daljnjem tekstu: takseni obveznik).
- (2) Za podneske i zapisnike koji zamjenjuju podneske taksu je dužno da plati lice koje podnosi podneske i lice na čiji zahtjev